

C'IH YIÆ-GYIH KYI. 出埃及記

NYING=PO T'U=WÔ.

寧波土話。

ZÔNG-HÆ

ME-WÔ SHÜ-KWUN

ING-SHIH.

上海

美華書館

印刷。

GYIU-IAH-SHÜ

FÆN NYING-PO T'U-WÔ

FENG P'IN TANG P'IN.

YIN-PIN CÜ SIANG-TE-GO TSIH-TSÔNG.

C'IH YIÆ-GYIH KYI.

DA-ING PENG-KOH TENG WÆ-KOH SING-SHÜ-WE

ING-GO.

1899.

舊約書

翻寧波土話

分篇打篇。

沿邊註相對個節章。

出埃及記。

大英本國等外國聖書會

印個。

1899。

C'IH YIÆ-GYIH KYI. 出埃及記

C. I.

YI-SEH-LIH keh-sing ng-ts teng Yüô-koh tao Yiæ-gyih, koh-nying teng gyi kô-kyün dô-kô læ-go, gyi ming-z læ 'ô-veng. ² Liu-bin, Si-min, Li-vi, Yiu-da, ³ Yi-sah-kyüô, Si-pu-leng, Bin-yüô-ming, ⁴ Dæn, Neh-da-li, Kyüô-teh, Üô-shih. ⁵ Væn-pah dzong Yüô-koh iao-bo-li sang-loh-læ-go, t'ong-gong ts'ih-jih-go nying. lah-seh z yi-kying læ Yiæ-gyih de. ⁶ lah-seh teng cong hyüong-di, lin tso-dæ-go nying, tu si-de. ⁷ Yi-seh-lih ts-seng sang-jiang, meo-meo zing-zing to-ky'i-læ, do-nyiang hying-wông, c'ong-mun keh-go di-fông.

以色列箇星兒子等雅各到埃及，各人等其家眷大家來個，其名字來下文。² 流便、西緬、利未、猶大、³ 以薩迦、西布倫、便雅憫、⁴ 但、納大利、迦得、亞設。⁵ 凡百從雅各腰縛裏生落來個，統共七十個人。約瑟是已經來埃及了。⁶ 約瑟等衆兄弟、連做代個人，都死了。⁷ 以色列子孫生養，茂茂盛盛多起來，大樣興旺，充滿箇個地方。

⁸ Ka z-'eo Yiæ-gyih koh yiu ih-go sing wông tsih-we, feh hyiao-teh lah-seh-go. ⁹ Teng gyi pah-sing wô, Ng k'en, Yi-seh-lih ts-seng keh-dzoh to-jü ah-lah, yi gyiang-jü ah-lah. ¹⁰ Læ, ah-lah hao yüong kyi-meo dæ gyi, sæn-leh tsæ to-ky'i-læ; 'eo-deo p'ong-djoh tang-tsiang z-'eo, gyi-lah 'eh-leh dziu-dih kong-kyih ah-lah, li-k'æ ts'-di c'ih-ky'i. ¹¹ Ziu shih-lih toh-kong go ky'i kwun gyi-lah, pih gyi t'iao-tæn. Gyi-lah we-leh Fah-lao ky'i-zao Pi-tong, Læn-seh, liang-go dzing-ts tso kw'u-vông. ¹² Dæn-z yüih pih-næn gyi, yüih-we kô-ts'eo, di-fông yüih-fah tsin-k'æ-læ. Z-ka gyi-lah we-leh Yi-seh-lih ts-seng tæ sing-z. ¹³ Yiæ-gyih nying ngang-k'ô Yi-seh-lih ts-seng tso djong-deo sang-weh, ¹⁴ peh gyi sing-sing kw'u-kw'u ko nyih-ts, sông zah-hwe, siao cün-deo, teng pah-jiang din-li-go kong-dzing; væn-pah sô yüong-kong-go z-ken tu kwun-leh nyin.

⁸ 介時候埃及國有一個新王即位，弗曉得約瑟個。⁹ 等其百姓話：「爾看，以色列子孫箇族多如阿拉，又強如阿拉。」¹⁰

來，阿拉好用計謀待其，省勒再多起來；後頭碰着打賬時候，其拉合勒仇敵攻擊阿拉，離開此地出去。」¹¹ 就設立督工個去管其拉，逼其挑擔。其拉爲了法老起造比東、蘭塞，兩個城子做庫房。¹² 但是越逼難其，越會加湊，地方越發展開來。是介其拉爲了以色列子孫擔心事。¹³ 埃及人硬柯以色列子孫做重頭生活，¹⁴ 撥其辛辛苦苦過日子，舂石灰、燒磚頭、等百樣田裏個工程。凡百所用工個事幹都管勒嚴。

¹⁵ Hyi-pah-læ siu-sang go nyü-nying, ih-go ming-z Jih-lah, ih-go ming-z Bu-üô: Yiæ-gyih wông feng-fu gyi-lah, ¹⁶ wô, Ng-lah teng Hyi-pah-læ nyü-nying siu-sang, k'en gyi zông zo-dong z-'eo, ziah-z wæn, iao long gyi sah; ziah-z nyiang-ts hao peh gyi weh. ¹⁷ Dæn-z siu-sang-go p'ô-gyü Jing-ming, feh tsiao Yiæ-gyih wông go feng-fu ka tso, pao-djün nen-wæn sing-ming. ¹⁸ Yiæ-gyih wông eo siu-sang-go, teng gyi-lah wô, Ng dza-we ka tso, pao-djün nen-wæn sing-ming ni? ¹⁹ Siu-sang-go teng Fah-lao wô, Hyi-pah-læ nyü-nying teng Yiæ-gyih nyü-nying koh-jiang: gyi-lah z-ka gyin; siu-sang-go feh-zing tao, ng-ts yi-kying sang-loh-de. ²⁰ We-leh ka, Jing-ming s eng peh siu-sang-go: ping-ts'ia pah-sing to-ky'i-læ, keng-kô gyiang-zing. ²¹ Ing-we siu-sang-go p'ô-gyü Jing-ming, keh-lah s-teh gyi-lah dzing-kô-lih-nyih. ²² Fah-lao feng-fu gyi cong pah-sing, wô, Gyi-lah sô sang-go nen-wæn, ng-lah pih-iao tiu-læ 'o-li, tsih-yiu keh-sing nyiang-ts, hao pao-djün gyi sing-ming.

¹⁵ 希伯來收生個女人，一個名字實拉，一個名字部亞。埃及王吩咐其拉，¹⁶ 話：「爾拉等希伯來女人收生，看其上坐桶時候，若是娃，要弄其煞；若是娘子好撥其活。」¹⁷ 但是收生個怕懼神明，弗照埃及王個吩咐介做，

保全男娃性命。¹⁸ 埃及王謳收生個，等其拉話：「爾咋會介做，保全男娃性命呢？」¹⁹ 收生個等法老話：「希伯來女人等埃及女人各樣；其拉是介健；收生個弗曾到，兒子已經生落了。」²⁰ 爲了介，神明賜恩撥收生個。並且百姓多起來，更加強盛。²¹ 因爲收生個怕懼神明，箇拉使得其拉成家立業。²² 法老吩咐其衆百姓，話：「其拉所生個男娃，爾拉必要丟來河裏；只有箇星娘子，好保全其性命。」

C. II.

KA z-'eo Li-vi keh-dzoh yiu ih-go nying ky'i dæ Li-vi nying-go nön. ² Keh nyü-nying yiu sing-yüing, sang ng-ts: k'en gyi hao-k'en, k'ông-leh sæn-ko yüih. ³ 'Eo-deo tsæ k'ông-feh-djü, teng gyi do ih-tsah lu-ken tso-go siang-ts, yüong zah-yiu teng jü-tsiang du-leh gyi; li-hyang fông-leh na-hwun; en-læ 'o-pin-yin lu-za-vong-li. ⁴ Gyi ah-tsi yün-yün lih-tong k'en gyi yiu soh-go p'ong-djoh. ⁵ K'eo-k'eo Fah-lao-go nön tseo-tao 'o-pin-yin ky'i gyiang-nyüoh: gyi-go s-nyü læ 'o-pin-yin tseo-læ tseo-ky'i: gyi-zi k'en-kyin siang-ts læ lu-za-vong-li, ziu ts'a s-nyü ky'i do-læ. ⁶ K'æ-k'æ-læ k'en-kyin na-hwun: na-hwun læ-tih kyiao. Ziu æ-lin gyi, wô, Keh z Hyi-pah-læ nying-go ng-ts. ⁷ Keh-tsao gyi ah-tsi teng Fah-lao-go nön wô, Ngô ky'i eo Hyi-pah-læ ah-bu, teng ng iang keh-go na-hwun, hao s-teh feh? ⁸ Fah-lao-go nön teng gyi wô, Ng ky'i. Keh nyiang-ts ziu ky'i, eo na-hwun-go ah-nyiang læ. ⁹ Fah-lao-go nön teng gyi wô, Bao keh-go na-hwun ky'i, teng ngô iang gyi; ngô we coh kong-din peh ng. Keh nyü-nying ziu bao na-hwun ky'i iang gyi. ¹⁰ Na-hwun do-ky'i-læ; nyü-nying ling gyi tao Fah-lao nön-go di-fông, ziu tso gyi-go ng-ts. Fah-lao nön c'ü gyi ming-z ^[1] Mo-si; ing-we gyi wô, Ngô dzong shü-li læ gyi zông-læ-go.

介時候利未箇族有一個人去抬利未人個囡。² 箇女人有身孕，生兒子。看其好看，囡了三個月。³ 後頭再囡弗住，等其馱一隻蘆竿做個箱子，用石油等乳漿塗勒其；裏向放勒奶花；安來河邊沿蘆柴縫裏。⁴ 其阿姊遠遠立東看其有啥個碰着。⁵ 扣扣法老個囡走到河邊沿去澆肉。其個使女來河邊沿走來走去。其自看見箱子來蘆柴縫裏，就差使女去馱來。⁶ 開開來看見奶花。奶花來的叫。就哀憐其，話：「箇是希伯來人個兒子。」⁷ 箇遭其阿姊等法老個囡話：「我去謳希伯來阿哺，等爾養箇個奶花，好使得弗？」⁸ 法老個囡等其話：「爾去。」箇娘子就去，謳奶花個阿孃來。⁹ 法老個囡等其話：「抱箇個奶花去，等我養其；我會給工鈿撥爾。」箇女人就抱奶花去養其。¹⁰ 奶花大起來。女人領其到法老個地方，就做其個兒子。法老囡取其名字摩西^[1]。因爲其話：「我從水裏拉其上來個。」

[1] Ziu-z Te-c'ih. 就是舁出。(原註)

¹¹ Mo-si công-nyin z-'eo, tseo-c'ih tao gyi hyüong-di di-fông, k'en gyi-lah t'iao-tæn; k'eo-k'eo k'en-kyin Yïæ-gyih nying tang ih-go Hyi-pah-læ nying, ziu-z gyi-go hyüong-di. ¹² K'en-k'en dông-pin keh-pin, tu m-nying læ-tong, ziu tang-sah keh Yïæ-gyih nying, k'ông gyi læ sô-nyi-li. ¹³ Di-nyi nyih, yi tseo-c'ih-ky'i; k'en-kyin liang-go Hyi-pah-læ nying siang-tang. Mo-si teng feh-dzing-li go nying wô, Ng dza-we tang ng zi-kô-nying ni? ¹⁴ Gyi wô, Jü lih ng tso moh-pah tso kwun, hao p'un-tön ah-lah z-ken ma? Ng siang long-sah ngô, ziang long-sah Yïæ-gyih nying ka ma? Mo-si ky'ih-hoh, wô, Keh-go en-gyin ko-jün p'o-de. ¹⁵ Fah-lao t'ing-meng keh-ky'i z-ken ziu iao sah Mo-si. Dæn-z Mo-si bi-ko Fah-lao min-zin, tao Mi-din di-fông ky'i; zo-læ tsing pin-yin. ¹⁶ Mi-din-go tsi-s yiu ts'ih-go nön; k'eo-k'eo læ tang shü, tsi-mun keh-sing shü-zao, hao s gyi ah-tia-go yang-de ky'üoh shü. ¹⁷ Keh-sing k'en-nyang-go læ, ken gyi-lah tseo; Mo-si ziu lih-ky'i-læ, pông-dzu gyi-lah,

peh gyi yang-de ky'üoh shü. ¹⁸ Gyi-lah ih kyü-tao ah-tia Liu-r di-fông, gyi wô, Kyih-mih-ts, ng dza-we kyü-læ ka kw'a? ¹⁹ Gyi-lah wô, Yiu ih-go Yiæ-gyih nying kyi ah-lah c'ih keh sing k'en-ying nying siu-li; yi teng ah-lah tang iao yüong-go shü, peh yang-de ky'üoh. ²⁰ Gyi teng nön wô, Keh-go nying læ 'ah-li? ng-lah dza-we ts'o-loh gyi? Hao ts'ing gyi læ ky'üoh-ping. ²¹ Mo-si dzing-nyün teng keh-go nying dô-kô deng: gyi pô nön Si-p'o-lah peh Mo-si tso ts'i-ts. ²² Gyi ts'i-ts sang ng-ts; Mo-si c'ü gyi ming-z ^[1] Keh-jing, z-ka wô, Ngô læ nga-deo di-fông tso c'ih-meng nying.

¹¹ 摩西壯年時候，走出到其兄弟地方，看其拉挑擔。扣扣看見埃及人打一個希伯來人，就是其個兄弟。¹² 看看蕩邊箇邊，都無人來東，就打煞箇埃及人，因其來沙泥裏。¹³ 第二日，又走出去；看見兩個希伯來人相打。摩西等弗成禮個人話：「爾咋會打爾自家人呢？」¹⁴ 其話：「誰立爾做牧伯做官，好判斷阿拉事幹嗎？爾想弄煞我，像弄煞埃及人介嗎？」摩西喫惟，話：「箇個案件果然破了。」¹⁵ 法老聽聞箇起事幹就要殺摩西。但是摩西避過法老面前，到米甸地方去；坐來井邊沿。¹⁶ 米甸個祭司有七個囡。扣扣來打水，齒滿箇星水槽，好使其阿爹個羊隊喫水。¹⁷ 箇星看羊個來，趕其拉走。摩西就立起來，幫助其拉，撥其羊隊喫水。¹⁸ 其拉一歸到阿爹流珥地方，其話：「今末子，爾咋會歸來介快？」¹⁹ 其拉話：「有一個埃及人救阿拉出箇星看羊人手裏；又等阿拉打要用個水，撥羊隊喫。」²⁰ 其等囡話：「箇個人來何裏？爾拉咋會錯落其？好請其來喫餅。」²¹ 摩西情願等箇個人大家庵。其把囡西坡拉撥摩西做妻子。²² 其妻子生兒子。摩西取其名字革順^[1]，是介話：「我來外頭地方做出門人。」

[1] Ziu-z C'ih-meng nying. 就是出門人。(原註)

²³ Ko-leh dziang-kyiu Yiæ-gyih wông si-de; Yi-seh-lih ts-seng, we-leh ziu lao-kw'u, t'æn-ky'i eo-hyang; gyi lao-kw'u-go sing-hyang zông-ky'i peh Jing-ming t'ing. ²⁴ Jing-ming t'ing-meng gyi-lah t'æn-ky'i-go sing-hyang; ziu kyi-teh zin-deo teng Üô-pah-lah-hen, Yi-sah, Yüô-koh, shih-lih-go iah. ²⁵ Jing-ming k'en-kwu Yi-seh-lih ts-seng, tsiao-kwun gyi-lah.

²³ 過了長久埃及王死了。以色列子孫，爲了受勞苦，嘆氣謳響；其勞苦個聲響上去撥神明聽。²⁴ 神明聽聞其拉嘆氣個聲響；就記得前頭等亞伯拉罕、以撒、雅各設立個約。²⁵ 神明看顧以色列子孫，照管其拉。

C. III.

KEH-TSAO Mo-si k'en gyi dziang-nying Mi-din tsi-s Yih-lo-go yang, ling gyi tao kw'ông-iæ nga-pin, tseo-tao Jing-ming-go sæn, ziu-z 'O-lih sæn. ² Yiæ-'o-wô-go T'in-s dzong ts'-bang-jü ho-yin cong-nyiang hyin-c'ih-læ peh Mo-si k'en. Gyi ih-k'en, k'en-kyin ts'-bang-jü ho læ-tih dzhah, ts'-bang m-neh me-diao. ³ Mo-si wô, Næn-kæn ngô tao-tseo-cün k'en keh-go do gyi-z, ts'-bang feh me-diao z dza-go yün-kwu. ⁴ Yiæ-'o-wô k'en-kyin gyi tseo-cün læ k'en, Jing-ming dzong ts'-bang-li eo gyi, wô, Mo-si, Mo-si! Gyi wô, Ngô læ-tong. ⁵ Jing-ming yi wô, M-nao tseo-long-læ: t'eh-diao ng kyiah-li-go 'a, ing-we ng lih-tih-go di-fông z sing-jün di-fông. ⁶ Yi wô, Ngô z ng ah-tia-go Jing-ming, Üô-pah-lah-hen-go Jing-ming, Yi-sah-go Jing-ming, Yüô-koh-go Jing-ming. Mo-si tsô-leh min-k'ong, ing-we p'ô k'en-kyin Jing-ming yün-kwu. ⁷ Yiæ-'o-wô wô, Ngô yi-kying k'en-kyin Ngô-go pah-sing læ Yiæ-gyih-go kw'u-ts'u, yi t'ing-meng gyi-lah we-leh; toh-kong go, wæ-wæ eo-hyang; Ngô hyiao-teh gyi-lah-go iu-meng. ⁸ Ngô kông-loh-læ kyi gyi-lah t'eh-c'ih Yiæ-gyih nying-go siu-li, ling gyi-lah c'ih keh-go di-ka, tao kw'un-kw'eh, 'eo-jih, liu na-na teng mih-dông-go di-t'u; ziu-z Kyüô-nen, Heh, Üô-

mo-li, Pi-li-si, Hyi-vi, Yiæ-pu-z, keh-sing dzoh-veng-go di-fông. ⁹ Næn-kæn Ngô t'ing-meng Yi-seh-lih ts-seng hyiang-hyang gyiu-k'eng Ngô; Ngô yia k'en-kyin Yiæ-gyih nying mo-næn gyi-go kw'u-ts'u. ¹⁰ Keh-lah ng læ; Ngô we ts'a ng ky'i kyin Fah-lao, ling Ngô-go pah-sing Yi-seh-lih ts-seng tseo-c'ih Yiæ-gyih.

箇遭摩西看其丈人米甸祭司葉羅個羊，領其到曠野外邊，走到神明個山，就是何烈山。² 耶和華個天使從刺棚樹火焰中央顯出來撥摩西看。其一看，看見刺棚樹火來的着，刺棚噉得焠掉。³ 摩西話：「難間我倒走轉看箇個大奇事，刺棚弗焠掉是咋個緣故。」⁴ 耶和華看見其走轉來看，神明從刺棚裏謳其，話：「摩西，摩西！」其話：「我來東。」⁵ 神明又話：「噉得好走攏來。脫掉爾腳裏個鞋，因為爾立的個地方是聖善地方。」⁶ 又話：「我是爾阿爹個神明，亞伯拉罕個神明，以撒個神明，雅各個神明。」摩西遮勒面孔，因為怕看見神明緣故。⁷ 耶和華話：「我已經看見我個百姓來埃及個苦楚，又聽聞其拉爲了督工個，懷懷謳響。我曉得其拉個憂悶。⁸ 我降落來救其拉脫出埃及人個手裏，領其拉出箇個地界，到寬闊、厚實、流奶奶等蜜糖個地土。就是迦南、赫、亞摩利、比利洗、希未、耶布土，箇星族份個地方。⁹ 難間我聽聞以色列子孫響響求懇我；我也看見埃及人磨難其個苦楚。¹⁰ 箇拉爾來。我會差爾去見法老，領我個百姓以色列子孫走出埃及。」

¹¹ Mo-si teng Jing-ming wô, Ngô z soh-go nying hao ky'i kyin Fah-lao, ling Yi-seh-lih ts-seng tseo-c'ih Yiæ-gyih ni? ¹² Gyi wô, Ngô pih-ding we teng ng dong-de læ-tong: ping-ts'ia keh hao tso Ngô ts'a ng-go bing-kyü: ng ling pah-sing tseo-c'ih Yiæ-gyih-go 'eo-deo, læ keh-go sæn ng-lah we voh-z Jing-ming. ¹³ Mo-si teng Jing-ming wô, Ngô tao Yi-seh-lih ts-seng-go di-fông, teng gyi-lah wô, Ng tsu-tsong-go Jing-ming ts'a ngô læ; jü-ko gyi-lah meng ngô wô, Gyi z soh-go ming-deo? ka-ni ngô dza we-teh gyi-lah? ¹⁴ Jing-ming teng Mo-si wô, NGÔ Z-JÛN-R-JÛN YIU-GO: yi wô, Ng teng Yi-seh-lih ts-seng hao wô, Z-JÛN YIU-GO ts'a ngô tao ng di-fông læ. ¹⁵ Jing-ming yi teng Mo-si wô, Ng teng Yi-seh-lih ts-seng hao wô, Ts'a ngô læ-go z [¹¹]Yiæ-'o-wô, ng-lah tsu-tsong-go Jing-ming, Üô-pah-lah-hen-go Jing-ming, Yi-sah-go Jing-ming, Yüô-koh-go Jing-ming; keh z Ngô üong-yün-go ming-deo! keh z Ngô shü-shü dæ-dæ-go kyi-'ao. ¹⁶ Ng ky'i jü-long Yi-seh-lih-go tsiang-lao, teng gyi-lah wô, Ng tsu-tsong-go Jing-ming, Üô-pah-lah-hen-go Jing-ming, Yi-sah-go Jing-ming, Yüô-koh-go Jing-ming, Yiæ-'o-wô hyin-c'ih peh ngô k'en, wô, Ngô tsing-tsing tsiao-kwun ng-lah, ping-ts'ia Yiæ-gyih nying sô tao ng-lah-go z-ken, Ngô yi-kying k'en-kyin-de. ¹⁷ Ngô yi-kying wô-ko-liao, Ngô! we ling ng-lah t'eh-c'ih Yiæ-gyih-go kw'u-næn, tao Kyüô-nen, Heh, Üô-mo-li, Pi-li-si, Hyi-vi, Yiæ-pu-z, keh-sing dzoh-veng-go di-fông, ziu-z liu na-na teng mih-dông-go di-fông. ¹⁸ Cong-nying we t'ing ng-go shih-wô: ng hao teng Yi-seh-lih tsiang-lao ky'i kyin Yiæ-gyih wông, teng gyi wô, Hyi-pah-læ nying-go Jing-ming Yiæ-'o-wô yi-kying we-djoh ah-lah: næn-kæn, ts'ing ng, cing ah-lah tao kw'ông-iæ di-fông sæn-nyih-go lu-dzing, ky'i tsi Yiæ-'o-wô, ah-lah-go Jing-ming. ¹⁹ Ngô hyiao-teh ziah feh-z hyin-c'ih do neng-ken-go siu-dön, Yiæ-gyih wông feh-hyü ng-lah ky'i. ²⁰ Ngô we sing-c'ih siu læ, tso hyü-to gyi-z tang Yiæ-gyih koh: 'eo-deo gyi k'eng s ng ky'i. ²¹ Ping-ts'ia Ngô we s-teh keh-go pah-sing teh-djoh eng-we læ Yiæ-gyih nying-go min-zin; ng-lah tseo-c'ih-go z-'eo, feh we k'ong-siu tseo-c'ih. ²² Ko-tang-ko nyü-nying we hyiang gyi ling-sô-kô, teng tænkoh læ gyi oh-li-go nyü-k'ah, t'ao kying-ts nying-ts-go ky'i-ming, teng i-zông keh-sing, peh zi-go ng-ts nön: z-ka ng-lah we lo-liah Yiæ-gyih nying-go dzæ-veh.

¹¹ 摩西等神明話：「我是啥個人好去見法老，領以色列子孫走出埃及呢？」¹² 其話：「我必定會等爾同隊來東。並且箇好做我差爾個憑據。爾領百姓走出埃及個後頭，來箇個山爾拉會服侍神明。」¹³ 摩西等神明話：「我到以色列子孫個地方，等其拉話：『爾祖宗個神明差我來。』如果其拉問我話：『其是啥個名頭？』介呢我咋回答其拉？」¹⁴ 神明等摩西話：「我自然而然有個。」又話：「爾等以色列子孫好話：『自然有個差我到爾地方來。』」¹⁵

神明又等摩西話：「爾等以色列子孫好話：『差我來個是耶和華^[1]，爾拉祖宗個神明，亞伯拉罕個神明，以撒個神明，雅各個神明。箇是我永遠個名頭！箇是我世代代個記號。』¹⁶ 爾去聚攏以色列個長老，等其拉話：『爾祖宗個神明，亞伯拉罕個神明，以撒個神明，雅各個神明，耶和華顯出撥我看，話：「我真正照管爾拉，並且埃及人所到爾拉個事幹，我已經看見了。¹⁷ 我已經話過了，我會領爾拉脫出埃及個苦難，到迦南、赫、亞摩利、比利洗、希未、耶布土，箇星族份個地方，就是流奶奶等蜜糖個地方。』¹⁸ 衆人會聽爾個說話。爾好等以色列長老去見埃及王，等其話：『希伯來人個神明耶和華已經會着阿拉。難間，請爾，准阿拉到曠野地方三日個路程，去祭耶和華，阿拉個神明。』¹⁹ 我曉得若弗是顯出大能幹個手段，埃及王弗許爾拉去。²⁰ 我會伸出手來，做許多奇事打埃及國。後頭其肯賜爾去。²¹ 並且我會使得箇個百姓得着恩惠來埃及人個面前。爾拉走出個時候，弗會空手走出。²² 個打個女人會向其鄰舍家，等耽擱來其屋裏個女客，討金子銀子個器皿，等衣裳箇星，撥自個兒子因。是介爾拉會擄掠埃及人個財物。」

[1] Ziu-z Z-jün-r-jün yiu-go. 就是自然而然有個。(原註)

C. IV.

MO-SI we-teh wô, Gyi-lah feh we siang-sing ngô, feh we t'ing ngô-go shih-wô; ing-we gyi-lah we wô, Yiæ-'o-wô m-neh hyin-c'ih peh ng k'en.² Yiæ-'o-wô teng gyi wô, Læ ng siu-li-go z soh-go tong-si? Gyi wô, Kwa-dziang.³ Cü wô, Tiu gyi læ di-yiang-li: tiu-loh di-yiang, pin ih-kwang dzô; Mo-si ziu to-bi gyi.⁴ Yiæ-'o-wô teng Mo-si wô, Ng siu sing-c'ih, nyiah-leh gyi mi-pô: (ziu sing-c'ih siu læ, k'ò gyi; tao siu-li, dzing-gyiu z kwa-dziang.)⁵ s-teh gyi-lah siang-sing Yiæ-'o-wô, ziu-z gyi tsu-tsong-go Jing-ming, Üô-pah-lah-hen-go Jing-ming, Yi-sah-go Jing-ming, Yüô-koh-go Jing-ming, yi-kying hyin-c'ih peh ng k'en.⁶ Yiæ-'o-wô yi teng gyi wô, Ng siu ts'ò-tsing gwa-li: ziu pô siu ts'ò-tsing gwa-li; do-c'ih ih-k'en, gyi siu sang da-mô-fong ziang shih ka bah.⁷ Yi wô, Ng-go siu tsæ ts'ò-tsing gwa-li: (ziu pô siu tsæ ts'ò-tsing gwa-li: do-c'ih ih-k'en, dzing-gyiu teng gyi yü-to-go kyi-sing ih-yiang.)⁸ Ka-ni, ziah-z gyi-lah feh siang-sing ng, feh t'ing zin-deo bing-kyü go te-tsing, tsong we siang-sing 'eo-deo bing-kyü go te-tsing.⁹ T'ông-jün gyi-lah feh siang-sing keh liang-go bing-kyü, yi feh t'ing ng-go shih-wô, ng hao do 'o-li-go shü, tao-læ sao-di-li; ng dzong 'o-li do-læ-go shü we læ sao-di-li pin tso hyüih.¹⁰ Mo-si teng Yiæ-'o-wô wô, Cü 'ò, ngô ih-hyang feh da we kông shih-wô, m-neh k'eo-neng zih-bin; næn-kæn Ng feng-fu nu-boh ts-'eo, dzing-gyiu z-ka.¹¹ Yiæ-'o-wô teng gyi wô, Zao nying cü-pô-go z jü? Zao gyi tso ô-ts, tso long-bang, tso liang-ngæn, tso hah-ngæn-go z jü? Ky'i feh-z Ngô Yiæ-'o-wô ma?¹² Ka-ni ng ky'i; Ngô we pông-dzu ng cü-pô, kao ng sô ing-kæ kông-go.¹³ Mo-si wô, Gyi Ng, Cü, Ng sô iao ts'a-go, hao t'oh-fu gyi siu-li ts'a gyi.¹⁴ Yiæ-'o-wô ô-wông Mo-si, ziu wô, Næn-dao m-neh Li-vi nying Üô-leng, ng-go ah-ko ma? Ngô hyiao-teh gyi we kông shih-wô: ping-ts'ia gyi tseo-c'ih-læ nying-tsih ng: k'en-kyin ng-go z-'eo, gyi sing-li we hwun-hyi.¹⁵ Ng hao teng gyi kông, shih-wô djün peh gyi k'eo-li: Ngô we pông-dzu ng-go cü-pô teng gyi-go cü-pô, ping-ts'ia kao ng-lah sô tông-kæ tso-go z-ken.¹⁶ Üô-leng we dæ ng wô hyiang pah-sing dao: gyi we teng ng dæ tso cü-pô, ng we teng gyi dæ? tso Jing-ming.¹⁷ Ng siu-li hao nyiah keh keng kwa-dziang yüong gyi tso keh-sing gyi-z.

摩西回答話：「其拉弗會相信我，弗會聽我個說話。因爲其拉會話：『耶和華嘸得顯出撥爾看。』」² 耶和華等其話：「來爾手裏個是啥個東西？」其話：「拐杖。」³ 主話：「丟其來地垵裏。」丟落地垵，變一梗蛇。摩西就躲避其。⁴ 耶和華等摩西話：「爾手伸出，捏勒其尾巴。」（就伸出手來，攔其；到手裏，仍舊是拐杖。）⁵ 使得其拉相

信耶和華，就是其祖宗個神明、亞伯拉罕個神明、以撒個神明、雅各個神明，已經顯出撥爾看。⁶ 耶和華又等其話：「爾手又進懷裏。」就把手又進懷裏。馱出一看，其手生大麻風像雪介白。⁷ 又話：「爾個手再又進懷裏。」（就把手再又進懷裏。馱出一看，仍舊等其餘多個肌身一樣。）⁸ 介呢，若是其拉弗相信爾，弗聽前頭憑據個對證，總會相信後頭憑據個對證。⁹ 倘然其拉弗相信箇兩個憑據，又弗聽爾個說話，爾好馱河裏個水，倒來燥地裏。爾從河裏馱來個水會來燥地裏變做血。¹⁰ 摩西等耶和華話：「主嘅，我一向弗大會講說話，嘅得口能舌辯。難間爾吩咐奴僕之後，仍舊是介。」¹¹ 耶和華等其話：「造人嘴巴個是誰？造其做啞子、做聾聵、做亮眼、做瞎眼個是誰？豈弗是我耶和華嗎？」¹² 介呢爾去。我會幫助爾嘴巴，教爾所應該講個。¹³ 摩西話：「求爾，主，爾所要差個，好託付其手裏差其。」¹⁴ 耶和華慚惶摩西，就話：「難道嘅得利夫人亞倫，爾個阿哥嗎？我曉得其會講說話。並且其走出來迎接爾。看見爾個時候，其心裏會歡喜。」¹⁵ 爾好等其講，說話傳撥其口裏。我會幫助爾個嘴巴等其個嘴巴，並且教爾拉所當該做個事幹。¹⁶ 亞倫會代爾話向百姓道。其會等爾代做嘴巴，爾會等其代做神明。¹⁷ 爾手裏好捏箇根拐杖用其做箇星奇事。

¹⁸ Mo-si kyü-ky'i, kyin gyi d'ziang-nying Yih-lo, teng gyi wô, Ts'ing ng, peh ngô cün-ky'i kyin ngô hyüong-di, læ Yiæ-gyih di-fông-go, k'en gyi-lah wa læ-kæn feh. Yih-lo teng Mo-si wô, Ng hao en-en wëng-wëng ky'i. ¹⁹ Yiæ-'o-wô læ Mi-din teng Mo-si wô, Ng kyü Yiæ-gyih ky'i, ing-we tang-sön 'æ ng sing-ming-go nying tu si-de.

¹⁸ 摩西歸去，見其丈人葉羅，等其話：「請爾，撥我轉去見我兄弟，來埃及地方個，看其拉還來間弗。」葉羅等摩西話：「爾好安安穩穩去。」¹⁹ 耶和華來米甸等摩西話：「爾歸埃及去，因為打算害爾性命個人都死了。」

²⁰ Mo-si ta gyi ts'i-ts ng-ts, peh gyi-lah gyi li-ts, kyü Yiæ-gyih di-fông ky'i. Mo-si siu-li nyiah-leh Jing-ming-go kwa-d'ziang. ²¹ Yiæ-'o-wô teng Mo-si wô, Ngô fông-læ ng siu-'ô-go gyi-z, ng tao Yiæ-gyih-go z-'eo, tu pih-iao læ Fah-lao min-zin ka tso: dæn-z Ngô we ngang gyi-go sing, s-teh gyi feh-k'eng fông pah-sing ky'i. ²² Ng hao wô hyiang Fah-lao dao, Yiæ-'o-wô z-ka wô, Yi-seh-lih z Ngô ng-ts, ziu-z Ngô-go tsiang-ts. ²³ Ngô teng ng wô, Fông Ngô ng-ts ky'i hao voh-z Ngô: ng kyî-jün feh-k'eng fông gyi, Ngô pih-ding sah-diao ng-go ng-ts, ziu-z ng-go tsiang-ts.

²⁰ 摩西帶其妻子兒子，撥其拉騎驢子，歸埃及地方去。摩西手裏捏勒神明個拐杖。²¹ 耶和華等摩西話：「我放來爾手下個奇事，爾到埃及個時候，都必要來法老面前介做。但是我會硬其個心，使得其弗肯放百姓去。²² 爾好話向法老道，耶和華是介話，以色列是我兒子，就是我個長子。²³ 我等爾話：『放我兒子去好服侍我。爾既然弗肯放其，我必定殺掉爾個兒子，就是爾個長子。』」

²⁴ K'eo-k'eo læ lu-zông 'ô-c'ü-li Yiæ-'o-wô p'ong-djoh Mo-si, iao sah gyi. ²⁵ Si-p'o-lah ziu do-leh ho-zah, keh gyi ng-ts 'ô-sing-go bi, tiu læ gyi kyiah-'ô, wô, Ng jih-dzæ z ngô c'ih-hyüih-go d'ziang-fu. ²⁶ Yiæ-'o-wô ziu fông gyi ky'i. Si-p'o-lah yi wô, Ng z c'ih-hyüih-go d'ziang-fu, we-leh keh-go tsiu-keh-li.

²⁴ 扣扣來路上下處裏耶和華碰着摩西，要殺其。²⁵ 西坡拉就馱勒火石，割其兒子下身個皮，丟來其腳下，話：「爾實在是我出血個丈夫。」²⁶ 耶和華就放其去。西坡拉又話：「爾是出血個丈夫，爲了箇個周割禮。」

²⁷ Yiæ-'o-wô teng Üô-leng wô, Ng tao kw'ông-iæ ky'i nying-tsih Mo-si. Gyi ziu ky'i, nying-tsih gyi læ Jing-ming-go sæn-li, ts'ing gyi cü. ²⁸ Mo-si pô Yiæ-'o-wô ts'a gyi-go keh-sing shih-wô, teng feng-fu gyi-go keh-sing bing-kyü, tu wô hyiang Üô-leng dao.

²⁷ 耶和華等亞倫話：「爾到曠野去迎接摩西。」其就去，迎接其來神明個山裏，親其嘴。²⁸ 摩西把耶和華差其個箇星說話，等吩咐其個箇星憑據，都話向亞倫道。

²⁹ Mo-si teng Üô-leng ky'i jü-long Yi-seh-lih ts-seng-go cong tsiang-lao. ³⁰ Yiæ-'o-wô teng Mo-si sô kông-go shih-wô, Üô-leng tu djün-hyang gyi-lah dao, yi læ pah-sing min-zin tso keh-sing bing-kyü. ³¹ Pah-sing ziu siang-sing: kyi-jün t'ing-meng Yiæ-'o-wô tsiao-kwun Yi-seh-lih ts-seng, k'en-kwu gyi-lah-go kw'u-ts'u, ziu deo eo-tæn-tao pa-pa.

²⁹ 摩西等亞倫去聚攏以色列子孫個衆長老。³⁰ 耶和華等摩西所講個說話，亞倫都傳向其拉道，又來百姓面前做箇星憑據。³¹ 百姓就相信。既然聽聞耶和華照管以色列子孫，看顧其拉個苦楚，就頭謳帶倒拜拜。

C. V.

'EO-DEO Mo-si teng Üô-leng tseo-tsing ky'i kyin Fah-lao, teng gyi wô, Yi-seh-lih-go Jing-ming Yiæ-'o-wô z-ka wô, Fông Ngô pah-sing ky'i hao læ kw'ông-iæ li teng ngô siu tsih-k'eng. ² Fah-lao wô, Yiæ-'o-wô z jü, iao s-teh ngô t'ing Gyi-go shih-wô, fông Yi-seh-lih pah-sing ky'i ma? Ngô feh sih-teh Yiæ-'o-wô, yia feh-k'eng fông Yi-seh-lih pah-sing ky'i. ³ Gyi-lah wô, Hyi-pah-læ nying-go Jing-ming yi-kying we-djoh ah-lah. Ts'ing ng, cing ah-lah tao kw'ông-iæ-li tseo sæn-nyih-go lu-dzing ky'i tsi ah-lah Jing-ming Yiæ-'o-wô, k'ong-p'ô Gyi kông-loh wëng-yüoh tao-ts'iang kong-tang ah-lah. ⁴ Yiæ-gyih wông teng gyi-lah wô, Ng Mo-si teng Üô-leng, dza-we tsu-djü pah-sing-go sang-weh? Ng ky'i, t'iao ng-go tæn. ⁵ Fah-lao yi wô, Næn-kæn keh-go di-fông pah-sing z-ka to, ng-lah wa iao s-teh gyi-lah hyih-tæn.

後頭摩西等亞倫走進去見法老，等其話：「以色列

個神明耶和華是介話：『放我百姓去好來曠野裏等我守節肯。』」² 法老話：「耶和華是誰，要使得我聽其個說話，放以色列百姓去嗎？我弗識得耶和華，也弗肯放以色列百姓去。」³ 其拉話：「希伯來人個神明已經會着阿拉。請爾，准阿拉到曠野裏走三日個路程去祭阿拉神明耶和華，恐怕其降落瘟疫、刀槍攻打阿拉。」⁴ 埃及王等其拉話：「爾摩西等亞倫，咋會阻住百姓個生活？爾去，挑爾個擔。」⁵ 法老又話：「難間箇個地方百姓是介多，爾拉還要使得其拉歇擔。」

⁶ Tông-nyih Fah-lao feng-fu pah-sing toh-kong-go teng gyi-lah tsoh-deo, wô, ⁷ Ng-lah feh-k'ô ziang zin-deo ka, do mah-ken peh pah-sing tso cün-deo: hao eo gyi-zi ky'i siu mah-ken. ⁸ Zin-deo tso cün-deo-go su-moh, ng dzing-gyiu iao gyi tso-mun: ih-ngæn m-nao kæn-loh: ing-we gyi-lah læn-do; keh-lah gyiu-k'eng wô, Peh ah-lah ky'i tsi ah-lah Jing-ming. ⁹ Hao kê-ts'eo keh-sing nying-go sang-weh, s-teh gyi-lah lao-kw'u: feh ky'i ts'æ k'ong-deo shih-wô.

⁶ 當日法老吩咐百姓督工個等其拉作頭，話，⁷ 「爾拉弗可像前頭介，馱麥稈撥百姓做磚頭。好謳其自去收麥稈。」⁸ 前頭做磚頭個數目，爾仍舊要其做滿。一眼嚟得好減落。因爲其拉懶惰；箇拉求懇話：『撥阿拉去祭阿拉神明。』⁹ 好加湊箇星人個生活，使得其拉勞苦。弗去睬空頭說話。」

¹⁰ Pah-sing toh-kong-go, teng gyi-lah tsoh-deo tseo-c'ih, teng pah-sing wô, Fah-lao z-ka wô, Ngô feh-k'eng do mah-ken peh ng-lah. ¹¹ Ng-lah ky'i, ze ng-lah sô p'ong-djoh-go, zi siu mah-ken dæn-z ng-lah-go sang-weh ih-ngæn m-neh hao kæn-loh. ¹² Z-ka pah-sing sæn-k'æ læ 'en Yiæ-gyih di-fông bah ts'ao, keng-cü tông

mah-ken yüong. ¹³ Toh-kong-go ts'e gyi-lah, wô, Ng-lah sang-weh iao djoh-nyih wun-kong, ziang zin-deo yiu mah-ken z-'eo ih-ying. ¹⁴ Fah-lao toh-kong-go tang gyi sô shih-lih Yi-seh-lih ts-seng-go tsoh-deo, meng gyi-lah wô, Zô-nyih teng kyih-mih, ng-lah sô tso-go cün-deo, dza-we m-neh tsiao-su wun-kong ziang zin-deo ka?

¹⁰ 百姓督工個等其拉作頭走出，等百姓話：「法老是介話：『我弗肯馱麥稈撥爾拉。』」¹¹ 爾拉去，隨爾拉所碰着個，自收麥稈。但是爾拉個生活一眼嚟得好減落。」¹² 是介百姓散開來咸埃及地方拔草，根株當麥稈用。¹³ 督工個催其拉，話：「爾拉生活要逐日完工，像前頭有麥稈時候一樣。」¹⁴ 法老督工個打其所設立以色列子孫個作頭，問其拉話：「昨日等今末，爾拉所做個磚頭，咋會嚟得照數完工像前頭介？」

¹⁵ Yi-seh-lih ts-seng-go tsoh-deo læ gyiu Fah-lao wô, Ng dza-we z-ka dæ nu-boh? ¹⁶ Gyi-lah feh do mah-ken peh ng nu-boh, yi feng-fu ah-lah tso cün-deo; ng-go nu-boh be tang; keh z ng-zi-go pah-sing ko-shih. ¹⁷ Fah-lao wô, Ng-lah læn-do, ng-lah læn-do; keh-lah wô, Peh ah-lah ky'i tsi Yiæ-'o-wô. ¹⁸ Næn-kæn ng-lah ky'i, tso sang-weh; feh peh ng-lah mah-ken, dæn-z ng-lah tsong iao tsiao-su kao-dæ cün-deo.

¹⁵ 以色列子孫個作頭來求法老話：「爾咋會是介待奴僕？」¹⁶ 其拉弗馱麥稈撥爾奴僕，又吩咐阿拉做磚頭。爾個奴僕被打。箇是爾自個百姓過失。」¹⁷ 法老話：「爾拉懶惰，爾拉懶惰；箇拉話：『撥阿拉去祭耶和華。』」¹⁸ 難間爾拉去，做生活。弗撥爾拉麥稈，但是爾拉總要照數交代磚頭。

¹⁹ Yi-seh-lih ts-seng-go tsoh-deo t'ing-meng wô, Me-nyih tso-go cün-deo su-moh feh-k'eng kæn-loh, ziu hyiao-teh gyi-zi ziu-'æ.

¹⁹ 以色列子孫個作頭聽聞話：「每日做個磚頭數目弗肯減落」，就曉得其自受害。

²⁰ Li-k'æ Fah-lao tseo-c'ih-go z-'eo, k'eo-k'eo p'ong-djoh Mo-si Üô-leng lu-ka-li lih-tong. ²¹ Ziu teng gyi-lah wô, Dæn-nyün Yiæ-'o-wô k'en-k'en ng-lah, p'un-tön ng-lah, ing-we ng-lah s-teh ah-lah læ Fah-lao teng gyi dzing-ts-go ngæn-zin zah-ts'iu-go, yi pô tao kao-fu gyi siu-li sah-diao ah-lah.

²⁰ 離開法老走出個時候，扣扣碰着摩西、亞倫路街裏立東。²¹ 就等其拉話：「但願耶和華看看爾拉，判斷爾拉，因為爾拉使得阿拉來法老等其城子個眼前賊臭個，以把刀交付其手裏殺掉阿拉。」

²² Mo-si ziu tseo-cün, teng Yiæ-'o-wô wô, Cü, Ng dza-we 'æ keh-go pah-sing? dza-we ts'a ngô? ²³ Z dzong ngô kyin Fah-lao, k'ao-djoh Ng-go ming-deo, teng gyi kông ts-'eo, gyi yü-kô bao-nyiah keh-go pah-sing; Ng ih-ngæn m-neh kyiu Ng-go pah-sing.

²² 摩西就走轉，等耶和華話：「主，爾咋會害箇個百姓？咋會差我？」²³ 自從我見法老，靠着爾個名頭，等其講之後，其愈加暴虐箇個百姓。爾一眼嚟得救爾個百姓。」

C. VI.

YIÆ-'O-WÔ teng Mo-si wô, Ngô sô iao tso-peh Fah-lao-go, ng pih-ding we k'en-kyin; ing-we yüong neng-ken-go siu gyi we fông pah-sing ky'i, ping-ts'ia yüong neng-ken-go siu gyi we ken gyi-lah c'ih gyi-go di-fông.

耶和華等摩西話：「我所要做撥法老個，爾必定會看見。因為用能幹個手其會放百姓去，並且用能幹個手其會趕其拉出其個地方。」

² Jing-ming yi teng Mo-si kông, z-ka wô, Ngô z YIÆ-'O-WÔ. ³ Zông-zin ngô yüong Djün-neng Jing-ming-go ming-deo hyin-c'ih peh Üô-pah-lah-hen, Yi-sah, Yüô-koh; dæn-z yüong Ngô-go ming-deo YIÆ-'O-WÔ, gyi-lah wa feh-hyiao-teh Ngô. ⁴ Ngô yi teng gyi-lah shih-lih Ngô-go iah, s-peh gyi-lah sô tæ-n-koh-go Kyüô-nen, ziu-z zin-deo gyi tso c'ih-meng nying-go di-fông. ⁵ Næn-kæn Yiæ-gyih nying bao-nyiah Yi-seh-lih ts-seng, Ngô yi-kying t'ing-meng gyi t'æn-ky'i: Ngô yia kyî-teh Ngô-go iah. ⁶ Sô-yi ng hao teng Yi-seh-lih ts-seng wô, Ngô z Yiæ-'o-wô; Ngô we kyiu ng-lah t'eh-c'ih Yiæ-gyih nying-go djong-tæn, fông ng-lah hyih-kong; yia we sing-c'ih siu læ, yüong djong-djong ying-vah, c'ü-joh ng-lah. ⁷ Ping-ts'ia Ngô kæn ng-lah tso Ngô-go pah-sing, Ngô tso ng-go Jing-ming: ka-ni ng we hyiao-teh Ngô z Yiæ-'o-wô, ng-go Jing-ming, ziu-z kyiu ng t'eh-c'ih Yiæ-gyih nying djong-tæn-go. ⁸ Ngô zin-deo sô vah-tsiu s-peh Üô-pah-lah-hen Yi-sah Yüô-koh-go di-fông, Ngô pih-ding ling ng-lah tseo-tao, peh ng-lah tso ts'æn-nyih: Ngô z Yiæ-'o-wô. ⁹ Mo-si z-ka wô hyiang Yi-seh-lih ts-seng dao; dæn-z gyi-lah we-leh sing-li pe-sông ting kw'u-go djong-tæn, feh t'ing-dzong Mo-si.

² 神明又等摩西講，是介話：「我是耶和華。」³ 上前我用全能神明個名頭顯出撥亞伯拉罕、以撒、雅各；但是我個名頭耶和華，其拉還弗曉得我。⁴ 我又等其拉設立我個約，賜撥其拉所耽擱個迦南，就是前頭其做出門人個地方。⁵ 難間埃及人暴虐以色列子孫，我已經聽聞其嘆氣；我也記得我個約。⁶ 所以爾好等以色列子孫話：『我是耶和華。我會救爾拉脫出埃及人個重擔，放爾拉歇工；也會伸出手來，用重重刑罰，取贖爾拉。⁷ 並且我揀爾拉做我個百姓，我做爾個神明。介呢爾會曉得我是耶和華，爾個神明，就是救爾脫出埃及人重擔個。⁸ 我前頭所罰咒賜撥亞伯拉罕、以撒、雅各個地方，我必定領爾拉走到，撥爾拉做產業。我是耶和華。』⁹ 摩西是介話向以色列子孫道。但是其拉爲了心裏悲傷頂苦個重擔，弗聽從摩西。

¹⁰ Yiæ-'o-wô yi teng Mo-si wô, ¹¹ Ng ky'i tseo-ming Yiæ-gyih wông Fah-lao, eo gyi fông Yi-seh-lih ts-seng tseo-c'ih gyi-go di-fông. ¹² Mo-si læ Yiæ-'o-wô min-zin wô, Yi-seh-lih ts-seng wa feh t'ing ngô, næn-dao Fah-lao k'eng t'ing ngô, ziu-z cü-jing m-neh ziu tsiu-keh go nying ma? ¹³ Yiæ-'o-wô teng Mo-si Üô-leng kông, eo gyi-lah feng-fu Yi-seh-lih nying teng Yiæ-gyih wông Fah-lao, hao ling Yi-seh-lih ts-seng c'ih Yiæ-gyih di-fông.

¹⁰ 耶和華又等摩西話，¹¹ 「爾去奏明埃及王法老，謳其放以色列子孫走出其個地方。」¹² 摩西來耶和華面前話：「以色列子孫還弗聽我，難道法老肯聽我，就是嘴脣嚙得受周割個人嗎？」¹³ 耶和華等摩西、亞倫講，謳其拉吩咐以色列人等埃及王法老，好領以色列子孫出埃及地方。

¹⁴ Keh-sing cong-dzoh li-hyang tso deo-go læ 'ô-veng; Yi-seh-lih do ng-ts Liu-bin sô sang-go, Ha-noh, Fah-lu, Hyi-s-leng, Kyüô-mi. Keh-sing z Liu-bin-go vông-veng. ¹⁵ Si-min-go ng-ts, Yiæ-meo-li, Yüô-ming, O-'eh, Yüô-kying, So-'eh, teng Kyüô-nen nyü-nying sô sang-go Siao-lo. Keh-sing z Si-min-go vông-veng. ¹⁶ Li-vi ng-ts-go ming-z, tsiao gyi-lah shü-dæ, læ 'ô-veng; Keh-jing, Ko-'eh, Mi-lah-li. Li-vi-go ziu-shü ih-pah sæn-jih-ts'ih shü. ¹⁷ Keh-jing-go ng-ts, Lih-nyi, Z-me, tsiao gyi-lah vông-veng. ¹⁸ Ko-'eh-go ng-ts, En-læn, Yi-s-ha, Hyi-pah-leng, U-sih. Ko-'eh-go ziu-shü ih-pah sæn-jih-sæn shü. ¹⁹ Mi-lah-li-go ng-ts, Meh-li, Meo-z. Keh-sing z Li-vi-go ts-seng tsiao gyi-lah-go shü-dæ. ²⁰ En-læn c'ü gyi ah-kwu lah-kyi-bih tso ts'i-ts; gyi sang Üô-leng; Mo-si peh En-læn. En-læn-go ziu-shü ih-pah sæn-jih-ts'ih shü. ²¹ Yi-s-ha-go ng-ts K'o-lah, Nyi-feh, Seh-li. ²² U-sih-go ng-ts, Mi-sô-li, Yi-li-sah-fæn, Seh-li. ²³ Üô-leng c'ü Üô-mi-nô-dah-go nön, Nô-jing-go tsi-me, Yi-li-sô-pô tso ts'i-ts; gyi sang Nô-tah, Üô-pi-wu, Yi-li-üô-sah, Yi-da-mô peh Üô-leng. ²⁴ K'o-lah-go ng-ts, Üô-sih, Yi-li-kyüô-nô, Üô-pi-üô-sah: keh-sing z K'o-lah-go vông-veng. ²⁵ Üô-leng-go ng-ts Yi-li-üô-sah c'ü Bu-t'ih nön li-hyang ih-go tso ts'i-ts; gyi sang Fi-nyi-ha. Keh-sing z Li-vi nying tsu-tsong tso deo-go, tsiao gyi-lah vông-

veng. ²⁶ Keh Üô-leng Mo-si z vong Yiæ-'o-wô 'ao-ling ling Yi-seh-lih ts-seng, tsiao gyi-lah-go ping-de c'ih Yiæ-gyih di-fông-go. ²⁷ Teng Yiæ-gyih wông Fah-lao wô, Ling Yi-seh-lih ts-seng c'ih Yiæ-gyih-go, ziu-z keh-go Mo-si Üô-leng.

¹⁴ 箇星衆族裏向做頭個來下文。以色列大兒子流便所生個，哈諾、法路、希斯倫、迦米。箇星是流便個房份。

¹⁵ 西緬個兒子，耶母利、雅憫、阿轄、雅斤、瑣轄、等迦南女人所生個少羅。箇星是西緬個房份。¹⁶ 利未兒子個名字，照其拉世代，來下文。革順、哥轄、米拉利。利未個壽歲一百三十七歲。¹⁷ 革順個兒子，立尼、示每，照其拉房份。¹⁸ 哥轄個兒子，暗蘭、以斯哈、希伯崙、烏薛。哥轄個壽歲一百三十三歲。¹⁹ 米拉利個兒子，抹利、母示。箇星是利未個子孫照其拉個世代。²⁰ 暗蘭娶其阿姑約基別做妻子。其生亞倫、摩西撥暗蘭。暗蘭個壽歲一百三十七歲。²¹ 以斯哈個兒子可拉、尼弗、色利。²² 烏薛個兒子，米沙利、以利撒反、色利。²³ 亞倫娶亞米拿達個囡、拿順個姊妹、以利沙巴做妻子。其生拿搭、亞比戶、以利亞撒、以大瑪撥亞倫。²⁴ 可拉個兒子，亞惜、以利加拿、亞比亞撒。箇星是可拉個房份。²⁵ 亞倫個兒子以利亞撒娶部鐵囡裏向一個做妻子。其生非尼哈。箇星是利未人祖宗做頭個，照其拉房份。²⁶ 箇亞倫、摩西是奉耶和華號令領以色列子孫，照其拉個兵隊出埃及地方個。²⁷ 等埃及王法老話：「領以色列子孫出埃及個，就是箇個摩西、亞倫。」

²⁸ Yiæ-'o-wô læ Yiæ-gyih di-fông teng Mo-si kông-go z-'eo, ²⁹ Yiæ-'o-wô feng-fu Mo-si wô, Ngô z Yiæ-'o-wô; Ngô teng ng sô kông-go, ng tu wô hyiang Yiæ-gyih wông Fah-lao dao. ³⁰ Mo-si læ Yiæ-'o-wô min-zin wô, Ngô-go cū-jing m-neh tsiu-keh; Fah-lao næn-dao k'eng t'ing ngô ma?

²⁸ 耶和華來埃及地方等摩西講個時候，²⁹ 耶和華吩咐摩西話：「我是耶和華。我等爾所講個，爾都話向埃及王法老道。」³⁰ 摩西來耶和華面前話：「我個嘴脣嚟得周割。法老難道肯聽我嗎？」

C. VII.

YIÆ-'O-WÔ teng Mo-si wô, Ng k'en, Ngô shih-lih ng læ Fah-lao min-zin tso Jing-ming: Ng ah-ko Üô-leng we tso ng-go sin-cū-nying. ² Væn-pah Ngô feng-fu ng go, ng tsong iao kông, ng ah-ko Üô-leng we wô hyiang Fah-lao dao, hao fông Yi-seh-lih ts-seng tseo-c'ih gyi-go di-ka. ³ Ngô we ngang Fah-lao-go sing, yia we tso hyü-to ziao-deo teng gyi-z læ Yiæ-gyih di-fông. ⁴ Dæn-z Fah-lao pih-ding feh-k'eng t'ing ng, s-teh Ngô! hao læ Yiæ-gyih dong-siu, yüong djong-djong ying-vah, ling Ngô-go ping-de, ziu-z ngô pah-sing Yi-seh-lih ts-seng, tseo-c'ih Yiæ-gyih di-fông. ⁵ Ngô siu sing-c'ih læ Yiæ-gyih, ling Yi-seh-lih ts-seng c'ih gyi-lah cong-nyiang, ka z-'eo Yiæ-gyih nying we hyiao-teh Ngô z Yiæ-'o-wô. ⁶ Mo-si teng Üô-leng i Yiæ-'o-wô-go feng-fu, ziu-z-ka tso. ⁷ Teng Fah-lao kông-go z-'eo, Mo-si nyin-kyi yi-kying pah-jih shü, Üô-leng nyin-kyi pah-jih-sæn shü.

耶和華等摩西話：「爾看，我設立爾來法老面前做神明。爾阿哥亞倫會做爾個先知人。² 凡百我吩咐爾個，爾總要講，爾阿哥亞倫會話向法老道，好放以色列子孫走出其個地界。³ 我會硬法老個心，也會做許多兆頭等奇事來埃及地方。⁴ 但是法老必定弗肯聽爾，使得我好來埃及動手，用重重刑罰，領我個兵隊，就是我百姓以色列子孫，走出埃及地方。⁵ 我手伸出來埃及，領以色列子孫出其拉中央，介時候埃及人會曉得我是耶和華。」⁶ 摩西等亞倫依耶和華個吩咐，就是介做。⁷ 等法老講個時候，摩西年紀已經八十歲，亞倫年紀八十三歲。

⁸ Yiæ-'o-wô feng-fu Mo-si, wô, ⁹ Ziah-z Fah-lao teng ng-lah wô, Ng tso gyi-z; ka-ni ng hao teng Üô-leng wô, Do ng kwa-dziang, tiu læ Fah-lao min-zin; keh kwa-dziang ziu we pin tso dzô. ¹⁰ Mo-si Üô-leng tseo-tsing ky'i kyin Fah-lao, tsiao Yiæ-'o-wô-go feng-fu ka tso: Üô-leng tiu kwa-dziang læ Fah-lao min-zin, teng gyi keh-sing dzing-ts min-zin: kwa-dziang ziu pin tso dzô. ¹¹ Fah-lao ziu eo-long ts'ong-ming nying, teng 'ang zia-jih go; gyi-lah ziu-z Yiæ-gyih-go poh-lao, pô gyi-go fah-jih yia z-ka tso. ¹² Koh-nying tiu gyi kwa-dziang, long-tsong pin tso dzô; dæn-z Üô-leng-go kwa-dziang t'eng-ky'üoh gyi-lah-go kwa-dziang. ¹³ Tsih-z Fah-lao-go sing ngang, feh-k'eng t'ing gyi-lah, tsing-ziang Yiæ-'o-wô sô kông ka.

⁸ 耶和華吩咐摩西，話，⁹ 「若是法老等爾拉話，爾做奇事。介呢爾好等亞倫話：『馱爾拐杖，丟來法老面前。箇拐杖就會變做蛇。』」¹⁰ 摩西、亞倫走進去看法老，照耶和華個吩咐介做。亞倫丟拐杖來法老面前，等其箇星臣子面前。拐杖就變做蛇。¹¹ 法老就謳攏聰明人、等行邪術個。其拉就是埃及個博老，把其個法術也是介做。¹² 各人丟其拐杖，攏總變做蛇。但是亞倫個拐杖吞喫其拉個拐杖。¹³ 只是法老個心硬，弗肯聽其拉，正像耶和華所講介。

¹⁴ Yiæ-'o-wô teng Mo-si wô, Fah-lao-go sing ngang, feh-k'eng fông pah-sing ky'i. ¹⁵ Ming-tsiao t'in-nyiang ng ky'i kyin Fah-lao: gyi we tseo-c'ih tao 'o-yin; ng læ 'o-pin-yin teng-'eo gyi, siu-li nyiah-leh zin-deo pin dzô-go kwa-dziang. ¹⁶ Ng hao teng gyi wô, Hyi-pah-læ nying-go Jing-ming Yiæ-'o-wô ts'a ngô kyin ng, z-ka wô, Fông Ngô pah-sing ky'i, hao læ kw'ông-iæ-li voh-z Ngô; tao jü-kying ng wa feh-k'eng t'ing. ¹⁷ Yiæ-'o-wô z-ka wô, We-leh keh-go z-ken ng hao hyiao-teh ngô z Yiæ-'o-wô: ngô pô siu-li nyiah-go kwa-dziang tang 'o-li-go shü: shü pih-ding pin tso hyüih. ¹⁸ 'O-li-go ng tu we si, 'o yia we zah-ts'iu: keh 'o-li-go shü Yiæ-gyih nying pih-ding ky'üoh-feh-læ. ¹⁹ Yiæ-'o-wô teng Mo-si wô, Teng Üô-leng wô, Do ng kwa-dziang, sing-c'ih siu læ Yiæ-gyih keh-sing shü-go zông-deo; ziu-z gyi-lah kông, 'o, dzi, teng væn-pah shü jü-long-go di-fông, s-teh gyi pin-tso hyüih; ping-ts'ia 'en Yiæ-gyih koh jü-moh zah-deo ky'i-ming cong-nyiang tao-c'ü yiu hyüih. ²⁰ Mo-si Üô-leng tsiao Yiæ-'o-wô-go feng-fu ka tso; do-ky'i kwa-dziang tang 'o-li-go shü, læ Fah-lao min-zin, teng gyi dzing-ts-go min-zin: 'o-li-go shü tu pin tso hyüih. ²¹ 'O-li-go ng si-de: 'o yia zah-ts'iu-de; 'o-li-go shü Yiæ-gyih nying tu ky'üoh-feh-læ: ping-ts'ia 'en Yiæ-gyih koh tao-c'ü yiu hyüih. ²² Keh-tsao Yiæ-gyih-go poh-lao yüong gyi-lah fah-jih yia z-ka tso; Fah-lao-go sing ngang, feh-k'eng t'ing gyi-lah, tsing-ziang Yiæ-'o-wô sô kông ka-go. ²³ Fah-lao tseo-cün wông-kong li-hyang, yia feh liu-sing keh-go z-ken. ²⁴ Yiæ-gyih nying, ing-we 'o-li-go shü ky'üoh-feh-læ, keh-lah læ 'o-pin-yin dön-ky'ün læ-kæn gyüih-loh-ky'i, zing shü ky'üoh. ²⁵ Yiæ-'o-wô tang 'o ts-'eo, ko-leh ts'ih nyih.

¹⁴ 耶和華等摩西話：「法老個心硬，弗肯放百姓去。¹⁵ 明朝天亮爾去見法老。其會走出到河沿。爾來河邊沿等候其，手裏捏勒前頭變蛇個拐杖。¹⁶ 爾好等其話：『希伯來人個神明耶和華差我見爾，是介話：「放我百姓去，好來曠野裏服侍我。」到如今爾還弗肯聽。¹⁷ 耶和華是介話：「爲了箇個事幹爾好曉得我是耶和華。我把手裏捏個拐杖打河裏個水。水必定變做血。¹⁸ 河裏個魚都會死，河也會賊臭。箇河裏個水埃及人必定喫弗來。』」¹⁹ 耶和華等摩西話：「等亞倫話：『馱爾拐杖，伸出手來埃及箇星水個上頭，就是其拉江、河、池、等凡百水聚攏個地方，使得其變做血。並且咸埃及國樹木石頭器皿中央到處有血。』」²⁰ 摩西、亞倫照耶和華個吩咐介做。馱去拐杖打河裏個水，來法老面前、等其臣子個面前。河裏個水都變做血。²¹ 河裏個魚死了。河也賊臭了。河裏個水埃及人都喫弗來。並且咸埃及國到處有血。²² 箇遭埃及個博老用其拉法術也是介做。法老個心硬，弗肯聽

其拉，正像耶和華所講介個。²³ 法老走轉王宮裏向，也弗留心箇個事幹。²⁴ 埃及人，因為河裏個水喫弗來，箇拉來河邊沿團圈來間掘落去，尋水喫。²⁵ 耶和華打河之後，過了七日。

C. VIII.

YIÆ-'O-WÔ teng Mo-si wô, Ng ky'i kyin Fah-lao, teng gyi wô, Yiæ-'o-wô z-ka wô, Fông Ngô pah-sing ky'i, hao voh-z Ngô. ² Ng ziah-z feh-k'eng fông gyi-lah, Ngô pih-ding we s-teh ts'ing-wô ts'ao-ziao ng dön-ky'ün-go di-ka. ³ 'O-li we sang hyü-to ts'ing-wô, zông-læ tseo-tsing ng oh-li, teng ng kw'eng-go vông-li, ng-go min-zông keh-sing; yia tseo-tsing ng dzing-ts pah-sing-go oh-li, teng ng-go fong-lu: lin nyüoh min-feng-go ky'i-ming. ⁴ Ts'ing-wô yia we læ ng-go sing-zông, teng ng-go pah-sing lin long-tsong dzing-ts. ⁵ Yiæ-'o-wô feng-fu Mo-si, Teng Üô-leng wô, Ng nyiah-leh kwa-dziang, siu sing-c'ih læ kông, 'o, dzi-go zông-teng, s-teh ts'ing-wô tseo-zông Yiæ-gyih di-fông. ⁶ Üô-leng ziu sing-c'ih siu læ Yiæ-gyih keh-sing shü-go zông-teng: ts'ing-wô ziu tseo-zông, c'ong-mun 'en Yiæ-gyih di-fông. ⁷ Poh-lao yüong gyi fah-jih yia z-ka tso, s-teh ts'ing-wô tseo-zông 'en Yiæ-gyih koh. ⁸ Keh-tsao Fah-lao eo Mo-si Üô-leng, wô, Ng gyiu Yiæ-'o-wô, djü-diao ts'ing-wô li-k'æ ngô, teng ngô-go pah-sing; ngô we fông-c'ih pah-sing ky'i tsi Yiæ-'o-wô. ⁹ Mo-si teng Fah-lao wô, Ts'ing ng, ding peh ngô soh-go z-'eo hao we-leh ng, teng ng dzing-ts pah-sing, gyiu Gyi djü-diao ts'ing-wô li-k'æ ng, teng ng oh-li, s-teh tæen-tsih læ 'o-li dzing-loh-tong. ¹⁰ Gyi wô, Ming-tsiao. Mo-si wô, Tsiao ng-go shih-wô hao s-teh; peh ng hyiao-teh m-yiu ziang ah-lah-go Jing-ming Yiæ-'o-wô ka-go. ¹¹ Ts'ing-wô pih-ding we li-k'æ ng, teng ng oh-li, lin ng-go dzing-ts, ng-go pah-sing; tæen-tsih læ 'o-li dzing-loh-tong. ¹² Mo-si teng Üô-leng li-k'æ Fah-lao tseo-c'ih: Mo-si gyiu-k'eng Yiæ-'o-wô we-leh Gyi sô ying tao Fah-lao di-fông-go ts'ing-wô. ¹³ Yiæ-'o-wô tsiao Mo-si sô kông ka tso: væn-pah læ oh-li, læ ming-dông, læ din-li-go ts'ing-wô, long-tsong si-de. ¹⁴ Cong-nying siu-gyi-long te-tang-te; keh di-fông tu zah-ts'iu-de. ¹⁵ Fah-lao k'en-kyin yi-kying kw'un-s-de, ziu ngang zi-go sing, feh-k'eng t'ing-dzong gyi-lah: ziang Yiæ-'o-wô sô wô ka-go.

耶和華等摩西話：「爾去見法老，等其話：『耶和華是介話：「放我百姓去，好服侍我。」² 爾若是弗肯放其拉，我必定會使得青蛙吵擾爾團圈個地界。³ 河裏會生許多青蛙，上來走進爾屋裏、等爾睏個房裏、爾個眠牀箇星；也走進爾臣子百姓個屋裏、等爾個風爐、連肉麪粉個器皿。⁴ 青蛙也會來爾個身上、等爾個百姓、連攏總臣子。』」⁵ 耶和華吩咐摩西：「等亞倫話：『爾捏勒拐杖，手伸出來江、河、池個上頂，使得青蛙走上埃及地方。』」⁶ 亞倫就伸出手來埃及箇星水個上頂。青蛙就走上，充滿咸埃及地方。⁷ 博老用其法術也是介做，使得青蛙走上咸埃及國。⁸ 箇遭法老譴摩西、亞倫，話：「爾求耶和華，除掉青蛙離開我，等我個百姓。我會放出百姓去祭耶和華。」⁹ 摩西等法老話：「請爾，定撥我啥個時候好爲了爾、等爾臣子百姓，求其除掉青蛙離開爾、等爾屋裏，使得單只來河裏剩落東。」¹⁰ 其話：「明朝。」摩西話：「照爾個說話好使得。撥爾曉得嚟有像阿拉個神明耶和華介個。」¹¹ 青蛙必定會離開爾、等爾屋裏、連爾個臣子、爾個百姓。單只來河裏剩落東。」¹² 摩西等亞倫離開法老走出。摩西求懇耶和華，爲了其所引到法老地方個青蛙。¹³ 耶和華照摩西所講介做。凡百來屋裏、來明堂、來田裏個青蛙，攏總死了。¹⁴ 衆人收其攏堆打堆。箇地方都賊臭了。¹⁵ 法老看見已經寬弛了，就硬自個心，弗肯聽從其拉，像耶和華所話介個。

¹⁶ Yiæ-'o-wô feng-fu Mo-si, Teng Üô-leng wô, Do-ky'i ng-go kwa-dziang, tang di-t'u-go hwe-dzing, s-teh gyi pin-tso seh læ 'en Yiæ-gyih di-fông. ¹⁷ Gyi-lah ziu-z-ka tso; Üô-leng do-leh kwa-dziang sing-c'ih siu læ, tang di-t'u-go hwe-dzing, ziu pin-tso seh læ nying teng sang-k'eo-go sing-zông: keh di-t'u-go hwe-dzing tu pin-

tso seh læ 'en Yïæ-gyih di-fông. ¹⁸ Poh-lao yüong fah-jih yia z-ka tso, iao pin-tso seh, pin-feh-læ: z-ka yiu seh læ nying teng sang-k'eo-go sing-zông. ¹⁹ Poh-lao teng Fah-lao wô, Keh z Jing-ming-go siu-dôn: Fah-lao sing ngang, feh-k'eng t'ing-dzong gyi-lah, ziang Yïæ-'o-wô sô wô ka-go.

¹⁶ 耶和華吩咐摩西：「等亞倫話：『馱起爾個拐杖，打地土個灰塵，使得其變做蟲來咸埃及地方。』」¹⁷ 其拉就是介做。亞倫馱勒拐杖伸出手來，打地土個灰塵，就變做蟲來人等牲口個身上。箇地土個灰塵都變做蟲來咸埃及地方。¹⁸ 博老用法術也是介做，要變做蟲，變弗來。是介有蟲來人等牲口個身上。¹⁹ 博老等法老話：「箇是神明個手段。」法老心硬，弗肯聽從其拉，像耶和華所話介個。

²⁰ Yïæ-'o-wô teng Mo-si wô, Ng ming-tsiao tsao t'in-nyiang ky'i-læ, Fah-lao we tseo-c'ih tao shü pin-yin. Ng lih-læ gyi min-zin, teng gyi wô, Yïæ-'o-wô wô, Fông Ngô pah-sing ky'i hao voh-z Ngô. ²¹ Ziah-z feh-k'eng fông Ngô pah-sing ky'i, Ngô pih-ding ts'a dziao tang dziao ts'ông-ing 'æ ng, teng ng dzing-ts pah-sing, lin ng-go oh-li: keh-sing dziao tang dziao ts'ông-ing, we c'ong-mun Yïæ-gyih nying-go oh-li, teng gyi-lah sô læ-kæn-go di-fông. ²² Keh-nyih Ngô we feng-pih Ngô pah-sing sô deng-kæn-go Ko-sæn di-fông: læ keh-deo m-neh ts'ông-ing, s-teh ng hao hyiao-teh læ 'en-t'in-'ô cong-nyiang Ngô z Yïæ-'o-wô. ²³ Ngô we feng-pih ng-go pah-sing teng Ngô-go pah-sing: ming-tsiao pih ding yiu keh-go ziao-deo. ²⁴ Yïæ-'o-wô ziu-z ka tso; ziu yiu hyü-to dziao-su ts'ông-ing fi-tsing Fah-lao oh-li, teng gyi dzing-ts-go oh-li, lin 'en Yïæ-gyih koh: keh di-fông we-leh dziao tang dziao ts'ông-ing wæ-diao-de. ²⁵ Fah-lao eo Mo-si Üô-leng, wô, Ng ky'i, hao læ ts'-di tsi ng-go Jing-ming. ²⁶ Mo-si wô, Feh k'o-yi ka tso: ing-we ah-lah yüong Yïæ-gyih nying k'o-u-go tong-si tsi ah-lah Jing-ming Yïæ-'o-wô. Ziah-z ah-lah læ Yïæ-gyih nying-go ngæn-zin yüong gyi k'o-u-go tong-si hyin-tsi, gyi-lah næn-dao feh do zah-deo k'ang ah-lah ma? ²⁷ Ah-lah tsong iao tao kw'ông-iæ-li tseo-leh sæn-nyih-go lu-dzing, tsi ah-lah-go Jing-ming Yïæ-'o-wô, tsiao gyi sô feng-fu ah-lah-go. ²⁸ Fah-lao wô, Ngô we fông ng ky'i tao kw'ông-iæ-li tsi ng-go Jing-ming Yïæ-'o-wô; tsih-z ng feh-k'o tseo-yün. Ts'ing ng, we-leh ngô gyiu-gyiu. ²⁹ Mo-si wô, Næn-kæn ngô li-k'æ ng, tseo-c'ih-ky'i gyiu Yïæ-'o-wô, s-teh dziao tang dziao ts'ông-ing ming-tsiao li-k'æ Fah-lao, yia li-k'æ ng-go dzing-ts pah-sing: dæn-z Fah-lao m-nao tsæ hong-p'in, feh-k'eng fông pah-sing ky'i tsi Yïæ-'o-wô. ³⁰ Mo-si ziu tseo-c'ih li-k'æ Fah-lao, ky'i gyiu Yïæ-'o-wô. ³¹ Yïæ-'o-wô i Mo-si shih-wô ka tso; djü-diao dziao tang dziao ts'ông-ing li-k'æ Fah-lao, yia li-k'æ gyi dzing-ts pah-sing; m-yiu ih-go dzing-loh. ³² Ka z-'eo Fah-lao dzing-gyiu ngang zi-go sing, feh-k'eng fông pah-sing ky'i.

²⁰ 耶和華等摩西話：「爾明朝早天亮起來，法老會走出到水邊沿。爾立來其面前，等其話：『耶和華話：「放我百姓去好服侍我。」』」²¹ 若是弗肯放我百姓去，我必定差潮打潮蒼蠅害爾、等爾臣子百姓、連爾個屋裏。箇星潮打潮蒼蠅，會充滿埃及人個屋裏、等其拉所來間個地方。²² 箇日我會分別我百姓所庇間個歌珊地方。來箇頭嚟得蒼蠅，使得爾好曉得來咸天下中央我是耶和華。²³ 我會分別爾個百姓等我個百姓。明朝必定有箇個兆頭。』」²⁴ 耶和華就是介做。就有許多潮數蒼蠅飛進法老屋裏、等其臣子個屋裏、連咸埃及國。箇地方爲了潮打潮蒼蠅壞掉了。²⁵ 法老謳摩西、亞倫，話：「爾去，好來此地祭爾個神明。」²⁶ 摩西話：「弗可以介做。因爲阿拉用埃及人可惡個東西祭阿拉神明耶和華。若是阿拉來埃及人個眼前用其可惡個東西獻祭，其拉難道弗馱石頭搭阿拉嗎？」²⁷ 阿拉總要到曠野裏走勒三日個路程，祭阿拉個神明耶和華，照其所吩咐阿拉個。」²⁸ 法老話：「我會放爾去到曠野裏祭爾個神明耶和華。只是爾弗可走遠。請爾，爲了我求求。」²⁹ 摩西話：「難間我離開爾，走出去求耶和華，使得潮打潮蒼蠅明朝離開法老，也離開爾個臣子百姓。但是法老嚟得好再哄騙，弗肯放百姓去祭耶和華。」³⁰ 摩西就走出離開法老，去求耶和華。³¹ 耶和華依摩西說話介做。除掉潮打潮蒼蠅離開法老，也離開其臣子百姓。嚟有一個剩落。³² 介時候法老仍舊硬自個心，弗肯放百姓去。

C. IX.

YIÆ-'O-WÔ teng Mo-si wô, Ng tseo-ky'i kyin Fah-lao, teng gyi wô, Hyi-pah-læ nying-go Jing-ming YIÆ-'o-wô z-ka wô, Fông Ngô pah-sing ky'i hao voh-z Ngô. ² Ziah-z feh-k'eng fông, dzing-gyiu ngang-liu gyi-lah, ³ ka-ni, YIÆ-'o-wô we dong-siu læ ng din-li sang-k'eo-go sing-zông, ziu-z mô, li-ts, loh-do, ngeo, yiang keh-sing; pih-ding yiu djong-djong-go wëng-yüoh. ⁴ YIÆ-'o-wô we feng-pih? Yi-seh-lih-go sang-k'eo teng YIÆ-gyih-go sang-k'eo: væn-pah joh-ü Yi-seh-lih ts-seng-go tu feh we si. ⁵ YIÆ-'o-wô ziu ding ih-go nyih-ts, wô, Ming-tsiao YIÆ-'o-wô we læ ts'-di tso keh-go z-ken. ⁶ Tao di-nyi-nyih YIÆ-'o-wô ziu-z ka tso; YIÆ-gyih keh-sing sang-k'eo long-tsang si-de; tsih-yiu Yi-seh-lih ts-seng-go sang-k'eo ih-tsah tu m-neh si. ⁷ Fah-lao ts'a nying ky'i k'en Yi-seh-lih ts-seng-go sang-k'eo, ko-jün ih-tsah tu m-neh si: dæn-z Fah-lao dzing-gyiu sing ngang, feh-k'eng fông pah-sing ky'i.

耶和華等摩西話：「爾走去見法老，等其話：『希伯來人個神明耶和華是介話：「放我百姓去好服侍我。² 若是弗肯放，仍舊硬留其拉，³ 介呢，耶和華會動手來爾田裏牲口個身上，就是馬、驢子、駱駝、牛、羊箇星。必定有重重個瘟疫。⁴ 耶和華會分別以色列個牲口等埃及個牲口。凡百屬於以色列子孫個都弗會死。』」⁵ 耶和華就定一個日子，話：「明朝耶和華會來此地做箇個事幹。」⁶ 到第二日耶和華就是介做。埃及箇星牲口攏總死了。只有以色列子孫個牲口一隻都嘸得死。⁷ 法老差人去看以色列子孫個牲口，果然一隻都嘸得死。但是法老仍舊心硬，弗肯放百姓去。

⁸ YIÆ-'o-wô teng Mo-si Üô-leng wô, Ng-lah do fong-lu-li hwe ih-pô, s-teh Mo-si læ Fah-lao min-zin, dziao t'in sæn-k'æ-ky'i; ⁹ Ziu we pin-tso hwe-dzing læ 'en YIÆ-gyih di-fông: læ YIÆ-gyih koh dön-ky'ün-go nying teng sang-k'eo-go sing-zông fah-c'ih ts'ông-doh læ. ¹⁰ Gyi-lah ziu do fong-lu-li hwe, lih-læ Fah-lao min-zin; Mo-si dziao t'in sæn-k'æ-ky'i: ziu yiu ts'ông-doh fah-c'ih læ nying teng sang-k'eo-go sing-zông. ¹¹ Poh-lao we-leh sang ts'ông-go yün-kwu, feh-neng-keo lih-læ Mo-si min-zin: ing-we poh-lao teng YIÆ-gyih-go cong-nying tu sang ts'ông-doh. ¹² YIÆ-'o-wô ngang Fah-lao-go sing, s-teh feh-k'eng t'ing gyi-lah, ziang YIÆ-'o-wô teng Mo-si sô kông ka-go.

⁸ 耶和華等摩西、亞倫話：「爾拉馱風爐裏灰一把，使得摩西來法老面前，朝天散開去。⁹ 就會變做灰塵來咸埃及地方。來埃及國團圈個人等牲口個身上發出瘡毒來。」¹⁰ 其拉就馱風爐裏灰，立來法老面前。摩西朝天散開去。就有瘡毒發出來人等牲口個身上。¹¹ 博老爲了生瘡個緣故，弗能夠立來摩西面前。因爲博老等埃及個衆人都生瘡毒。¹² 耶和華硬法老個心，使得弗肯聽其拉，像耶和華等摩西所講介個。

¹³ YIÆ-'o-wô teng Mo-si wô, Tsao t'in-nyiang ky'i-læ, lih-læ Fah-lao min-zin, teng gyi wô, Hyi-pah-læ nying-go Jing-ming YIÆ-'o-wô z-ka wô, Fông Ngô pah-sing ky'i hao voh-z Ngô. ¹⁴ Ngô yin-dzæ we kông-loh hyü-to tsæ-næn læ ng-go sing-li, teng ng-go dzing-ts, ng-go pah-sing, peh ng hao hyiao-teh p'u-t'in-ò m-yiu ziang Ngô ka-go. ¹⁵ Ngô feh-jün iao sing-c'ih siu læ, yüong z-yüoh bing tang ng, teng ng-go pah-sing: ng pih-ding we dzong di-jiang-li djü-mih-diao: ¹⁶ dæn-z Ngô sô-yi peh ng hying-ky'i-læ, z deh-we iao hyiang ng hyin-c'ih Ngô-go neng-ken, yi hao læ pin-t'in-ò yiang-k'æ Ngô-go ming-sing. ¹⁷ Næn-kæn ng wa we zi kyiao ngao tsu-kah Ngô-go pah-sing feh-k'eng fông gyi-lah ky'i ma? ¹⁸ Ng k'en, ming-tsiao keh-go z-'eo, Ngô we loh ting djong-go boh-ts; dzong YIÆ-gyih k'æ-koh tao næn-kæn, m-yiu ziang keh-cong-ka. ¹⁹ Keh-lah ng ky'i ts'a nying siu-tsing ng-go sang-k'eo, teng din-li ih-ts'ih sô-yiu-go: ing-we væn-pah nying teng sang-k'eo læ din-

deo, feh-zing siu-tsing oh-li-go, boh-ts we loh læ gyi sing-zông, ziu tang-sah gyi-lah. ²⁰ Fah-lao dzing-ts cong-nyiang p'ô-gyü Yiæ-'o-wô shih-wô go, koh-nying eo gyi nu-boh teng sang-k'eo to-bi læ oh-li. ²¹ Tsih-yiu feh liu-sing Yiæ-'o-wô shih-wô go, dzing-loh gyi nu-boh teng sang-k'eo læ din-li. ²² Yiæ-'o-wô teng Mo-si wô, Sing-c'ih ng-go siu dziao-leh t'in, s-teh 'en Yiæ-gyih koh boh-ts loh læ nying, teng sang-k'eo, teng din-li keh-sing su-ts'æ-go zông-teng, ziu-z væn-pah læ Yiæ-gyih di-fông go. ²³ Mo-si ziu di-ky'i kwa-dziang hyiang-djoh t'in: Yiæ-'o-wô fah-c'ih le teng boh-ts; di-ying-li ho-kwông sin-læ sin-ky'i: z-ka Yiæ-'o-wô loh boh-ts læ Yiæ-gyih di-fông. ²⁴ Ziu yiu boh-ts, boh-ts kah-leh ho-kwông, p'ô-shü-shü-go; dzong k'æ-koh yi-læ 'en Yiæ-gyih di-fông m-yiu ziang keh-cong-ka. ²⁵ 'En Yiæ-gyih koh læ din-li-go nying teng sang-k'eo, boh-ts long-tsong tang gyi-lah: yi tang-diao din-li-go pah-ying su-ts'æ, ao-dön din-li-go pah-ying jü-moh. ²⁶ Tsih-yiu? Yi-seh-lih ts-seng deng-kæn-go Ko-sæn di-fông m-neh boh-ts. ²⁷ Fah-lao ts'a nying, eo Mo-si Üô-leng, teng gyi-lah wô, Ngô keh-tsao yiu ze: Yiæ-'o-wô z tsing-dzih-go: ngô teng ngô-go pah-sing z ôh-go. ²⁸ Ka keo-de; ts'ing ng gyiu Yiæ-'o-wô, m-nao tsæ fah do-do le teng boh-ts; ngô we fông ng-lah ky'i, feh tsæ liu ng-lah. ²⁹ Mo-si teng gyi wô, Ngô tseo-c'ih dzing-li, di-ky'i ngô-go siu hyiang-djoh Yiæ-'o-wô; le ziu we feh hyiang; boh-ts feh-we tsæ loh; s-teh ng hao hyiao-teh di z joh-ü Yiæ-'o-wô-go. ³⁰ Dæn-z ng teng ng-go dzing-ts, ngô hyiao-teh feh-k'eng p'ô-gyü Yiæ-'o-wô Jing-ming. ³¹ Ka z-'eo mô teng do-mah tu tang-diao-de: ing-we do-mah yi-kying kyih-be: mô yi-kying k'æ-hwô-de. ³² Tsih-yiu siao-mah teng ts'u-mah m-neh tang-diao, ing-we gyi feh-zing fah-c'ih-læ. ³³ Mo-si li-k'æ Fah-lao tseo-c'ih dzing-nga; di-ky'i! siu hyiang-djoh Yiæ-'o-wô, le teng boh-ts ziu hyih: yü yia feh tao-loh di-li. ³⁴ Fah-lao k'en-kyin yü, boh-ts, le yi-kying hyih-de, ziu yü-kô væn-ze, ngang zi-go sing; gyi-zi teng dzing-ts tu z-ka. ³⁵ Ka-ni Fah-lao sing ngang, feh-k'eng fông Yi-seh-lih ts-seng, ziang Yiæ-'o-wô t'oh Mo-si sô kông ka-go.

¹³ 耶和華等摩西話：「早天亮起來，立來法老面前，等其話：『希伯來人個神明耶和華是介話：「放我百姓去好服侍我。』¹⁴ 我現在會降落許多災難來爾個心裏、等爾個臣子、爾個百姓，撥爾好曉得普天下嚟有像我介個。¹⁵ 我弗然要伸出手來，用時疫病打爾、等爾個百姓。爾必定會從地垺裏除滅掉。¹⁶ 但是我所以撥爾興起來，是特為要向爾顯出我個能幹，又好來遍天下揚開我個名聲。¹⁷ 難間爾還會自驕傲阻隔我個百姓弗肯放其拉去嗎？¹⁸ 爾看，明朝箇個時候，我會落頂重個雹子。從埃及開國到難間，嚟有像箇種介。¹⁹ 箇拉爾去差人收進爾個牲口、等田裏一切所有個。因為凡百人等牲口來田頭，弗曾收進屋裏個，雹子會落來其身上，就打煞其拉。』²⁰ 法老臣子中央怕懼耶和華說話個，各人謳其奴僕等牲口躲避來屋裏。²¹ 只有弗留心耶和華說話個，剩落其奴僕等牲口來田裏。²² 耶和華等摩西話：「伸出爾個手朝勒天，使得咸埃及國雹子落來人、等牲口、等田裏箇星蔬菜個上頂，就是凡百來埃及地方個。」²³ 摩西就提起拐杖向着天。耶和華發出雷等雹子。地垺裏火光閃來閃去。是介耶和華落雹子來埃及地方。²⁴ 就有雹子，雹子夾勒火光，怕勢勢個。從開國以來咸埃及地方嚟有像箇種介。²⁵ 咸埃及國來田裏個人等牲口，雹子攏總打其拉。又打掉田裏個百樣蔬菜，拗斷田裏個百樣樹木。²⁶ 只有以色列子孫屯間箇歌珊地方嚟得雹子。²⁷ 法老差人，謳摩西、亞倫，等其拉話：「我箇遭有罪。耶和華是正直個。我等我個百姓是惡個。²⁸ 介夠了。請爾求耶和華，嚟得好再發大大雷等雹子。我會放爾拉去，弗再留爾拉。」²⁹ 摩西等其話：「我走出城裏，提起我個手向着耶和華。雷就會弗響。雹子弗會再落。使得爾好曉得地是屬於耶和華個。³⁰ 但是爾等爾個臣子，我曉得弗肯怕懼耶和華神明。」³¹ 介時候麻等大麥都打掉了。因為大麥已經結佩。麻已經開花了。³² 只有小麥等粗麥嚟得打掉，因為其弗曾發出來。³³ 摩西離開法老走出城外。提起

手向着耶和華。雷等電子就歇。雨也弗倒落地裏。³⁴ 法老看見雨、電子、雷已經歇了，就愈加犯罪，硬自個心。其自等臣子都是介。³⁵ 介呢法老心硬，弗肯放以色列子孫，像耶和華託摩西所講介個。

C. X.

YIÆ-'O-WÔ teng Mo-si wô, Ng tseo-tsing ky'i kyin Fah-lao; ing-we Ngô yi-kying ngang gyi-go sing teng dzing-ts-go sing, hao hyin-c'ih Ngô-go ziao-deo læ gyi-go cong-nyiang; ² s-teh ng pô Ngô læ Yiæ-gyih sô-tso-go z-ken, læ gyi-lah cong-nyiang sô hyin-c'ih-go ziao-deo, djün peh ng-go ts-seng ng-tô t'ing-meng; hao hyiao-teh Ngô z Yiæ-'o-wô. ³ Mo-si Üô-leng tseo-tao Fah-lao di-fông, teng gyi wô, Hyi-pah-læ nying-go Jing-ming Yiæ-'o-wô z-ka wô, Ng feh-k'eng ti-sing siao-i læ Ngô-go min-zin, tao kyi-z ni? yüong fông Ngô pah-sing ky'i hao voh-z Ngô. ⁴ Ziah-z feh-k'eng fông Ngô pah-sing ky'i, ming-tsiao Ngô we s-teh wông-djong tseo-tsing ng-go di-ka: ⁵ gyi-lah we tsô-djü di min-teng, s-teh di-ying tu k'en-feh-kyin, yi we ky'üoh dzing-loh peh ng-lah-go tong-si, ziu-z boh-ts sô feh-zing wæ-diao-go; wa-yiu ky'üoh din-li sô sang peh ng-lah-go jü-moh. ⁶ Gyi-lah we c'ong-mun! ng-go oh-li, teng ng cong dzing-ts-go oh-li, lin Yiæ-gyih cong pah-sing-go oh-li: ziu-z ng ah-tia teng tsu-tsang, dzong c'ih-si yi-læ tao jü-kying sô feh-zing k'en-kyin-ko-go. Mo-si ziu nyin-cün, li-k'æ Fah-lao tseo-c'ih. ⁷ Fah-lao-go dzing-ts teng gyi wô, Keh-go nying 'æ ah-lah tao kyi-z ni? Ts'ing ng, fông keh-sing nying ky'i, hao voh-z gyi-lah Jing-ming Yiæ-'o-wô: Yiæ-gyih yi-kying mih-diao-de, ng wa we feh-hyiao-teh ma? ⁸ Yi ling Mo-si Üô-leng tao Fah-lao di-fông. Fah-lao teng gyi-lah wô, Ky'i voh-z ng-go Jing-ming Yiæ-'o-wô; dæn-z ky'i-go nying z jü ni? ⁹ Mo-si wô, Ah-lah lin lao-lao siao-siao, ng-ts nön teng ah-lah ngeo yang dô-kô ky'i: ing-we ah-lah iao siu Yiæ-'o-wô-go tsih-k'eng. ¹⁰ Fah-lao teng gyi-lah wô, Dæn-nyün Yiæ-'o-wô pao-yiu ng-lah, ziang ngô fông ng-lah teng ng siao-nying dô-kô ky'i ka: ng-lah yüong siao-sing; 'o-se læ ng-lah min-zin-de, ¹¹ Feh-z-ka: ng-lah do-nying ky'i voh-z Yiæ-'o-wô: keh z ng-lah ih-hyang sô gyiu-go: gyi-lah ziu be ken-c'ih li-k'æ Fah-lao min-zin.

耶和華等摩西話：「爾走進去見法老。因為我已經硬其個心等臣子個心，好顯出我個兆頭來其個中央。² 使得爾把我來埃及所做個事幹，來其拉中央所顯出個兆頭，傳撥爾個子孫耳朵聽聞。好曉得我是耶和華。」³ 摩西、亞倫走到法老地方，等其話：「希伯來人個神明耶和華是介話：『爾弗肯低聲小意來我個面前，到幾時呢？用放我百姓去好服侍我。⁴ 若是弗肯放我百姓去，明朝我會使得蝗蟲走進爾個地界。⁵ 其拉會遮住地面頂，使得地垠都看弗見，又會喫剩落撥爾拉個東西，就是電子所弗曾壞掉個；還有喫田裏所生撥爾拉個樹木。⁶ 其拉會充滿爾個屋裏、等爾衆臣子個屋裏、連埃及

衆百姓個屋裏。就是爾阿爹等祖宗，從出世以來到如今所弗曾看見過個。』」摩西就扭轉，離開法老走出。⁷ 法老個臣子等其話：「箇個人害阿拉到幾時呢？請爾，放箇星人去，好服侍其拉神明耶和華。埃及已經滅掉了，爾還會弗曉得嗎？」⁸ 又領摩西、亞倫到法老地方。法老等其拉話：「去服侍爾個神明耶和華。但是去個人是誰呢？」⁹ 摩西話：「阿拉連老老少少、兒子囡、等阿拉牛羊大家去。因為阿拉要守耶和華個節肯。」¹⁰ 法老等其拉話：「但願耶和華保佑爾拉，像我放爾拉等爾小人家去介。爾拉用小心。禍崇來爾拉面前了。¹¹ 弗是介。爾拉大人去服侍耶和華。箇是爾拉一向所求個。」其拉就被趕出離開法老面前。

¹² Yiæ-'o-wô teng Mo-si wô, Sing-c'ih siu læ Yiæ-gyih koh, s-teh wông-djong tseo-tsing Yiæ-gyih di-ka, ky'üoh keh di-zông pah-ying su-ts'æ; ziu-z boh-ts sô dzing-loh-tong-go. ¹³ Mo-si ziu di-ky'i kwa-dziang læ Yiæ-gyih koh; Yiæ-'o-wô s-teh tong-fong tsing-nyih tsing-yia c'ü keh di-fông; tao t'in-nyiang tong-fong ta-leh wông-djong tseo-tsing. ¹⁴ Wông-djong sæn-k'æ Yiæ-gyih pin-di, ding-læ Yiæ-gyih dön-ky'ün di-ka li-hyang;

z ting li-'æ; dzong-zin m-yiu keh-cong-ka wông-djong, yi-'eo yia tsæ m-yiu keh-cong-ka-go. ¹⁵ Wông-djong tsô-djü tao-c'ü di-min-teng, s-teh keh di-fông tu heh-en-go. Væn-pah boh-ts dzing-loh-tong din-li-go su-ts'æ, jü-li-go ko-ts, long-tsong ky'üoh-de: s-teh læ 'en Yiaë-gyih koh, jü-li teng din-li-go su-ts'æ ts'ing-ts'ing-go tong-si ih-ngæn m-neh dzing-loh. ¹⁶ Fah-lao ziu kw'a-kw'a dziao-long Mo-si Üô-leng, wô, Ngô z teh-ze ng-go Jing-ming Yiaë-'o-wô, yi teh-ze ng-lah. ¹⁷ Næn-kæn, tæh-tsih keh-tsao, ts'ing ng kw'un-shü ngô ze, gyiu ng Jing-ming Yiaë-'o-wô, min. diao ngô keh-tsao-go si. ¹⁸ Gyi li-k'æ Fah-lao tseo-c'ih, gyiu-gyiu Yiaë-'o-wô. ¹⁹ Yiaë-'o-wô ziu fah-ky'i do-do si-fong læ, pô wông-djong c'ü-tsing 'Ong-hæ, s-teh 'en Yiaë-gyih di-ka m-neh ih-go wông-djong dzing-loh. ²⁰ Dæn-z Yiaë-'o-wô ngang Fah-lao-go sing, feh-k'eng fông Yi-seh-lih ts-seng ky'i.

¹² 耶和華等摩西話：「伸出手來埃及國，使得蝗蟲走進埃及地界，喫箇地上百樣蔬菜，就是雹子所剩落東個。」

¹³ 摩西就提起拐杖來埃及國。耶和華使得東風整日整夜吹箇地方。到天亮東風帶勒蝗蟲走進。¹⁴ 蝗蟲散開埃及遍地，停來埃及團圞地界裏向。是頂厲害。從前嚟有箇種介蝗蟲，以後也再嚟有箇種介個。¹⁵ 蝗蟲遮住到處地面頂，使得箇地方都黑暗個。凡百雹子剩落東田裏個蔬菜、樹裏個果子，攏總喫了。使得來咸埃及國，樹裏等田裏個蔬菜青青個東西一眼嚟得剩落。¹⁶ 法老就快快召攏摩西、亞倫，話：「我是得罪爾個神明耶和華，又得罪爾拉。¹⁷ 難間，單只箇遭，請爾寬恕我罪，求爾神明耶和華，免掉我箇遭個死。」¹⁸ 其離開法老走出，求求耶和華。¹⁹ 耶和華就發起大大西風來，把蝗蟲吹進紅海，使得咸埃及地界嚟得一個蝗蟲剩落。²⁰ 但是耶和華硬法老個心，弗肯放以色列子孫去。

²¹ Yiaë-'o-wô teng Mo-si wô, Ng sing-c'ih siu læ dziao-leh t'in, s-teh Yiaë-gyih koh ^[1] heh-en, tsih-hao læ heh-en li-hyang moh-læ-moh-ky'i. ²² Mo-si ziu sing-c'ih siu læ dziao-leh t'in, 'en Yiaë-gyih di-fông sæn-nyih kong-fu moh-ts'eh-di-en. ²³ Keh sæn-nyih li-hyang nying min tu k'en-feh-kyin, yia m-yiu nying bô-ky'i li-k'æ gyi deng-c'ü-go: tsih-yiu Yi-seh-lih ts-seng oh-li yiu liang-kwông. ²⁴ Fah-lao eo Mo-si wô, Ng-lah ky'i voh-z Yiaë-'o-wô: tæh-tsih liu ng-lah ngeo yang læ-tong; ng-go siao-nying yia hao teng ng-lah dô-kô ky'i. ²⁵ Mo-si wô, Ng pih-iao do foh-li teng tsi-veh kao-fu ah-lah siu-li, hao ky'i tsi ah-lah Jing-ming Yiaë-'o-wô. ²⁶ Ah-lah sang-k'eo yia tsong iao dô-kô ky'i; ih-tsah di-ts tu feh dzing-loh-tong: ing-we ah-lah iao læ gyi-lah cong-nyiang do-leh voh-z ah-lah Jing-ming Yiaë-'o-wô: ping-ts'ia feh-zing tao keh-deo z-'eo, wa feh-hyiao-teh kæ yüong soh-si voh-z Yiaë-'o-wô. ²⁷ Dæn-z Yiaë-'o-wô ngang Fah-lao-go sing, feh-k'eng fông gyi-lah ky'i. ²⁸ Fah-lao teng gyi wô, Ng li-k'æ ngô ky'i, zi yüong siao-sing, m-nao tsæ kyin ngô-go min; ing-we teng ngô kyin-min-go nyih-ts ng pih-ding iao si. ²⁹ Mo-si wô, Ng shih-wô z-go; ngô feh tsæ kyin ng-go min.

²¹ 耶和華等摩西話：「爾伸出手來朝勒天，使得埃及國黑暗，只好來黑暗裏向摸來摸去^[1]。」²² 摩西就伸出手來朝勒天，咸埃及地方三日工夫墨漆地暗。²³ 箇三日裏向人面都看弗見，也嚟有人爬起離開其屯處個。只有以色列子孫屋裏有亮光。²⁴ 法老謳摩西話：「爾拉去服侍耶和華。單只留爾拉牛羊來東。爾個小人也好等爾拉大家去。」²⁵ 摩西話：「爾必要馱福禮等祭物交付阿拉手裏，好去祭阿拉神明耶和華。²⁶ 阿拉牲口也總要大家去。一隻蹄子都弗剩落東。因為阿拉要來其拉中央馱勒服侍阿拉神明耶和華。並且弗曾到箇頭時候，還弗曉得該用啥西服侍耶和華。」²⁷ 但是耶和華硬法老個心，弗肯放其拉去。²⁸ 法老等其話：「爾離開我去，自用小心，嚟得好再見我個面。因為等我見面個日子爾必定要死。」²⁹ 摩西話：「爾說話是個。我弗再見爾個面。」

[1] 'Ôh wô, Keh heh-en 'eo-'eo jih-jih, tsing-ziang moh-leh-djoh go. 或話，箇黑暗厚厚實實，正像摸勒着個。(原註)

C. XI.

YIÆ-'O-WÔ teng Mo-si wô, Ngô we tsæ kông ih-go tsæ-næn peh Fah-lao teng Yiæ-gyih koh: 'eo-deo gyi we fông ng-lah li-k'æ ts'-di ka ky'i; gyi fông ng-lah z-'eo pih-ding we ken ng-lah long-tsong tseo-c'ih. ² Ng næn-kæn hao kông peh pah-sing t'ing, s-teh ko-ko nen hyiang gyi ling-sô-kô, ko-ko nyü hyiang gyi ling-sô-kô t'ao kying-nying-go tong-si. ³ Yiæ-'o-wô s-teh pah-sing teh-djoh eng-we læ Yiæ-gyih nying min-zin. Ping-ts'ia læ Yiæ-gyih koh, dziu Fah-lao dzing-ts pah-sing k'en-læ, Mo-si keh-go nying z ting kwe-djong.

耶和華等摩西話：「我會再降一個災難撥法老等埃及國。後頭其會放爾拉離開此地介去。其放爾拉時候，必定會趕爾拉攏總走出。² 爾難間好講撥百姓聽，使得個個男向其鄰舍家，個個女向其鄰舍家討金銀個東西。」³ 耶和華使得百姓得着恩惠來埃及人面前。並且來埃及國，就法老臣子百姓看來，摩西箇個人是頂貴重。

⁴ Mo-si ziu wô, Yiæ-'o-wô z-ka wô, Pun-yia-ko Ngô we tseo-c'ih læ Yiæ-gyih cong-nyiang: ⁵ væn-pah Yiæ-gyih di-fông deo-ih-t'æ sang-c'ih-go, dzong zo-læ Fah-lao zo-we-li deo-ih-t'æ sang-c'ih-go tao ky'in-mo-go s-nyü deo-ih-t'æ sang-c'ih-go; lin væn-pah sang-k'eo deo-ih-t'æ sang-c'ih-go, long-tsong we si. ⁶ Læ Yiæ-gyih di-fông koh-tao-c'ü we 'ao-li-da-k'oh; zin-deo dzong m-yiu keh-cong-ka, 'eo-deo yia tsæ m-yiu keh-cong-ka-go. ⁷ Kông-tao Yi-seh-lih ts-seng, lin nying teng sang-k'eo, ziu-z ih-tsah keo yia feh we dziao-leh gyi dong zih-deo: hao peh ng hyiao-teh Yiæ-'o-wô feng-pih Yiæ-gyih nying teng Yi-seh-lih nying. ⁸ Ping-ts'ia ng-go cong dzing-ts pih-ding we tseo-long dziao-leh ngô boh-tæn-tao, wô, Ts'ing ng, teng keng ng-go pah-sing long-tsong ky'i: 'eo-deo ngô ziu we ky'i. Mo-si fah do-ông li-k'æ Fah-lao tseo-c'ih.

⁴ 摩西就話：「耶和華是介話：『半夜過我會走出來埃及中央。⁵ 凡百埃及地方頭一胎生出個，從坐來法老座位裏頭一胎生出個，到牽磨個使女頭一胎生出個；連凡百姓口頭一胎生出個，攏總會死。⁶ 來埃及地方各到處會號淚大哭，前頭從無有箇種介，後頭也再無有箇種介個。⁷ 講到以色列子孫，連人等牲口，就是一隻狗也弗會朝勒其動舌頭。好撥爾曉得耶和華分別埃及人等以色列人。』⁸ 並且爾個衆臣子必定會走攏朝勒我伏帶倒，話：『請爾，等跟爾個百姓攏總去。』後頭我就會去。」摩西發大快離開法老走出。

⁹ Yiæ-'o-wô teng Mo-si wô, Fah-lao tsong feh-k'eng t'ing ng, s-teh Ngô læ Yiæ-gyih koh hao kô-ts'eo Ngô-go gyi-z. ¹⁰ Mo-si Üô-leng tso keh-sing gyi-z læ Fah-lao min-zin: dæn-z Yiæ-'o-wô ngang Fah-lao-go sing, s-teh gyi feh-k'eng fông Yi-seh-lih ts-seng tseo-c'ih gyi-go di-ka.

⁹ 耶和華等摩西話：「法老總弗肯聽爾，使得我來埃及國好加湊我個奇事。」¹⁰ 摩西、亞倫做箇星奇事來法老面前。但是耶和華硬法老個心，使得其弗肯放以色列子孫走出其個地界。

C. XII.

YIÆ-'O-WÔ læ Yiæ-gyih koh feng-fu Mo-si Üô-leng, wô, ² Keh-ko yüih pih iao tso ng-lah-go tsing-yüih: ziu-z nyin-cong yüih-veng-go ky'i-deo. ³ Ng-lah feng-fu Yi-seh-lih djün kong-we, wô, Keh-ko yüih, ts'u-jih keh-nyih, koh-nying kæn ih-tsah siao-ying, tsiao gyi-lah tsong-djoh, veng-veng nying-kô ih-tsah siao-ying. ⁴ Ziah-z kô-k'eo siao, ih-tsah-siao-ying ky'üoh-feh-wun, ka-ni tsiao gyi nying-go su-moh, teng kah-pih ling-sô-kô dô-kô keh-tæn-long: tsiao gyi sô ky'üoh-go nying-su p'a keh-tsah siao-ying. ⁵ Ng-lah-go siao-ying pih-iao m-pæn-pô-go yüong-ying, sang-c'ih feh-tao ih-nyin-go: 'oh-tsia dzong wu-ying, 'oh-tsia dzong sæn-ying kæn gyi. ⁶ Hao iang-tong tao keh-ko yüih, jih-s keh nyih: Yi-seh-lih 'eh-djoh-go kong-we yia-kw'a z-'eo sah

gyi. ⁷ Gyi-lah hao do gyi hyüih, læ ky'üoh gyi-go oh-li, djô-læ meng-go mi, teng liang-pin teng-fông-li. ⁸ Keh yia gyi-lah iao ky'üoh gyi-go nyüoh, yüong ho p'ang-ts, teng m-kao-shü-go ping, lin, kw'u-ts'æ dô-kô ky'üoh: ⁹ 'Oh-tsia sang-go, 'ôh-tsia yüong shü ts-go, tu m-neh hao ky'üoh: pih-ding yüong ho p'ang gyi, ziu-z gyi deo, teng kyiah, lin gyi-go du-li. ¹⁰ Feh-k'o dzing-loh tao ming-tsiao: ziah yiu soh-si dzing tao ming-tsiao, pih iao yüong ho me-gyi-diao. ¹¹ Ng-lah ing-kæ z-ka ky'üoh-fah: ng-lah iao-bo-li kyi-leh ta, kyiah-li c'ün-leh 'a, siu-li do-leh kwa-dziang; wa-yiu ng-lah iao kw'a-kw'a ky'üoh gyi: keh z Yîæ-'o-wô yü-yüih-tsih. ¹² Keh yia Ngô we tseo-pin 'en Yîæ-gyih koh, tang Yîæ-gyih di-fông deo-ih-t'æ sang-c'ih-go nying teng sang-k'eo; yia p'un-tön Yîæ-gyih ih-ts'ih-go jing-ming: Ngô z Yîæ-'o-wô. ¹³ Keh-go hyüih læ ng-lah deng-go oh-li hao teng ng-lah tso kyi-'ao: Ngô k'en-kyin keh-go hyüih, ziu t'iao-ko ng-lah oh-li: Ngô tang Yîæ-gyih koh z-'eo, ng-lah feh we tsao-djoh mih-diao ng-go tsæ-næn. ¹⁴ Keh-nyih tsiang-læ we tso ng-lah-go kyi-'ao pih-iao shü-shü-dæ-dæ pao-siu gyi tso Yîæ-'o-wô-go tsih-k'eng: ng siu keh-go tsih-k'eng tso üong-yün-go lih-li. ¹⁵ Ts'ih-nyih li-hyang iao ky'üoh m-kao-shü-go ping: di-ih-nyih ng-lah oh-li yüong djü-diao kao-shü: dzong di-ih nyih tao di-ts'ih nyih væn-pah ky'üoh kao-shü-go, keh-go nying pih-iao djü-mih gyi læ Yi-seh-lih cong-nyiang. ¹⁶ Di-ih nyih ng-lah pih-iao tso ih-go sing-jün jü-we: tao di-ts'ih nyih yia iao tso ih-go sing-jün jü-we: keh-liang nyih djü-leh be-bæn koh-nying ky'üoh-zih ts-nga, m-neh hao tso soh-go sang-weh; tæ-n-tsih be-bæn ky'üoh-zih z-de. ¹⁷ Ng-lah iao pao-siu m-kao-shü-go tsih-k'eng: ing-we keh-nyih Ngô ling ng-lah ping-de tseo-c'ih Yîæ-gyih koh: keh-lah ng-lah yüong shü-shü-dæ-dæ pao-siu keh-nyih tso üong-yün-go lih-li. ¹⁸ Tsing-yüih, jih-s nyih-go yia-deo, tao nyiæn-ih nyih-go yia-deo, ng-lah iao ky'üoh m-kao-shü-go ping. ¹⁹ Ts'ih-nyih li-hyang feh-k'o yiu kao-shü læ ng-lah oh-li: væn-pah ky'üoh kao-shü-go, feh-leng bih-koh nying, peng-di nying, pih-iao djü-mih gyi læ Yi-seh-lih kong-we cong-nyiang. ²⁰ Yiu kao-shü-go tong-si, ng-lah tu feh-k'o ky'üoh: z deng-læ ng-lah oh-li-go tu iao ky'üoh m-kao-shü-go ping.

耶和華來埃及國吩咐摩西、亞倫，話：²「箇個月必要做爾拉個正月，就是年終月份個起頭。³爾拉吩咐以色列全公會，話：『箇個月，初日箇日，各人揀一隻小羊，照其拉宗族，份份人家一隻小羊。⁴若是家口小，一隻小羊喫弗完，介呢照其人個數目，等隔壁鄰舍家大家合帶攏。照其所喫個人數派箇隻小羊。⁵爾拉個小羊必要喫癢疤個雄羊，生出弗到一年個。或者從湖羊，或者從山羊揀其。⁶好養東到箇個月，十四箇日。以色列合族個公會，夜快時候殺其。⁷其拉好馱其血，來喫其個屋裏，搭來門個楣、等兩邊敦枋裏。⁸箇夜其拉要喫其個肉，用火烹仔，等喫酵水個餅，連苦菜大家喫。⁹或者生個，或者用水煮個，都喫得好喫。必定用火烹其，就是其頭、等腳、連其個肚裏。¹⁰弗可剩落到明朝。若有啥西剩到明朝，必要用火焠其掉。¹¹爾拉應該是介喫法。爾拉腰縛裏繫勒帶，腳裏穿勒鞋，手裏馱勒拐杖；還有爾拉要快快喫其。箇是耶和華逾越節。¹²箇夜我會走遍咸埃及國，打埃及地方頭一胎生出個人等牲口；也判斷埃及一切個神明。我是耶和華。¹³箇個血來爾拉庵個屋裏好等爾拉做記號。我看見箇個血，就跳過爾拉屋裏。我打埃及國時候，爾拉弗會遭着滅掉爾個災難。¹⁴箇日將來會做爾拉個記號，必要世世代代保守其，做耶和華個節肯。爾守箇個節肯做永遠個律例。¹⁵七日裏向要喫喫酵水個餅。第一日爾拉屋裏用除掉酵水。從第一日到第七日，凡百喫酵水個，箇個人必要除滅其來以色列中央。¹⁶第一日爾拉必要做一個聖善聚會；到第七日也要做一個聖善聚會。箇兩日，除了備辦各人喫食之外，喫得好做啥個生活。單只備辦喫食是了。¹⁷爾拉要保守喫酵水個節肯。因為箇日我領爾拉兵隊走出埃及國。箇拉爾拉用世世代代保守箇日做永遠個律例。¹⁸正月，十四日個夜頭，到廿一日個夜頭，爾拉要喫喫酵水個餅。¹⁹七日裏向弗可有酵水來爾拉屋裏。凡百喫酵水個，弗論別國人、本地人，必要除滅其來以色列公會中央。²⁰有酵水個東西，爾拉都弗可喫。是庵來爾拉屋裏個都要喫喫酵水個餅。』」

²¹ Mo-si ziu eo-long Yi-seh-lih cong tsiang-lao, teng gyi-lah wô, Ng-lah veng-veng nying-kô yüong kæn ih-tsah siao-jiang, do-læ sah-ts, tso yü-yüih-tsih-go siao-jiang. ²² Yi do ih-shoh ngeo-sih-ts'ao tsiang-leh un-li-go hyüih, yüong un-li-go hyüih djô-læ meng-go mi, teng liang-pin-go teng-fông-li; feh-hyü ih-go nying tseo-c'ih gyi oh-li-go meng-k'eo, dzih-tao di-nyi nyih t'in-nyiang. ²³ Ing-we Yiæ-'o-wô iao dön-ky'ün tseo-ko-ky'i tang Yiæ-gyih nying: ih-k'en-kyin hyüih læ meng-go mi, teng liang-pin-go teng-fông-li, Yiæ-'o-wô ziu we t'iao-ko keh-go meng-k'eo, feh-hyü ts'ao-mih-go s-ts'a tseo-tsiang ng-lah oh-li læ tang ng. ²⁴ Ng-lah iao pao-siu keh-go, tso ng teng ng ts-seng üong-yün-go lih-li. ²⁵ Ng-lah tao Yiæ-'o-wô sô ing-hyü iao s-peh ng-lah-go di-fông, ng-lah tsong iao pao-siu keh-go li-tsih. ²⁶ Ng-lah ts-seng læ meng ng, keh-go li-tsih z soh-go yün-kwu? ²⁷ Ng-lah hao wô, Keh z Yiæ-'o-wô yü-yüih-tsih-go tsi-veh: ziu-z Gyi tang Yiæ-gyih nying-go z-'eo læ Yiæ-gyih koh t'iao-ko Yi-seh-lih ts-seng-go oh-li, kyi ah-lah-go oh-li. Cong pah-sing ziu deo eo-tæn-tao pa-pa. ²⁸ Yi-seh-lih ts-seng tseo-c'ih, tsiao Yiæ-'o-wô feng-fu Mo-si Üô-leng-go ka tso.

²¹ 摩西就謳攏以色列衆長老，等其拉話：「爾拉份份人家用揀一隻小羊，馱來殺仔，做逾越節個小羊。²² 又馱一束牛膝草，浸勒碗裏個血，用碗裏個血搽來門個楣、等兩邊個敦枋裏。弗許一個人走出其屋裏個門口，直到第二日天亮。²³ 因爲耶和華要團圈走過去打埃及人。一看見血來門個楣、等兩邊個敦枋裏，耶和華就會跳過箇個門口，弗許抄滅個使差走進爾拉屋裏來打爾。²⁴ 爾拉要保守箇個，做爾等爾子孫永遠個律例。²⁵ 爾拉到耶和華所應許要賜撥爾拉個地方，爾拉總要保守箇個禮節。²⁶ 爾拉子孫來問爾，箇個禮節是啥個緣故？²⁷ 爾拉好話：『箇是耶和華逾越節個祭物。就是其打埃及人個時候，來埃及國跳過以色列子孫個屋裏，救阿拉個屋裏。』衆百姓就頭謳帶倒拜拜。²⁸ 以色列子孫走出，照耶和華吩咐摩西、亞倫個介做。

²⁹ K'eo-k'eo pun-yia-ko, Yiæ-'o-wô tang Yiæ-gyih koh væn-pah deo-ih-t'æ sang-c'ih-go, dzong zo-læ Fah-lao zo-we-li deo-ih-t'æ sang-c'ih-go, tao kæn-li-go lo-liah læ nying deo-ih-t'æ sang-c'ih-go; wa-yiu sang-k'eo deo-ih-t'æ sang-c'ih-go. ³⁰ Fah-lao teng gyi cong dzing-ts lin cong Yiæ-gyih nying yia-tao ky'i læ: læ Yiæ-gyih koh tu 'ao-li-da-k'oh; ing-we m-neh ih-kô feh yiu ih go si-nying. ³¹ Fah-lao lin yia eo-long Mo-si Üô-leng, wô, Ng-lah dong-sing li-k'æ ngô pah-sing ky'i: ng teng Yi-seh-lih ts-seng ky'i voh-z Yiæ-'o-wô, tsiao ng-lah sô wô-go. ³² Yia tsiao ng-lah shih-wô ta-leh ngeo yang ky'i; ping-ts'ia, ts'ing ng coh ngô-go foh. ³³ Yiæ-gyih nying yia ts'e Yi-seh-lih pah-sing kw'a-kw'a tseo-c'ih keh-go di-fông, wô, Ah-lah long-tsong iao si-de. ³⁴ Pah-sing ziu do-leh m-kao-shü nyüoh-hao-liao-go min-feng, teng nyüoh-feng-go min-bun, i-zông pao-leh gyi, pe læ kyin-kah-deo. ³⁵ Yi-seh-lih ts-seng tsiao Mo-si sô wô ka tso; hyiang Yiæ-gyih nying t'ao kying-nying-go tong-si, teng i-zông keh-sing. ³⁶ Yiæ-'o-wô s pah-sing teh-djoh eng-we læ Yiæ-gyih nying-go min-zin, s-teh k'eng peh gyi; tsiang-ziang gyi-lah lo-liah Yiæ-gyih nying-go dzæ-veh.

²⁹ 扣扣半夜過，耶和華打埃及國凡百頭一胎生出個，從坐來法老座位裏頭一胎生出個，到監裏個擄掠來人頭一胎生出個。還有牲口頭一胎生出個。³⁰ 法老等其衆臣子，連衆埃及人，夜到起來。來埃及國都號淚大哭。因爲無得一家弗有一個死人。³¹ 法老連夜謳攏摩西、亞倫，話：「爾拉動身離開我百姓去。爾等以色列子孫去服侍耶和華，照爾拉所話個。³² 也照爾拉說話帶勒牛羊去。並且請爾祝我個福。」³³ 埃及人也催以色列百姓快快走出箇個地方，話：「阿拉攏總要死了。」³⁴ 百姓就馱勒嘸酵水拏好了個麪粉，等拏粉個麪盤，衣裳包勒其，揹來肩胛頭。³⁵ 以色列子孫照摩西所話介做。向埃及人討金銀個東西，等衣裳箇星。³⁶ 耶和華賜百姓得着恩惠來埃及人個面前，使得肯撥其。正像其拉擄掠埃及人個財物。

³⁷ Yi-seh-lih ts-seng dzong Læn-sæ pun-ko tao Su-keh; djü-leh siao-nying ts-nga, bu-'ang-go da-iah yiu loh-jih-væn nying. ³⁸ Wa-yiu teng gyi-lah kah-dzeh-long-tih-go ih-do-dziao nying dô-kô zông-ky'i; ngeo yang keh-sing sang-k'eo yia yiu hyü-to. ³⁹ Gyi-lah pô Yiæ-gyih ta-c'ih-læ-go nyüoh-hao-liao min-feng, p'ang gyi tso m-kao-shü-go ping; keh min-feng m-kao-shü, z we-leh dzong Yiæ-gyih ken-c'ih, feh-neng-keo kw'un-wun; ping-ts'ia gyi-lah zi ky'üoh-go liang-zih feh-zing be-hao. ⁴⁰ Ka-ni Yi-seh-lih ts-seng deng-læ Yiæ-gyih-go z-'eo s-pah sæn-jih nyin. ⁴¹ Teng-tao s-pah sæn-jih nyin mun-de keh-nyih, Yiæ-'o-wô-go ping-de tu dzong Yiæ-gyih koh tseo-c'ih. ⁴² Keh yia, ing-we ling gyi-lah tseo-c'ih Yiæ-gyih koh, keh-lah iao teng Yiæ-'o-wô deh-we pao-siu gyi; keh ih yia z Yiæ-'o-wô-go, cong Yi-seh-lih ts-seng iao shü-shü-dæ-dæ pao-siu gyi.

³⁷ 以色列子孫從蘭塞搬過到疏割。除了小人之外，步行個大約有六十萬人。³⁸ 還有等其拉夾雜攏的個一大潮人大家上去。牛羊箇牲牲口也有許多。³⁹ 其拉把埃及帶出來個拊好了麪粉，烹其做嘸酵水個餅。箇麪粉嘸酵水，是爲了從埃及趕出，弗能夠寬緩。並且其拉自喫個糧食弗曾備好。⁴⁰ 介呢以色列子孫來埃及個時候四百三十年。⁴¹ 等到四百三十年滿了箇日，耶和華個兵隊都從埃及國走出。⁴² 箇夜，因爲領其拉走出埃及國，箇拉要等耶和華特爲保守其。箇一夜是耶和華個，衆以色列子孫要世世代代保守其。

⁴³ Yiæ-'o-wô teng Mo-si Üô-leng wô, Yü-yüih-tsih-go lih-li z-ka-go; tæ-n-koh-tong-go nying-k'ah feh-k'o ky'üoh. ⁴⁴ Tsih-yiu koh-nying yüong nying-ts ma-læ-go nu-boh, teng gyi 'ang tsiu-keh-li ts-'eo, z hao ky'üoh. ⁴⁵ Nga-koh nying, teng kwu-læ-go yüong-nying, tu feh-k'o ky'üoh gyi. ⁴⁶ Ng-lah pih-iao læ ih-kæn oh-li ky'üoh gyi; feh-k'o ta gyi nyüoh tseo-c'ih oh nga: yia feh-k'o ao-dön gyi ih-kwang kweh-deo. ⁴⁷ Yi-seh-lih-go 'eh-kong-we tu iao pao-siu gyi. ⁴⁸ Jü-ko c'ih-meng-nying tæ-n-koh læ ng-lah cong-nyiang, iao teng Yiæ-'o-wô pao-siu yü-yüih-tsih, ka-ni gyi long-tsong nen pih-iao ziu tsiu-keh-li, 'eo-deo hao tseo-long-læ pao-siu gyi; teng peng-di nying m-kao koh-nyang; dæn-z m tsiu-keh-li-go feh-k'o ky'üoh gyi. ⁴⁹ Peng-di nying teng tæ-n-koh læ ng-lah cong-nyiang-go c'ih-meng-nying tu ih-nyang-go lih-li. ⁵⁰ Cong Yi-seh-lih ts-seng tu z-ka tso; tsiao Yiæ-'o-wô feng-fu Mo-si Üô-leng-go ka tso. ⁵¹ Keh-nyih Yiæ-'o-wô ling Yi-seh-lih ts-seng, tsiao gyi-lah ping-de, tseo-c'ih Yiæ-gyih di-fông.

⁴³ 耶和華等摩西、亞倫話：「逾越節個律例是介個。耽攔東個人客弗可喫。⁴⁴ 只有各人用銀子買來個奴僕，等其行周割禮之後，是好喫。⁴⁵ 外國人，等雇來個傭人，都弗可喫其。⁴⁶ 爾拉必要來一間屋裏喫其。弗可帶其肉走出屋外。也弗可拗斷其一梗骨頭。⁴⁷ 以色列個合公會都要保守其。⁴⁸ 如果出門人耽攔來爾拉中央，要等耶和華保守逾越節，介呢其攏總男必要受周割禮，後頭好走攏來保守其。等本地人嘸告各樣。但是嘸周割禮個弗可喫其。⁴⁹ 本地人等耽攔來爾拉中央個出門人都一樣個律例。」⁵⁰ 衆以色列子孫都是介做。照耶和華吩咐摩西、亞倫個介做。⁵¹ 箇日耶和華領以色列子孫，照其拉兵隊，走出埃及地方。

C. XIII.

YIÆ-'O-WÔ feng-fu Mo-si, wô, ² Yi-seh-lih ts-seng cong-nyiang, feh-leng nying teng sang-k'eo, væn-pah deo-ih-t'æ sang-c'ih-go, tu iao tseng-ky'i peh Ngô: keh z joh-ü Ngô-go.

耶和華吩咐摩西，話：² 「以色列子孫中央，弗論人等牲口，凡百頭一胎生出個，都要尊起撥我。箇是屬於我個。」

³ Mo-si teng pah-sing wô, Ng-lah yüong kyî-nyäen keh-nyih, ziu-z ng-lah dzong Yîæ-gyih, tso nu-boh-go oh-li tseo-c'ih-go: ing-we Yîæ-'o-wô yüong neng-ken-go siu dzong keh di-fông ling ng-lah tseo-c'ih: feh-k'o ky'üoh yiu kao-shü-go ping. ⁴ Keh nyih-ts ng-lah tseo-c'ih z læ Üô-pih yüih-li. ⁵ Zin-deo Yîæ-'o-wô teng ng tsu-tsong vah-tsiu, pô liu na teng mih-dông-go di-fông s-peh ng, ziu-z Kyüô-nen nying, Heh nying, Üô-mo-li nying, Hyi-vi nying, Yîæ-pu-z nying-go di-fông, tsiang-læ ling ng tseo-tsing keh-deo z-'eo, ng pih-iao læ keh-ko yüih pao-siu keh-go li-tsih. ⁶ Ts'ih-nyih li-hyang ng iao ky'üoh m-kao-shü-go ping; tao di-ts'ih nyih tso Yîæ-'o-wô-go tsih-k'eng. ⁷ Ts'ih-nyih li-hyang iao ky'üoh m-kao-shü-go ping: feh-k'o k'en-kyin yiu kao-shü-go ping. læ ng di-fông, yia feh-k'o k'en-kyin kao-shü læ ng di-fông, læ ng ih-ts'ih di-ka li-hyang.

³ 摩西等百姓話：「爾拉用記念箇日，就是爾拉從埃及、做奴僕個屋裏走出個。因爲耶和華用能幹個手從箇地方領爾拉走出。弗可喫有酵水個餅。」⁴ 箇日子爾拉走出是來亞筆月裏。⁵ 前頭耶和華等爾祖宗罰咒，把流奶等蜜糖個地方賜撥爾，就是迦南人、赫人、亞摩利人、希未人、耶布土人個地方。將來領爾走進箇頭時候，爾必要來箇個月保守箇個禮節。⁶ 七日裏向爾要喫嘸酵水個餅。到第七日做耶和華個節肯。⁷ 七日裏向爾要喫嘸酵水個餅。弗可看見有酵水個餅來爾地方，也弗可看見酵水來爾地方，來爾一切地界裏向。

⁸ Keh-nyih ng hao wô hyiang ng-go ng-ts dao, Keh ziu-z we-leh ngô tseo-c'ih Yîæ-gyih-go z-'eo, Yîæ-'o-wô hyiang ngô sô tso-go. ⁹ Keh hao teng ng tso kyî-'ao! læ ng-go siu-li, tso kyî-nying læ ng-go ngah-koh zông; s-teh Yîæ-'o-wô-go lih-fah læ ng k'eo-li: ing-we Yîæ-'o-wô yüong neng-ken-go siu ling ng c'ih Yîæ-gyih. ¹⁰ Keh-lah me-nyin tao keh-go nyih-ts, ng pih-iao siu keh-go lih-li.

⁸ 箇日爾好話向爾個兒子道：『箇就是爲了我走出埃及個時候，耶和華向我所做個。』⁹ 箇好等爾做記號，來爾個手裏，做記認來爾個額角上。使得耶和華個律法來爾口裏。因爲耶和華用能幹個手領爾出埃及。¹⁰ 箇拉每年到箇個日子，爾必要守箇個律例。

¹¹ Teng-tao Yîæ-'o-wô, tsiao Gyi teng ng lin ng tsu-tsong sô vah-tsiu ling ng tseo-tsing Kyüô-nen nying-go di-fông, s-peh ng keh di-fông go z-'eo, ¹² ng iao pô deo-ih-t'æ sang-go, teng ng sô yiu deo-ih-t'æ sang-go sang-k'eo, tu tseng-ky'i peh Yîæ-'o-wô; keh-sing nen teng yüong-go tu joh-ü Yîæ-'o-wô. ¹³ Væn-pah deo-ih-t'æ li-ts iao yüong siao-ying c'ü-joh: ziah-z feh c'ü-joh, pih-iao ao-dön gyi deo-kying: ng-go ng-nô cong-nyiang deo-ih-t'æ-go nen yia iao c'ü-joh.

¹¹ 等到耶和華，照其等爾連爾祖宗所罰咒，領爾走進迦南人個地方，賜撥爾箇地方個時候，¹² 爾要把頭一胎生個，等爾所有頭一胎生個牲口，都尊起撥耶和華。箇星男等用個都屬於耶和華。¹³ 凡百頭一胎驢子要用小羊取贖。若是弗取贖，必要拗斷其頭頸。爾個兒因中央頭一胎個男也要取贖。」

¹⁴ 'Eo-deo ng-go ng-ts meng ng wô, Dza-we z-ka? ng hao wô hyiang gyi dao, Yîæ-'o-wô yüong neng-ken-go siu ling ah-lah tseo-c'ih Yîæ-gyih, li-k'æ tso nu-boh-go oh-li. ¹⁵ Fah-lao ngang-sing feh-k'eng fông ah-lah c'ih, Yîæ-'o-wô sah Yîæ-gyih koh væn-pah deo-ih-t'æ sang-c'ih-go, lin deo-ih-t'æ-go nying, teng deo-ih-t'æ-go sang-k'eo: we-leh ka, ngô hyin deo-ih-t'æ yüong-go peh Yîæ-'o-wô tso tsi-veh; tsih-yiu ngô tsiang-ts, ngô c'ü-joh gyi. ¹⁶ Keh hao tso kyî-'ao læ ng-go siu-li, tso ta læ ng-go ngah-koh zông; ing-we Yîæ-'o-wô yüong neng-ken-go siu ling ah-lah c'ih Yîæ-gyih.

¹⁴ 後頭爾個兒子問爾話：『咋會是介？』爾好話向其道：『耶和華用能幹個手領阿拉走出埃及，離開做奴僕個屋裏。¹⁵ 法老硬心弗肯放阿拉出，耶和華殺埃及國凡百頭一胎生出個，連頭一胎個人、等頭一胎個牲口。爲了

介，我獻頭一胎用個撥耶和華做祭物。只有我長子，我取贖其。』¹⁶ 箇好做記號來爾個手裏，做帶來爾個額角上。因為耶和華用能幹個手領阿拉出埃及。」

¹⁷ Fah-lao fông pah-sing ky'i-go z-'eo Jing-ming feh ling gyi-lah tseo-ko Fi-li-z nying-go di-fông, se-tsih keh-da lu z gying, ing-we Jing-ming wô, K'ong-p'ô pah-sing k'en-kyin tang-tsiang-go z-t'i iao ao-hwe, dzing-gyiu tseo-kyü Yiæ-gyih ky'i. ¹⁸ Jing-ming ling pah-sing cün-wæn tseo, hyiang 'Ong-hæ kw'ông-iæ keh-da lu; Yi-seh-lih ts-seng pa-leh dzing-shü tseo-c'ih Yiæ-gyih koh. ¹⁹ Mo-si ta-leh lah-seh-go kweh-deo; ing-we gyi zin-deo eo Yi-seh-lih ts-seng vah-tsiu wô, Tsiang-læ Jing-ming we tsiao-kwu ng-lah; ng-lah pih-iao ta-leh ngô kweh-deo teng ng dô-kô li-k'æ ts'-di ka ky'i.

¹⁷ 法老放百姓去個時候，神明弗領其拉走過非利士人個地方。雖即箇埭路是近，因為神明話：「恐怕百姓看見打仗個事體要懊悔，仍舊走歸埃及去。」¹⁸ 神明領百姓轉彎走，向紅海曠野箇埭路。以色列子孫擺勒陣勢走出埃及國。¹⁹ 摩西帶勒約瑟個骨頭。因為其前頭謳以色列子孫罰咒話：「將來神明會照顧爾拉。爾拉必要帶勒我骨頭等爾大家離開此地介去。」

²⁰ Cong-nying dzong Su-keh dong-sing, tao-leh kw'ông-iæ kah-pih, Yi-deng tah tsiang-bong. ²¹ Yiæ-'o-wô tseo læ gyi-lah zin-deo, lu-zông nyih-li yiu yüing-go djü-ts ling gyi-lah; yia-tao yiu ho-go djü-ts tsiao gyi-lah; s-teh gyi-lah nyih-yia hao tseo: ²² nyih-li yüing-djü, yia-tao ho-djü, tu m-neh ing-loh li-k'æ pah-sing min-zin.

²⁰ 衆人從疏割動身，到勒曠野隔壁，以藤搭帳篷。²¹ 耶和華走來其拉前頭，路上日裏有雲個柱子領其拉；夜到有火個柱子照其拉。使得其拉日夜好走。²² 日裏雲柱，夜到火柱，都嚟得隱落離開百姓面前。

C. XIV.

YIÆ-'O-WÔ teng Mo-si wô, ² Ng yüong feng-fu Yi-seh-lih ts-seng, eo gyi-lah wæn-cün, tah tsiang-bong læ Pi-ha-hyi-loh min-zin, 'Ong-hæ teng Mih-deh-go cong-kyin, teng Pô-lih-si-feng te-min; læ gyi te-deo hæ pin-yin yüong tah tsiang-bong. ³ Ing-we Fah-lao; kông-tao Yi-seh-lih ts-seng we wô, Gyi-lah mi-lu de, be kw'ông-iæ we-kw'eng-de. ⁴ Ngô we ngang Fah-lao-go sing, s-teh gyi we tse-ken Yi-seh-lih pah-sing: Ngô læ Fah-lao teng gyi long-tsong ping-de sing-zông teh-djoh yüong-wô; s-teh Yiæ-gyih nying hyiao-teh Ngô z Yiæ-'o-wô. Gyi-lah ziu z-ka tso. ⁵ Yiu nying pô pah-sing dao-tseo t'ong-cü Yiæ-gyih wông. Fah-lao teng gyi dzing-ts sing coh-cün kong-kyih pah-sing: gyi-lah wô, Ah-lah dza-we ka tso, fông Yi-seh-lih nying ky'i, s-teh gyi-lah feh voh-z ah-lah? ⁶ Fah-lao be-bæn ts'ô-ts, ta-ling zi-go pah-sing dô-kô ky'i. ⁷ Ziu ta loh-pah tsah t'iao-shün go ts'ô-ts, teng Yiæ-gyih long-tsong ts'ô-ts, tu yiu ^[1]ta-ling-kwun. ⁸ Yiæ-'o-wô ngang Yiæ-gyih wông Fah-lao-go sing, s-teh gyi tse-ken Yi-seh-lih ts-seng: ing-we Yi-seh-lih ts-seng sæn-kyiah sæn-siu ka tseo-c'ih-ky'i. ⁹ Yiæ-gyih nying, ziu-z Fah-lao-go mô, teng ts'ô-ts, lin mô-ping bu-ping keh-sing, tu tse-ken Yi-seh-lih nying; læ Pi-ha-hyi-loh siang-gying Pô-lih-si-feng-go te-min, hæ pin-yin tah tsiang-bong-go di-fông, ken-djoh gyi-lah. ¹⁰ Fah-lao gying-long-læ-de; Yi-seh-lih ts-seng ngæn-tsing dæ-ky'i, k'en-kyin Yiæ-gyih nying ken gyi-lah; Yi-seh-lih ts-seng ziu do-nyiang ky'ih-hoh, hyiang-hyang gyiu-k'eng Yiæ-'o-wô. ¹¹ Gyi-lah teng Mo-si wô, Læ Yiæ-gyih næn-dao m-neh veng-di, ta ah-lah si læ kw'ông-iæ li ma? Ng dza-we z-ka dæ ah-lah, ling ah-lah c'ih Yiæ-gyih ni? ¹² Ah-lah læ Yiæ-gyih-go z-'eo ky'i-feh-z pô keh-kyü shih-wô teng ng kông, wô, Ng hao-vong ts'ao-ziao ah-lah: peh ah-lah voh-z Yiæ-gyih nying z-de. Wa-z voh-z Yiæ-gyih nying pi si læ kw'ông-iæ li hao. ¹³ Mo-si teng pah-sing wô, Hao-vong p'ô; hao lih-tong, teng-dæ Yiæ-'o-wô-go kyiu-sing, kyih-mih we tso

peh ng-lah k'en; ing-we kyih-mih sô k'en-kyin-go Yiæ-gyih nying, 'eo-deo üong feh we tsæ k'en-kyin gyi. ¹⁴ Yiæ-'o-wô we dæ ng-lah tang-tsiang, ng-lah hao zing-zing læ-tong.

耶和華等摩西話：²「爾用吩咐以色列子孫，謳其拉彎轉，搭帳篷來比哈希錄面前，紅海等密套個中間，等巴力洗分對面。來其對頭海邊沿用搭帳篷。³ 因為法老講到以色列子孫會話：『其拉迷路了，被曠野圍困了。』⁴ 我會硬法老個心，使得其會追趕以色列百姓。我來法老等其攏總兵隊身上得着榮華。使得埃及人曉得我是耶和華。」其拉就是介做。⁵ 有人把百姓逃走通知埃及王。法老等其臣子心折轉攻擊百姓。其拉話：「阿拉咋會介做，放以色列人去，使得其拉弗服侍阿拉？」⁶ 法老備辦車子，帶領自個百姓大家去。⁷ 就帶六百隻挑選個車子，等埃及攏總車子，都有帶領官^[1]。⁸ 耶和華硬埃及王法老個心，使得其追趕以色列子孫。因為以色列子孫散腳散手介走出去。⁹ 埃及人，就是法老個馬、等車子、連馬兵步兵箇星，都追趕以色列人。來比哈希錄相近巴力洗分個對面，海邊沿搭帳篷個地方，趕着其拉。¹⁰ 法老近攏來了。以色列子孫眼睛抬起，看見埃及人趕其拉。以色列子孫就大樣喫惶，響響求懇耶和華。¹¹ 其拉等摩西話：「來埃及難道嚟得墳地，帶阿拉死來曠野裏嗎？爾咋會是介待阿拉，領阿拉出埃及呢？」¹² 阿拉來埃及個時候豈弗是把箇句說話等爾講，話：『爾好甯吵擾阿拉，撥阿拉服侍埃及人是了。』還是服侍埃及人比死來曠野裏好。」¹³ 摩西等百姓話：「好甯怕；好立東，等待耶和華個救星，今末會做撥爾拉看。因為今末所看見個埃及人，後頭永弗會再看見其。¹⁴ 耶和華會代爾拉打仗。爾拉好靜靜來東。」

[1] 'Ôh wô, Sæn go nying. 或話，三個人。（原註）

¹⁵ Yiæ-'o-wô teng Mo-si wô, Ng dza-we gyiu Ngô? Eo Yi-seh-lih ts-seng hyiang zin-deo ka ky'i. ¹⁶ Ng di-ky'i kwa-dziang, sing-c'ih siu læ hæ zông-teng, feng gyi k'æ; s-teh Yi-seh-lih ts-seng læ hæ cong-nyiang tseo sao-lu. ¹⁷ Ngô ziu we ngang Yiæ-gyih nying-go sing, s-teh gyi-lah tse-zông-læ; Ngô læ Fah-lao teng gyi long-tsong ping-de ts'ò-ts gyi-mô-go sing-zông teh-djoh yüong-wô. ¹⁸ Z-ka Ngô læ Fah-lao, teng gyi-go ts'ò-ts, mô-ping sing-zông, teh-djoh yüong-wô z-'eo, Yiæ-gyih nying we hyiao-teh Ngô z Yiæ-'o-wô. ¹⁹ Jing-ming-go t'in-s, læ Yi-seh-lih ying-za zin-deo tseo-go, tsæn-ko-ky'i, tseo-læ gyi-lah 'eo-pe: yüing-djü yia dzong gyi-lah zin-deo tsæn-ko-ky'i, lih-læ gyi-lah 'eo-pe, ²⁰ tao Yiæ-gyih nying ying-za, teng Yi-seh-lih ying-za-go cong-nyiang: keh-pin yiu yüing teng en; dông-pin yia-tao yiu liang-kwông tsiao-djoh; s-teh liang-pin tsing-yia gying-feh-long. ²¹ Mo-si ziu sing-c'ih siu læ hæ zông-teng: Yiæ-'o-wô tsing-yia yüong mang-mang tong-fong lah-djü-leh hæ; s-teh shü liang-pin feng-k'æ, hæ tso-leh sao-di. ²² Yi-seh-lih ts-seng læ hæ cong-nyiang tseo sao-lu: shü læ tso-yiu liang-pin tso ziang ka teng-ky'i-de. ²³ Yiæ-gyih nying ken-zông-ky'i, ziu-z Fah-lao-go mô, teng gyi ts'ò-ts, lin mô-ping, tu keng-leh gyi-lah, tao hæ cong-nyiang. ²⁴ T'in kw'a-liang keh-kang z-'eo, Yiæ-'o-wô dzong ho-djü teng yüing-djü cong-nyiang, k'en-kyin Yiæ-gyih-go ping-de; ziu sæn-lön Yiæ-gyih-go 'ông-wu; ²⁵ T'eh-diao gyi-lah ts'ò-ts-go leng-bun, s-teh gyi-lah næn tseo. Keh-tsao Yiæ-gyih nying wô, Ah-lah yüong dao-tseo bi-ko Yi-seh-lih nying min-zin; ing-we Yiæ-'o-wô we-leh gyi teng Yiæ-gyih nying tang-tsiang-de.

¹⁵ 耶和華等摩西話：「爾咋會求我？謳以色列子孫向前頭介去。¹⁶ 爾提起拐杖，伸出手來海上頂，分其開。使得以色列子孫來海中央走燥路。¹⁷ 我就會硬埃及人個心，使得其拉追上來。我來法老等其攏總兵隊、車子、騎馬個身上得着榮華。¹⁸ 是介我來法老、等其個車子、馬兵身上得着榮華時候，埃及人會曉得我是耶和華。」¹⁹ 神明個天使，來以色列營寨前頭走個，趨過去，走來其拉後背。雲柱也從其拉前頭趨過去，立來其拉後背，²⁰ 到埃及人營寨，等以色列營寨個中央。箇邊有雲等暗；蕩邊夜到有亮光照着。使得兩邊整夜近弗攏。²¹ 摩西就

伸出手來海上頂。耶和華整夜用猛猛東風拉住了海。使得水兩邊分開，海做了燥地。²² 以色列子孫來海中央走燥路。水來左右兩邊做牆介敦起了。²³ 埃及人趕上去，就是法老個馬、等其車子、連馬兵，都跟勒其拉，到海中央。²⁴ 天快亮箇更時候，耶和華從火柱等雲柱中央，看見埃及個兵隊。就散亂埃及個行伍。²⁵ 脫掉其拉車子個輪盤，使得其拉難走。箇遭埃及人話：「阿拉用逃走避過以色列人面前。因為耶和華爲了其等埃及人打仗了。」

²⁶ Yiæ-'o-wô teng Mo-si wô, Ng sing-c'ih siu læ hæ zông-teng, s-teh shü tsæ 'eh-long-læ tsing-mah Yiæ-gyih nying, teng gyi-lah ts'ô-ts mô-ping keh-sing. ²⁷ Mo-si ziu læ hæ zông-teng sing-c'ih siu læ; t'in-liang z-'eo hæ dzing-gyiu üong-ky'i læ: Yiæ-gyih nying iao dao-tseo: Yiæ-'o-wô tiu gyi-lah læ hæ cong-nyiang. ²⁸ Shü liu-cün-læ, tsing-mah ts'ô-ts, teng mô-ping, Fah-lao-go long-tsong ping-de, ken-tao hæ-li-go; m-yiu ih-go dzing-loh. ²⁹ Tæn-tsih Yi-seh-lih ts-seng læ hæ cong-nyiang tseo sao-lu: shü ziang do-ziang ka, læ tso-yiu liang-pin lih-tong. ³⁰ Z-ka Yiæ-'o-wô læ keh-nyih kyi Yi-seh-lih ts-seng t'eh-c'ih Yiæ-gyih nying-go siu-li: Yi-seh-lih nying k'en-kyin Yiæ-gyih nying-go s-siu læ hæ pin-yin. ³¹ Yi-seh-lih nying k'en-kyin Yiæ-'o-wô tso-peh Yiæ-gyih nying-go do-do z-ken: pah-sing ziu p'ô-gyü Yiæ-'o-wô, siang-sing Yiæ-'o-wô teng Gyi nu-boh Mo-si.

²⁶ 耶和華等摩西話：「爾伸出手來海上頂，使得水再合攏來浸沒埃及人，等其拉車子馬兵箇星。」²⁷ 摩西就來海上頂伸出手來。天亮時候海仍舊湧起來。埃及人要逃走。耶和華丟其拉來海中央。²⁸ 水流轉來，浸沒車子等馬兵。法老個攏總兵隊，趕到海裏個，嚟有一個剩落。²⁹ 單只以色列子孫來海中央走燥路。水像大牆介，來左右兩邊立東。³⁰ 是介耶和華來箇日救以色列子孫脫出埃及人個手裏。以色列人看見埃及人個屍首來海邊沿。³¹ 以色列人看見耶和華做撥埃及人個大大事幹。百姓就怕懼耶和華，相信耶和華等其奴僕摩西。

C. XV.

KEH-TSAO Mo-si teng Yi-seh-lih ts-seng tso keh-siu s ko-ts'ông tsæn-me Yiæ-'o-wô, z-ka wô, Ngô we tsæn-me Yiæ-'o-wô; ing-we Gyi ^[1]teh-sing yiu yüong-wô: mô teng gyi-mô-go tu tiu-loh hæ-li. ² Yiæ-'o-wô z ngô-go lih-dao, ngô ts'ông-go s, Gyi tso ngô-go kyi-sing: Gyi z ngô-go Jing-ming, ngô dzong-ying Gyi, ngô ah-tia-go Jing-ming, ngô tseng-kying Gyi. ³ Yiæ-'o-wô z üong-tsiang: Yiæ-'o-wô z Gyi-go ming-deo. ⁴ Fah-lao-go ts'ô-ts teng ping-de tu tiu-loh hæ-li; gyi t'iao-shün-go tsiang-kyüing yia tsing-sah læ 'Ong-hæ-li. ⁵ Sing-sing-go shü kæ-djü gyi-lah: gyi-lah ziang zah-deo ka dzing tao ti. ⁶ Yiæ-'o-wô! Ng jing-tsah siu hyin-c'ih üong-üong-go ky'i-lih; Yiæ-'o-wô! Ng jing-tsah siu k'ao-se Ng dziu-dih. ⁷ Keh-sing lih-ky'i-læ we-nyih Ng-go, Ng yüong do-do ǝ-kwông ba gyi diao. Ng fah-c'ih ô-wông me gyi-lah ziang kw'u-loh-go ts'ao. ⁸ Ng c'ü-c'ih bih-deo-kwun-li-go ky'i, s-teh shü tu jü-long; zông-loh-shü lih-ky'i-læ ziang kao-sæn te ka; læ sing-sing-go hæ cong-nyiang do-shü nying-long. ⁹ Dziu-dih z-ka wô, Ngô we tse-zông, we ken-djoh; ngô we feng-k'æ lo-liah-læ-go, ngô sing we mun-tsoh; ngô we bah-c'ih tao læ, ngô-go siu we djü-mih gyi-lah. ¹⁰ Ng c'ü Ng-go fong, hæ kæ-djü gyi-lah: gyi-lah dzing-loh læ 'Ong-shü-li tsing-ziang k'æn. ¹¹ Keh-sing jing-ming li-hyang jü ziang Ng Yiæ-'o-wô? Jü ziang Ng ka, sing-jün yiu yüong-wô, ts'ing-tsæn yiu ǝ-nyin, 'ang gyi-z. ¹² Ng sing-c'ih jing-tsah siu læ, di ziu t'eng-ky'üoh gyi-lah. ¹³ Ng fah dz-pe sing ling Ng sô c'ü-joh-go pah-sing; Ng yüong zi-go ky'i-lih ying-dao gyi-lah, Ng sing-jün-go deng-c'ü hao tseo-tsing. ¹⁴ Cong pah-sing t'ing-meng-ts ziu p'ô-gyü, deng-læ Fi-li-z di-fông-go tæu iu-meng. ¹⁵ Keh-tsao Yi-tong-go væn-wông tu ky'ih-hoh; Mo-iah-go ing-üong

gwah-gwah-teo; Kyûô-nen-go pah-sing tu yiang-diao. ¹⁶ Kying-hyiaë we ling-djoh gyi-lah; we-leh Ng siu-kwang do, gyi-lah we feh-sing feh-hyang ziang zah-deo ka; teng-tao ng-go pah-sing tseo-ko; Yiaë-'o-wô! teng-tao Ng sô c'ü-joh-go pah-sing tseo-ko. ¹⁷ Ng we ling gyi-lah tsing, cong gyi-lah læ Ng sæn-li-go kyi-nyih; ziu-z Ng Yiaë-'o-wô Zi sô be-bæn-go deng-c'ü; z Ng Yiaë-'o-wô-go siu sô kyin-zao-go sing-din. ¹⁸ Yiaë-'o-wô! üong-yün we tso wông! ¹⁹ Fah-lao-go mô teng gyi ts'ô-ts mô-ping tseo-tsing hæ-li: Yiaë-'o-wô s-teh hæ shü kæ-djü gyi-lah: tsih-yiu Yi-seh-lih ts-seng læ hæ cong-nyiang tseo sao-di.

箇遭摩西等以色列子孫做箇首詩歌唱讚美耶和華，是介話：「我會讚美耶和華；因爲其得勝有榮華^[1]。馬等騎馬個都丟落海裏。² 耶和華是我個力道，我唱個詩，其做我個救星。其是我個神明，我頌揚其，我阿爹個神明，我尊敬其。³ 耶和華是勇將。耶和華是其個名頭。⁴ 法老個車子等兵隊都丟落海裏。其挑選個將軍也浸煞來紅海裏。⁵ 深深個水蓋住其拉，其拉像石頭介沉到底。⁶ 耶和華！爾順隻手顯出勇勇個氣力。耶和華！爾順隻手敲碎爾仇敵。⁷ 箇星立起來違逆爾個，爾用大大威光敗其掉。爾發出慍惶焜其拉像枯落個草。⁸ 爾吹出鼻頭管裏個氣，使得水都聚攏。上落水立起來像高山堆介。來深深個海中央大水凝攏。⁹ 仇敵是介話：『我會追上，會趕着。我會分開擄掠來個。我心會滿足。我會拔出刀來。我個手會除滅其拉。』¹⁰ 爾吹爾個風，海蓋住其拉。其拉沉落來洪水裏正像鉛。¹¹ 箇星神明裏向誰像爾耶和華？誰像爾介，聖善有榮華，稱讚有威嚴，行奇事。¹² 爾伸出順隻手來，地就吞喫其拉。¹³ 爾發慈悲心領爾所取贖個百姓。爾用自個氣力引導其拉，爾聖善個庇處好走進。¹⁴ 衆百姓聽聞仔就怕懼，庇來非利士地方個擔憂悶。¹⁵ 箇遭以東個藩王都喫惟。摩押個英勇刮刮抖。迦南個百姓都煬掉。¹⁶ 驚駭會臨着其拉。爲了爾手梗大，其拉會弗聲弗響像石頭介。等到爾個百姓走過。耶和華！等到爾所取贖個百姓走過。¹⁷ 爾會領其拉進，種其拉來爾山裏個基業。就是爾耶和華自所備辦個庇處。是爾耶和華個手所建造個聖殿。¹⁸ 耶和華！永遠會做王！¹⁹ 法老個馬等其車子馬兵走進海裏。耶和華使得海水蓋住其拉。只有以色列子孫來海中央走燥地。」

[1] 'Ôh wô, Ting yiu yüong-wô. 或話，頂有榮華。(原註)

²⁰ Wa-yiu nyü sin-cü Mi-li-en, z Üô-leng-go ah-tsi, siu-li nyiah-leh yiao-teng-kwu: cong nyü-nying yia nyiah-leh yiao-teng-kwu keng-leh gyi, t'iao-vu c'ih-læ. ²¹ Mi-li-en ing-ky'i, z-ka wô,

²⁰ 還有女先知米利暗，是亞倫個阿姊，手裏捏勒搖頓鼓。衆女人也捏勒搖頓鼓跟勒其，跳舞出來。²¹ 米利暗應起，是介話：

Ko-ts'ông tsæn-me Yiaë-'o-wô, ing-we Gyi ^[1]teh-sing yiu yüong-wô. Mô teng gyi-mô-go tu tiu-loh hæ-li.

「歌唱讚美耶和華，因爲其得勝有榮華^[1]。馬等騎馬個都丟落海裏。」

[1] 'Ôh wô, Ting yiu yüong-wô. 或話，頂有榮華。(原註)

²² Z-ka Mo-si ling Yi-seh-lih nying dzong 'Ong-hæ ka ky'i, tseo-tsing Shü-r kw'ông-iæ-li; kw'ông-iæ-li tseo-leh sæn-nyih, m-neh shü p'ong-djoh. ²³ Tseo-tao Mô-lah; Mô-lah-go shü ky'üoh-feh-læ, ing-we mi-dao kw'u; keh-lah di-ming kyiao-leh ^[1]Mô-lah. ²⁴ Pah-sing mao-ün Mo-si, wô, ah-lah hah soh-si? ²⁵ Mo-si gyiu-k'eng Yiaë-'o-wô, Yiaë-'o-wô ts-tin ih-cü jü peh Mo-si k'en: Mo-si tiu-loh shü-li: shü ziu din-de. Yiaë-'o-wô læ keh-deo teng gyi-lah zao lih-fah teng lih-li, yi læ keh-deo s-s gyi-lah, ²⁶ wô, Ng ziah-z liu-sing t'ing ng Jing-ming Yiaë-'o-wô-go shih-wô, tso gyi ngæn-zin sön z hao-go, i Gyi-go feng-fu, siu Gyi-go lih-fah, ka-ni, Ngô sô

kông-loh peh Yiæ-gyih nying-go keh-sing bing-t'ong, pih-ding feh we kông peh ng: ing-we Ngô Yiæ-'o-wô z i ng bing-go.

²² 是介摩西領以色列人從紅海介去，走進書珥曠野裏。曠野裏走了三日，嚟得水碰着。²³ 走到瑪拉。瑪拉個水喫弗來，因為味道苦。箇拉地名叫勒瑪拉^[1]。²⁴ 百姓媚怨摩西，話：「阿拉喝啥西？」²⁵ 摩西求懇耶和華。耶和華指點一株樹撥摩西看。摩西丟落水裏。水就甜了。耶和華來箇頭等其拉造律法等律例，又來箇頭試試其拉，²⁶ 話：「爾若是留心聽爾神明耶和華個說話，做其眼前算是好個，依其個吩咐，守其個律法。介呢，我所降落撥埃及人個箇星病痛，必定弗會降落爾。因為我耶和華是醫爾病個。」

[1] *Ziu-z K'wu ka-shih*. 就是「苦」解說。(原註)

²⁷ 'Eo-deo tseo-tao Yi-ling læ keh-deo yiu shü-nyün jih-nyi t'ah, teng tsao-ts jü ts'ih-jih cü: gyi-lah ziu læ gying shü-go di-fông tah tsiang-bong.

²⁷ 後頭走到以琳。來箇頭有水源十二埕，等棗子樹七十株。其拉就來近水個地方搭帳篷。

C. XVI.

YI-SEH-LIH ts-seng cong kong-we dzong Yi-ling dong-sing: dzong c'ih Yiæ-gyih ts-'eo, læ nyi-yüih jih-ng keh-nyih gyi-lah tao Sing go kw'ông-iæ, ziu-z Yi-ling teng Si-næ sæn-go cong-kyin. ² Yi-seh-lih ts-seng cong kong-we læ kw'ông-iæ-li mao-ün Mo-si Üô-leng. ³ Yi-seh-lih ts-seng teng gyi-lah wô, Ah-lah tao-feh-jü dzong Yiæ-'o-wô siu-li si-læ Yiæ-gyih di-fông: ing-we ka z-'eo ah-lah zo-læ nyüoh-un pin-yin, liang-zih ky'üoh-pao: næn-kæn ng ling ah-lah tao keh-go kw'ông-iæ di-fông, s-teh cong kong-we tu iao ngo-sah. ⁴ Yiæ-'o-wô teng Mo-si wô, Ngô we dzong t'in-li kông-loh liang-zih peh ng-lah; pah-sing hao tseo-c'ih-ky'i, me-nyih siu-tsing gyi djoh-nyih sô iao yüong-go: z-ka s-s gyi k'eng i-dzong Ngô-go lih-fah ka tso feh. ⁵ Tao di-loh nyih sô siu-tsing-go tu iao yü-be: z pi gyi-lah me-nyih siu-tsing-go kô ih-be. ⁶ Mo-si Üô-leng teng cong Yi-seh-lih ts-seng wô, Kyih-mih yia-tao ng-lah tsong we hyiao-teh z Yiæ-'o-wô ling ng c'ih Yiæ-gyih di-fông. ⁷ Tao t'in-nyiang ng-lah we k'en-kyin Yiæ-'o-wô-go yüong-wô ing-we Gyi yi-kying t'ing-meng ng-lah mao-ün Yiæ-'o-wô de. Ah-lah z jü, ng-lah mao-ün ah-lah ma? ⁸ Mo-si wô, Yiæ-'o-wô we yia-tao s nyüoh peh ng-lah ky'üoh; t'in-nyiang s ping peh ng-lah ky'üoh-pao; ing-we Yiæ-'o-wô yi-kying t'ing-meng ng-lah mao-ün Gyi ün-'eng-go shih-wô-de. Ah-lah z jü? Ng-lah feh-z mao-ün ah-lah, z mao-ün Yiæ-'o-wô! ⁹ Mo-si teng Üô-leng wô, Ng ky'i wô hyiang Yi-seh-lih ts-seng cong kong-we dao, Ng-lah tseo-long Yiæ-'o-wô-go min-zin: ing-we Gyi yi-kying t'ing-meng ng-lah ün-'eng-go shih-wô-de. ¹⁰ Üô-leng ky'i wô hyiang Yi-seh-lih ts-seng cong kong-we-go z-'eo, gyi-lah hyiang kw'ông-iæ ka mông-ko-ky'i, k'en-kyin Yiæ-'o-wô-go yüong-wô hyin-c'ih læ yüing-li. ¹¹ Yiæ-'o-wô teng Mo-si kông, z-ka wô, ¹² Ngô yi-kying t'ing-meng Yi-seh-lih ts-seng ün-'eng-go shih-wô-de: ng hao teng gyi-lah wô, Yia-tao ng-lah we yiu nyüoh ky'üoh; t'in-nyiang we yiu liang-zih ky'üoh-pao: ka-ni, ng lah tsong we hyiao-teh Ngô z Yiæ-'o-wô, ng-go Jing-ming. ¹³ Tao yia-kw'a in-jing tiao fi-long-læ, tsô-djü ying-za: t'in-nyiang z-'eo lu-shü p'u-læ ying-za dön-ky'ün. ¹⁴ P'u-tih-go lu-shü siu-zông ky'i-de, kw'ông-iæ min-teng yiu siao-siao-go yün-go tong-si læ di-ying-li, ziang sông ka si. ¹⁵ Yi-seh-lih ts-seng k'en-kyin-ts, feh-hyiao-teh z soh-go tong-si, ziu kông-læ-kông-ky'i wô, Keh z soh-go tong-si yia? Mo-si teng gyi-lah wô, Keh z Yiæ-'o-wô s-peh ng-lah ky'üoh-go liang-zih. ¹⁶ Yiæ-'o-wô sô feng-fu z-ka-go: koh-nying ze gyi sô ky'üoh-go su-moh siu-tsing, i gyi nying-su: me nying ih ^[1]ah-mô, tu tsiao gyi tsiang-bong li-hyang-go

nying-su siu-tsing-ky'i. ¹⁷ Yi-seh-lih ts-seng i-leh Gyi ka tso, siu-long-læ, yiu-teh-go to, yiu-teh-go ky'üih. ¹⁸ Yüong ^[2]ah-mô liang-liang k'en, siu-leh to-go m-neh dzing-loh, siu-leh ky'üih-go yia m-neh feh keo: k'eo-k'eo koh-nying tsiao gyi sô ky'üoh-go su-moh ka siu-tsing. ¹⁹ Mo-si wô, Feh-k'o yiu ih-go nying liu-tin-loh tao di-nyi t'in-nyiang. ²⁰ Dæn-z gyi-lah feh t'ing Mo-si shih-wô: yiu-sing nying liu-tin tao di-nyi t'in-nyiang-go; ziu sang djong, ts'iu-diao-de; Mo-si ô-wông gyi-lah. ²¹ Z-ka me-nyih t'in-nyiang koh-nying tsiao gyi sô ky'üoh-go su-moh siu-tsing: teng-tao nyih-deo sa-djoh, ziu yang-diao-de. ²² Tao di-loh nyih gyi-lah siu-tsing-go ky'üoh-zih kô ih-be: koh-nying yiu liang ^[2]ah-mô: kong-we-li cong deo-nao læ kao-su Mo-si. ²³ Mo-si teng gyi-lah wô, Yîæ-'o-wô z-ka wô, Ming-tsiao z en-sih-nyih, ziu-z tseng-ky'i peh Yîæ-'o-wô-go sing-nyih: ng-lah iao ts-go, hao ts; iao p'ang-go, hao p'ang: yü-to hao teng zi k'ông-tong, liu-tao di-nyi t'in-nyiang. ²⁴ Gyi-lah i Mo-si-go shih-wô, liu-tao di-nyi t'in-nyiang: feh ts'iu, yia feh sang djong. ²⁵ Mo-si wô, Keh-go kyih-mih hao ky'üoh: ing-we kyih-mih z Yîæ-'o-wô-go en-sih-nyih, ng-lah kyih-mih læ din-li pih-ding zing-feh-djoh. ²⁶ Hao læ loh-nyih li-hyang siu-tsing: tsih-yiu di-ts'ih nyih z en-sih-nyih: keh-nyih z m-neh-go. ²⁷ Tao di-ts'ih nyih pah-sing cong-nyiang yiu nying tseo-c'ih ky'i siu; ih-ngæn tu zing-feh-djoh. ²⁸ Yîæ-'o-wô teng Mo-si wô, Ng-lah feh-k'eng i Ngô-go 'ao-ling teng lih-fah, tao kyi-z ni? ²⁹ Ng k'en, Yîæ-'o-wô yi-kying pô en-sih-nyih s-peh ng; keh-lah læ di-loh nyih s ng liang-nyih-go ky'üoh-zih: ka-ni, di-ts'ih nyih koh-nying kæ deng-læ gyi-zi-go di-fông: ih-go tu feh k'o-yi tseo-c'ih-ky'i. ³⁰ Z-ka-go, læ di-ts'ih nyih pah-sing en-sih-de. ³¹ Yi-seh-lih keh-kô eo sô ky'üoh-go tong-si kyiao-leh ^[3]Mô-nô: siang-mao ziang nyün-se-ts ka, bah-bah-go: mi-dao ziang 'o mih-dông go pin-ping ka-go. ³² Mo-si wô, Keh-go z-ken z Yîæ-'o-wô sô feng-fu-go; ng ky'i pô keh-go tong-si tsi-mun-leh ih ^[2]ah-mô, shü-shü-dæ-dæ k'ông-tong: s-teh gyi-lah hao k'en-kyin Ngô, ling ng-lah c'ih Yîæ-gyih koh-go z-'eo læ kw'ông-iæ li iang ng-lah-go ky'üoh-zih. ³³ Mo-si teng Üô-leng wô, Do ih-tsah bing tsi ih ^[2]ah-mô-go mô-nô, fông-læ Yîæ-'o-wô-go min-zin shü-shü-dæ-dæ k'ông-tong. ³⁴ Üô-leng ziu i Yîæ-'o-wô sô feng-fu Mo-si-go, fông-læ iah-siang-go min-zin k'ông-tong. ³⁵ Ka-ni Yi-seh-lih ts-seng ky'üoh mô-nô s-jih nyin kong-fu teng-tao gyi-lah tseo-tao nying sô deng-go di-fông: ziu-z ky'üoh mô-nô teng-tao gyi-lah tseo-tao Kyüô-nen-go di-ka. ³⁶ Ah-mô ziu-z ^[4]yi-fah-go jih-kwu ts ih.

以色列子孫衆公會從以琳動身。從出埃及之後，來二月十五箇日，其拉到汛個曠野，就是以琳等西乃山個中間。² 以色列子孫衆公會來曠野裏媚怨摩西、亞倫。³ 以色列子孫等其拉話：「阿拉倒弗如從耶和華手裏死來埃及地方。因爲介時候阿拉坐來肉碗邊沿，糧食喫飽。難間爾領阿拉到箇個曠野地方，使得衆公會都要餓煞。」⁴ 耶和華等摩西話：「我會從天裏降落糧食撥爾拉。百姓好走出去，每日收進其逐日所要用個。是介試試其肯依從我個律法介做弗。」⁵ 到第六日所收進個都要預備。是比其拉每日收進個加一倍。」⁶ 摩西、亞倫等衆以色列子孫話：「今末夜到爾拉總會曉得是耶和華領爾出埃及地方。」⁷ 到天亮爾拉會看見耶和華個榮華。因爲其已經聽聞爾拉媚怨耶和華了。阿拉是誰，爾拉媚怨阿拉嗎？」⁸ 摩西話：「耶和華會夜到賜肉撥爾拉喫；天亮賜餅撥爾拉喫飽。因爲耶和華已經聽聞爾拉媚怨其怨恨個說話了。阿拉是誰？爾拉弗是媚怨阿拉，是媚怨耶和華。」⁹ 摩西等亞倫話：「爾去話向以色列子孫衆公會道：『爾拉走攏耶和華個面前。因爲其已經聽聞爾拉怨恨個說話了。』」¹⁰ 亞倫去話向以色列子孫衆公會個時候，其拉向曠野介望過去，看見耶和華個榮華顯出來雲裏。¹¹ 耶和華等摩西講，是介話：¹² 「我已經聽聞以色列子孫怨恨個說話了。爾好等其拉話：『夜到爾拉會有肉喫；天亮會有糧食喫飽。介呢，爾拉總會曉得我是耶和華，爾個神明。』」¹³ 到夜快，鵲鳥飛攏來，遮住營寨。天亮時候露水鋪來營寨團圈。¹⁴ 鋪的個露水收上去了，曠野面頂有小小個圓個東西來地垠裏，像霜介細。¹⁵ 以色列子孫看見

仔，弗曉得是啥個東西，就講來講去話：「箇是啥個東西呀？」摩西等其拉話：「箇是耶和華賜撥爾拉喫個糧食。」¹⁶ 耶和華所吩咐是介個：各人隨其所喫個數目收進，依其人數。每人一阿嗎^[1]，都照其帳篷裏向個人數收進去。¹⁷ 以色列子孫依勒其介做。收攏來，有得個多，有得個缺。¹⁸ 用阿嗎^[2]量量看，收勒多個嘅得剩落，收勒缺個也嘅得弗夠。扣扣各人照其所喫個數目介收進。¹⁹ 摩西話：「弗可有一個人留點落到第二天亮。」²⁰ 但是其拉弗聽摩西說話。有星人留點到第二天亮個，就生蟲，臭掉了。摩西慚惶其拉。²¹ 是介每日天亮各人照其所喫個數目收進。等到日頭曬着，就燬掉了。²² 到第六日其拉收進個喫食加一倍。各人有兩阿嗎^[2]。公會裏衆頭腦來告訴摩西。²³ 摩西等其拉話：「耶和華是介話：『明朝是安息日，就是尊起撥耶和華個聖日。爾拉要煮個，好煮。要烹個，好烹。餘多好等自因東，留到第二天亮。』」²⁴ 其拉依摩西個說話，留到第二天亮。弗臭，也弗生蟲。²⁵ 摩西話：「箇個今未好喫。因爲今未是耶和華個安息日。爾拉今未來田裏必定尋弗着。」²⁶ 好來六日裏向收進。只有第七日是安息日。箇日是嘅得個。」²⁷ 到第七日百姓中央有人走出去收。一眼都尋弗着。²⁸ 耶和華等摩西話：「爾拉弗肯依我個號令等律法，到幾時呢？」²⁹ 爾看，耶和華已經把安息日賜撥爾。箇拉來第六日賜爾兩日個喫食。介呢，第七日各人該庵來其自個地方。一個都弗可以走出去。」³⁰ 是介個，來第七日百姓安息了。³¹ 以色列箇家謳所喫個東西叫勒嗎^[3]。相貌像芫荽子介，白白個；味道像和蜜糖個扁餅介個。³² 摩西話：「箇個事幹是耶和華所吩咐個。爾去把箇個東西齒滿勒一阿嗎^[2]，世世代代因東。使得其拉好看見我，領爾拉出埃及國個時候來曠野裏養爾拉個喫食。」³³ 摩西等亞倫話：「馱一隻瓶，齒一阿嗎^[2]個嗎^[4]，放來耶和華個面前世世代代因東。」³⁴ 亞倫就依耶和華所吩咐摩西個，放來約箱個面前因東。³⁵ 介呢以色列子孫喫嗎^[4]四十年工夫，等到其拉走到人所庵個地方。就是喫嗎^[4]等到其拉走到迦南個地界。³⁶ 阿嗎就是以法^[4]個十股之一。

[1] *Ziu-z Liang-sing*. 就是兩升。(原註)

[2] *K'en 16 tsih*. 看 16 節。(原註)

[3] *Ziu-z Soh-go tong-si. K'en 15 tsih*. 就是「啥個東西」。看 15 節。(原註)

[4] *Ziu-z Liang-teo*. 就是兩斗。(原註)

C. XVII.

YI-SEH-LIH ts-seng cong kong-we, tsiao Yiaë-'o-wô sô feng-fu-go lu-dzing, dzong Sing-go kw'ông-iaë dong-sing, tah tsiang-bong læ Li-fi-ding: keh-deo pah-sing m-neh shü hao ky'üoh. ² Pah-sing ziu teng Mo-si tsang-leng, wô, do shü peh ah-lah ky'üoh. Mo-si teng gyi-lah wô, Ng-lah dza-we teng ngô tsang-leng? Dza-we s-s Yiaë-'o-wô ni? ³ Læ keh-deo pah-sing k'eo-k'eh iao ky'üoh shü; ziu mao-ün Mo-si, wô, Ng soh-ken ling ah-lah c'ih Yiaë-gyih, s-teh ah-lah teng ng-nô, lin sang-k'eo tu k'eo-k'eh-sah. ⁴ Mo-si gyiu-k'eng Yiaë-'o-wô, wô, Ngô teng keh-sing pah-sing dza tso-fah? gyi-lah kyi-kyi-wu iao do zah-deo k'ang ngô de. ⁵ Yiaë-'o-wô teng Mo-si wô, Ng siu-li nyiah-leh tang 'o-go kwa-dziang, ling Yi-seh-lih keh-sing tsiang-lao dô-kô ky'i, læ pah-sing min-zin ka tseo-ko ky'i. ⁶ Ngô we lih-læ ng min-zin, 'O-lih sæn-go bun-zah zông: ng tang keh-kw'e bun-zah, we yiu shü liu-c'ih hao peh pah-sing ky'üoh. Mo-si læ Yi-seh-lih tsiang-lao ngæn-zin ziu-z ka tso. ⁷ We-leh Yi-seh-lih ts-seng-go tsang-leng, yi we-leh gyi s-s Yiaë-'o-wô, wô, Yiaë-'o-wô z læ ah-lah cong-nyiang feh? keh-lah Mo-si eo keh-t'ah di-ming kyiao-leh ^[1]Mô-sah, yia kyiao-leh ^[2]Mi-li-pô.

以色列子孫衆公會，照耶和華所吩咐個路程，從汛個曠野動身，搭帳篷來哩非定。箇頭百姓嚟得水好喫。² 百姓就等摩西爭論，話：「馱水撥阿拉喫。」摩西等其拉話：「爾拉咋會等我爭論？咋會試試耶和華呢？」³ 來箇頭百姓口渴要喫水，就媚怨摩西，話：「爾啥幹領阿拉出埃及，使得阿拉等兒囡、連牲口都口渴煞。」⁴ 摩西求懇耶和華，話：「我等箇星百姓咋做法？其拉幾幾乎要馱石頭揸我了。」⁵ 耶和華等摩西話：「爾手裏捏勒打河個拐杖，領以色列箇星長老人家去，來百姓面前介走過去。」⁶ 我會立來爾面前，何烈山個磐石上。爾打箇塊磐石，會有水流出好撥百姓喫。」摩西來以色列長老眼前就是介做。⁷ 爲了以色列子孫個爭論，又爲了其試試耶和華，話：「耶和華是來阿拉中央弗？」箇拉摩西謳箇埠地名叫勒瑪撒^[1]，也叫勒米利巴^[2]。

[1] Ziu-z S-s. 就是「試試」。(原註)

[2] Ziu-z Tsang-leng. 就是「爭論」。(原註)

⁸ Ka z-'eo Üô-mô-lih nying tao Li-fi-ding di-fông læ, teng Yi-seh-lih tang-tsiang. ⁹ Mo-si teng lah-shü-üô! wô, Ng ky'i dæ ah-lah t'iao-shün nying, tseo-c'ih, teng Üô-mô-lih tang-tsiang: ming-tsiao ngô we siu-li nyiah-leh Jing-ming-go kwa-dziang lih-læ sæn-ting-den. ¹⁰ lah-shü-üô tsiao Mo-si shih-wô ka tso, teng Üô-mô-lih tang-tsiang: Mo-si, Üô-leng, Wu-r, dô-kô tseo-zông sæn-ting-den. ¹¹ Mo-si siu di-ky'i, Yi-seh-lih ziu ying-de; siu dang-loh, Üô-mô-lih ziu ying-de. ¹² Mo-si-go siu ky'ih-lih; gyi-lah ziu do ih-kw'e zah-deo, fông-læ gyi 'ô-deo, peh gyi zo-tih: ping-ts'ia Üô-leng teng Wu-r, ih-go læ dông-pin, ih-go læ keh-pin, tông gyi-go siu; s-teh siu feh we yiao-dong ih-dzih tao nyih-deo loh-sæn. ¹³ Keh-tsao lah-shü-üô yüông tao-k'eo sah-ba Üô-mô-lih teng gyi pah-sing. ¹⁴ Yiæ-'o-wô teng Mo-si wô, Ng ky'i tsæ-loh læ ih-peng ^[1]shü-li tso kyi-nying, doh peh lah-shü-üô t'ing: ing-we Üô-mô-lih-go kyi-'ao Ngô iao du-siao gyi læ t'in-'ô. ¹⁵ Mo-si ziu zao ih-zo dæn, eo gyi ming-z ^[2]Yiæ-'o-wô Nyi-si, ¹⁶ wô, Yiæ-'o-wô yi-kying vah-tsiu; Yiæ-'o-wô pih-ding shü-shü-dæ-dæ teng Üô-mô-lih tang-tsiang.

⁸ 介時候亞瑪力人到哩非定地方來，等以色列打仗。⁹ 摩西等約書亞話：「爾去代阿拉挑選人，走出，等亞瑪力打仗。明朝我會手裏捏勒神明個拐杖立來山頂頭。」¹⁰ 約書亞照摩西說話介做，等亞瑪力打仗。摩西、亞倫、戶珥，大家走上山頂頭。¹¹ 摩西手提起，以色列就贏了。手宕落，亞瑪力就贏了。¹² 摩西個手喫力。其拉就馱一塊石頭，放來其下頭，撥其坐的。並且亞倫等戶珥，一個來蕩邊，一個來箇邊，擋其個手。使得手弗會搖動，一直到日頭落山。¹³ 箇遭約書亞用刀口殺敗亞瑪力等其百姓。¹⁴ 耶和華等摩西話：「爾去載落來一本書裏^[1]做記認，讀撥約書亞聽。因爲亞瑪力個記號我要塗銷其來天下。」¹⁵ 摩西就造一座壇，謳其名字耶和華尼西，¹⁶ 話：「耶和華已經罰咒。耶和華必定世代代等亞瑪力打仗。」

[1] 'Ôh-wô, Læ keh peng shü-li. 或話，來箇本書裏。(原註)

[2] Ziu-z Yiæ-'o-wô ngô gyi-'ao. 就是「耶和華我旗號」。(原註)

C. XVIII.

MO-SI-GO dziang-nying, Mi-din tsi-s Yih-lo, t'ing-meng Jing-ming we-leh Mo-si teng Gyi pah-sing Yi-seh-lih ih-ts'ih sô tso-ko-go z-ken, ziu-z Yiæ-'o-wô yi-kying ling Yi-seh-lih c'ih Yiæ-gyih. ² Zin-deo Mo-si ts'a ts'i-ts Si-p'o-lah kyü-ky'i; keh-tsao Mo-si-go dziang-nying Yih-lo ta-leh gyi læ, ³ teng gyi liang-go ng-ts; ih-go ming-z

Keh-jing, z wô, Ngô læ nga-koh tso c'ih-meng-nying; ⁴ Ih-go ming-z [¹¹]Yi-lih-sah wô, Ngô ah-tia-go Jing-ming pông-dzu ngô, kyi u ngô t'eh-c'ih Fah-lao-go pao-kyin. ⁵ Mo-si dzing-nying Yih-lo, teng gyi ts'i-ts ng-ts, tao Mo-si læ-kæn-go kw'ông-iæ-li, Jing-ming-go sæn-li, tah tsiang-bong-go di-fông. ⁶ Teng Mo-si wô, Ngô z ng dzing-nying Yih-lo, teng ng ts'i-ts liang-go ng-ts tao ng di-fông læ. ⁷ Mo-si ziu tseo-c'ih nying-tsih dzing-nying, teng gyi tsoh-ih, ts'ing gyi cū. Gyi-lah dô-kô meng-meng en, tseo-tsing tsiang-bong-li. ⁸ Mo-si pô Yiæ-'o-wô, we-leh Yi-seh-lih, sô tso-peh Fah-lao teng Yiæ-gyih nying-go, wa-yiu lu-zông sô tsao-djoh-go næn-deo, teng Yiæ-'o-wô dza-go kyi u gyi-lah, long-tsong wô hyiang dzing-nying dao. ⁹ Yih-lo we-leh Yiæ-'o-wô sô tso-peh Yi-seh-lih-go væn-pah hao-c'ü, yi kyi u gyi-lah t'eh-c'ih Yiæ-gyih nying-go siu-li, ziu hwun-hyi. ¹⁰ Yih-lo wô, Coh-zia Yiæ-'o-wô, kyi u ng-lah c'ih Yiæ-gyih nying-go siu-li, teng Fah-lao-go siu-li, ziu-z kyi u keh-go pah-sing t'eh-c'ih Yiæ-gyih nying-go siu-'ô. ¹¹ Næn-kæn ngô hyiao-teh Yiæ-'o-wô do-jü long-tsong jing-ming: ing-we gyi-lah 'ang-we kyiao-ngao Yiæ-'o-wô yi-kying ying gyi-lah. ¹² Mo-si dzing-nying Yih-lo ziu pô væn-tsi teng tsi-veh hyin-peh Jing-ming: Üô-leng teng Yi-seh-lih cong tsiang-lao tu tseo-long-læ, teng Mo-si-go dzing-nying læ Jing-ming min-zin ky'üoh ping. ¹³ Di-nyi nyih Mo-si zo-ts sing-p'un pah-sing: pah-sing dzong t'in-nyiang tao yia-deo lih-læ Mo-si sing-pin. ¹⁴ Mo-si-go dzing-nying k'en-kyin gyi væn-pah teng pah-sing sô tso-go, ziu wô, Ng teng pah-sing sô tso z dza-go? Ng dza-we doh-zi zo-ts, pah-sing dzong t'in-nyiang tao yia-deo lih-læ ng sing-pin ni? ¹⁵ Mo-si teng dzing-nying wô, Ing-we pah-sing tao ngô di-fông læ iao meng-meng Jing-ming; ¹⁶ væn-pah yiu en-gyin, gyi-lah tseo-tao ngô di-fông læ; ngô læ liang-'ô cong-nyiang p'un-tön gyi-lah: yi pô Jing-ming-go fah-du, teng lih-li, kao-hyang gyi-lah dao. ¹⁷ Mo-si-go dzing-nying teng gyi wô, Ng sô tso-go m-neh hao. ¹⁸ Keh-go z-ken ü ng t'eh djong-deo: ng feh-neng-keo doh-zi tso, ng teng dong-de læ-tong-go pah-sing pih-ding tu iao ǃe-ǃe-se-se. ¹⁹ Næn-kæn ng t'ing ngô shih-wô, ngô teng ng tang-sön: Jing-ming we teng ng dong-de. Ng we-leh pah-sing læ Jing-ming min-zin, pô gyi en-gyin djün peh Jing-ming. ²⁰ Ng hao kao gyi-lah fah-du teng lih-li, ts-tin gyi-lah kæ tseo-go lu, teng kæ tso-go z-ken. ²¹ Ping-ts'ia ng hao læ pah-sing cong-nyiang kæn-shün yiu dzæ-neng-go, p'ô-gyü Jing-ming-go, dzing-dzing-jih-jih-go, u-su t'en-tsông-go, shih-lih gyi-lah læ pah-sing ts-zông; tso ih-ts'in nying-go deo, ih-pah nying-go deo, ng-jih nying-go deo, jih-go nying-go deo. ²² Hao s-teh gyi-lah ze-z p'un-tön pah-sing: yiu do z-ken, cün kao-su ng; ziah siao-go z-ken, gyi-lah zi hao p'un-tön: ka-ni, peh ng hao ky'ing-k'o; gyi-lah yia hao teng ng feng tæen-deo. ²³ Ng ziah-z ka tso, Jing-ming yia feng-fu ng, ka-ni ng tæen-ts neng-keo t'iao-leh-dong: keh-go pah-sing yia hao en-en-ǃeng-ǃeng kyü gyi-lah deng-c'ü. ²⁴ Mo-si ziu t'ing gyi dzing-nying-go shih-wô, tu tsiao gyi sô kông ka tso. ²⁵ Mo-si læ Yi-seh-lih cong-nyiang kæn-shün yiu dzæ-neng-go nying, shih-lih gyi-lah læ pah-sing ts zông, tso ih-ts'in nying-go deo, ih-pah nying-go deo, ng-jih nying-go deo, jih-go nying-go deo. ²⁶ Gyi-lah ze-z p'un-tön pah-sing; yiu do z-ken cün kao-su Mo-si; ziah siao-go z-ken ziu zi p'un-tön. ²⁷ Mo-si song gyi dzing-nying dong-sing: gyi ziu kyü zi-go peng di-fông.

摩西個丈人，米甸祭司葉羅，聽聞神明爲了摩西等其百姓以色列一切所做過個事幹，就是耶和華已經領以色列出埃及。² 前頭摩西差妻子西坡拉歸去。箇遭摩西個丈人葉羅帶勒其來，³ 等其兩個兒子。一個名字革順，是話：「我來外國做出門人。」⁴ 一個名字以列撒^[1]，話：「我阿爹個神明幫助我，救我脫出法老個寶劍。」⁵ 摩西丈人葉羅，等其妻子兒子，到摩西來間個曠野裏，神明個山裏，搭帳篷個地方。⁶ 等摩西話：「我是爾丈人葉羅，等爾妻子兩個兒子到爾地方來。」⁷ 摩西就走出迎接丈人，等其作揖，親其嘴。其拉大家問問安，走進帳篷裏。⁸ 摩西把耶和華，爲了以色列，所做撥法老等埃及人個，還有路上所遭着個難頭，等耶和華咋個救其拉，攏總

話向丈人道。⁹ 葉羅爲了耶和華所做撥以色列個凡百好處，又救其拉脫出埃及人個手裏，就歡喜。¹⁰ 葉羅話：「祝謝耶和華，救爾拉出埃及人個手裏，等法老個手裏，就是救箇個百姓脫出埃及人個手下。¹¹ 難間我曉得耶和華大如攏總神明。因爲其拉行爲驕傲耶和華，已經贏其拉。」¹² 摩西丈人葉羅就把燔祭等祭物獻撥神明。亞倫等以色列衆長老都走攏來，等摩西個丈人來神明面前喫餅。¹³ 第二日摩西坐仔審判百姓。百姓從天亮到夜頭立來摩西身邊。¹⁴ 摩西個丈人看見其凡百等百姓所做個，就話：「爾等百姓所做是咋個？爾咋會獨自坐仔，百姓從天亮到夜頭立來爾身邊呢？」¹⁵ 摩西等丈人話：「因爲百姓到我地方來要問問神明。¹⁶ 凡百有案件，其拉走到我地方來。我來兩下中央判斷其拉，又把神明個法度等律例，告向其拉道。」¹⁷ 摩西個丈人等其話：「爾所做個嘅得好。¹⁸ 箇個事幹於爾忒重頭。爾弗能夠獨自做，爾等同隊來東個百姓必定都要痿痿碎碎^[2]。¹⁹ 難間爾聽我說話，我等爾打算。神明會等爾同隊。爾爲了百姓來神明面前，把其案件傳撥神明。²⁰ 爾好教其拉法度等律例，指點其拉該走個路，等該做個事幹。²¹ 並且爾好來百姓中央揀選有才能個，怕懼神明個，誠實實個，惡慳貪賊個，設立其拉來百姓之上，做一千人個頭，一百人個頭，五十人個頭，十個人個頭。²² 好使得其拉隨時判斷百姓。有大事幹，轉告訴爾。若小個事幹，其拉自好判斷。介呢，撥爾好輕可。其拉也好等爾分擔頭。²³ 爾若是介做，神明也吩咐爾。介呢爾擔子能夠挑勒動。箇個百姓也好安安穩穩歸其拉庵處。」²⁴ 摩西就聽其丈人個說話，都照其所講介做。²⁵ 摩西來以色列中央揀選有才能個人，設立其拉來百姓之上，做一千人個頭，一百人個頭，五十人個頭，十個人個頭。²⁶ 其拉隨時判斷百姓。有大事幹，轉告訴摩西。若小個事幹，就自判斷。²⁷ 摩西送其丈人動身。其就歸自個本地方。

[1] *Ziu-z Jing-ming pông-dzu ngô*. 就是「神明幫助我」。(原註)

[2] 垂頭喪氣。《字語彙解》記 *wē-wē'-ze-ze'* 痿痿瘁°瘁°

C. XIX.

YI-SEH-LIH ts-seng tseo-c'ih Yiæ-gyih koh ts-'eo, læ sæn-yüih ts'u-ih keh-nyih tao Si-næ kw'ông-iaë. ² Gyi-lah li-k'æ Li-fi-ding, tao Si-næ kw'ông-iaë, tsah-ying læ din-pæn-li: Yi-seh-lih læ keh-deo sæn-min-zin tah tsiang-bong. ³ Mo-si tseo-zông tao Jing-ming-go di-fông ky'i; Yiæ-'o-wô dzong sæn-li eo gyi, wô, Ng hao z-ka teng Yüô-koh keh-kô kông, wô hyiang Yi-seh-lih ts-seng dao. ⁴ Ng-lah yi-kying k'en-kyin Ngô sô tso peh Yiæ-gyih nying-go; Ngô dza-go yüong lao-ing yih-sao pe ng-lah, ling ng tao Ngô di-fông. ⁵ Næn-kæn ng-lah ko-jün k'eng t'ing Ngô shih-wô, siu Ngô-go iah; ka-ni læ lih-koh cong-nyiang Ngô pih-ding sön ng-lah z pao-pe: ing-we djün-di tu joh-ü Ngô-go. ⁶ Ng-lah we teng Ngô tso tsi-s-go koh-kô, sing-jün-go pah-sing. Keh-sing shih-wô ng hao ky'i kông peh Yi-seh-lih ts-seng t'ing. ⁷ Mo-si ziu læ, eo-long pah-sing-go tsiang-lao, pô Yiæ-'o-wô sô feng-fu-go shih-wô, tu tông-min djün-peh gyi-lah t'ing. ⁸ Cong pah-sing 'eh-k'eo-zi-dong ing-ky'i-læ, wô, Yiæ-'o-wô væn-pah sô feng-fu-go, ah-lah pih-ding we tso. Mo-si pô pah-sing-go shih-wô we-pao Yiæ-'o-wô. ⁹ Yiæ-'o-wô teng Mo-si wô, Ngô læ 'eo-'eo yüing-li ling-djoh ng, s-teh pah-sing t'ing-meng Ngô teng ng kông, we yüong-yün siang-sing ng. Mo-si pô pah-sing-go shih-wô kao-su Yiæ-'o-wô. ¹⁰ Yiæ-'o-wô teng Mo-si wô, Ng tao pah-sing di-fông ky'i, kyih-mih ming-tsiao s-teh gyi-lah kyih-zing; eo gyi-lah gyiang i-zông, ¹¹ hao yü-be di-sæn nyih: ing-we di-sæn nyih Yiæ-'o-wô læ cong pah-sing min-zin we kông-loh læ Si-næ sæn-teng. ¹² Ng læ dön-ky'ün shih-lih ts-ka peh pah-sing, wô, Ng-lah yüong zi tso-gyi, feh-k'o tseo-zông sæn-teng; feh-k'o c'oh-væn ts-ka; z bang-djoh keh-zo sæn-go pih-ding we si. ¹³ lh-tsah siu tu feh-k'o bang-

djoh gyi: bang-djoh gyi-go pih-ding be zah-deo k'ang, 'òh-tsia be tsin zih: feh-leng nying teng sang-k'eo tu feh-neng-keo weh: teng-tao 'ao-dong c'ü-leh sing-hyang dziang, fông-dzæ hao tseo-long sæn-pin-yin. ¹⁴ Mo-si tseo-loh sæn-'ò, tao pah-sing di-fông, s-teh gyi-lah kyih-zing: pah-sing tu gyiang i-zông. ¹⁵ Yi feng-fu gyi-lah, wô, Ng-lah yü-be di-sæn nyih: m-nao teng nyü-nying ts'ing-gying. ¹⁶ Tao-leh di-sæn nyih t'in-nyiang, sæn zông-teng yiu hyiang-le, sin-din, teng 'eo-'eo yüing; yia yiu 'ao-dong hyiang-hyang-go sing-ing: s-teh ying-za-li-go pah-sing tu gwah-gwah-teo. ¹⁷ Mo-si ling pah-sing tseo-c'ih ying-za, nying-tsih Jing-ming; tu læ sæn-'ò lih-tong. ¹⁸ 'En Si-næ sæn tu z in; ing-we Yiaë-'o-wô læ ho-yin cong-nyiang kông-loh gyi zông-deo: gyi-go in c'ün-zông ziang ho-lu-li in ka; mun-sæn do-nyiang cing-dong. ¹⁹ 'Ao-dong-go sing-ing hyiang-leh dziang-kyiu, yü-kô djong-ky'i-læ, ka z-'eo Mo-si kông shih-wô, Jing-ming yüong sing-ing we-teh gyi. ²⁰ Yiaë-'o-wô kông-loh læ Si-næ sæn-teng, ziu-z sæn ting-den: Yiaë-'o-wô eo Mo-si tseo-zông sæn-ting: Mo-si ziu tseo-zông-ky'i. ²¹ Yiaë-'o-wô teng Mo-si wô, Ng tseo-loh-ky'i, kying-kyiæ pah-sing, k'ong-p'ò gyi-lah c'ông-tsing-læ tao Yiaë-'o-wô di-fông k'en-k'en-siang, s-teh hyü-to nying we si. ²² Keh-sing gying-long Yiaë-'o-wô-go tsi-s, yia iao zi kyih-zing; k'ong-p'ò Yiaë-'o-wô hweh-jün c'ih-læ vah gyi. ²³ Mo-si teng Yiaë-'o-wô wô, Pah-sing feh-neng-keo tseo-long tao Si-næ sæn, ing-we Ng feng-fu ah-lah, wô, Sæn-go dön-ky'ün shih-lih ts-ka, hao tseng-ky'i gyi. ²⁴ Yiaë-'o-wô teng gyi wô, Ng tseo-loh-ky'i, teng Üô-leng dô-kô zông-læ; dæn-z tsi-s teng pah-sing m-neh hao c'ông-tsing-læ, tseo-zông Yiaë-'o-wô-go di-fông; k'ong-p'ò Yiaë-'o-wô hweh-jün c'ih-læ vah gyi-lah. ²⁵ Mo-si ziu tseo-loh tao pah-sing di-fông, teng gyi-lah kông.

以色列子孫走出埃及國之後，來三月初一箇日到西乃曠野。² 其拉離開哩非定，到西乃曠野，紮營來田畝裏。以色列來箇頭山面前搭帳篷。³ 摩西走上到神明個地方去。耶和華從山裏謳其，話：「爾好是介等雅各箇家講，話向以色列子孫道：⁴ 『爾拉已經看見我所做撥埃及人個。我咋個用老鷹翼梢捎爾拉，領爾到我地方。⁵ 難間爾拉果然肯聽我說話，守我個約。介呢來列國中央我必定算爾拉是寶貝。因為全地都屬於我個。⁶ 爾拉會等我做祭司個國家，聖善個百姓。』箇星說話爾好去講撥以色列子孫聽。」⁷ 摩西就來，謳攏百姓個長老，把耶和華所吩咐個說話，都當面傳撥其拉聽。⁸ 衆百姓合口齊動應起來，話：「耶和華凡百所吩咐個，阿拉必定會做。」摩西把百姓個說話回報耶和華。⁹ 耶和華等摩西話：「我來厚厚雲裏臨着爾，使得百姓聽聞我等爾講，會永遠相信爾。」摩西把百姓個說話告訴耶和華。¹⁰ 耶和華等摩西話：「爾到百姓地方去，今末明朝使得其拉潔淨。謳其拉澆衣裳，¹¹ 好預備第三日。因為第三日耶和華來衆百姓面前會降落來西乃山頂。¹² 爾來團圈設立址界撥百姓，話：『爾拉用自做忌，弗可走上山頂。弗可觸犯址界。是碰着箇座山個必定會死。¹³ 一隻手都弗可碰着其。碰着其個必定被石頭措，或者被箭射。弗論人等牲口都弗能夠活。等到號筒吹勒聲響長，方纔好走攏山邊沿。』」¹⁴ 摩西走落山下，到百姓地方，使得其拉潔淨。百姓都澆衣裳。¹⁵ 又吩咐其拉，話：「爾拉預備第三日。嚟得好等女人親近。」¹⁶ 到了第三日天亮，山上頂有響雷、閃電、等厚厚雲，也有號筒響響個聲音。使得營寨裏個百姓都刮刮抖。¹⁷ 摩西領百姓走出營寨，迎接神明。都來山下立東。¹⁸ 咸西乃山都是煙。因為耶和華來火焰中央降落其上頭。其個煙竄上像火爐裏煙介；滿山大樣震動。¹⁹ 號筒個聲音響勒長久，愈加重起來。介時候摩西講說話，神明用聲音回答其。²⁰ 耶和華降落來西乃山頂，就是山頂頭。耶和華謳摩西走上山頂。摩西就走上。去。²¹ 耶和華等摩西話：「爾走落去，警戒百姓，恐怕其拉闖進來到耶和華地方看看相，使得許多人會死。²² 箇星近攏耶和華個祭司，也要自潔淨。恐怕耶和華忽然出來罰其。」²³ 摩西等耶和華話：「百姓弗能夠走攏到西乃山。因為爾吩咐阿拉，話：『山個團圈設立址界，好尊起其。』」²⁴ 耶和華等其話：「爾走落去，等亞倫大家上來。但是祭司等百姓嚟得好闖進來，走上耶和華個地方。恐怕耶和華忽然出來罰其拉。」²⁵ 摩西就走落到百姓地方，等其拉講。

C. XX.

KEH-SING shih-wô tu z Jing-ming feng-fu-go, wô, ² Ngô z Yîæ-'o-wô, ng-go Jing-ming: z Ngô kyi ng c'ih Yîæ-gyih di-fông, li-k'æ ng tso nu-boh-go oh-li.

箇星說話都是神明吩咐個，話：² 「我是耶和華，爾個神明。是我救爾出埃及地方，離開爾做奴僕個屋裏。

³ Djü Ngô ts-nga ng feh-k'o yiu bih-go Jing-ming.

³ 「除我之外，爾弗可有別個神明。

⁴ Ng feh-k'o we-leh zi tso nyi-su-moh-tiao; 'oh-tsia t'in-zông, di-'ô, lin di-ti-'ô shü li-hyang tong-si, tu feh-k'o tso-c'ih gyi-go siang-mao læ; ⁵ ng feh-k'o pa gyi, feh-k'o voh-z gyi: ing-we Ngô Yîæ-'o-wô, ng-go Jing-ming, z dzih-zia-go Jing-ming: keh-sing 'eng Ngô go, we vah gyi ah-tia-go ze tao sæn-s də ts-seng-go sing-zông: ⁶ dæn-z æ-kying Ngô, pao-siu Ngô lih-fah go, ziu-z ih-ts'in də, Ngô tu we s eng peh gyi-lah.

⁴ 「爾弗可爲了自做泥塑木雕。或者天上、地下、連地底下水裏向東西，都弗可做出其個相貌來。⁵ 爾弗可拜其，弗可服侍其。因爲我耶和華，爾個神明，是嫉邪個神明。箇星恨我個，會罰其阿爹個罪到三四代子孫個身上。⁶ 但是愛敬我，保守我律法個，就是一千代，我都會賜恩撥其拉。

⁷ Ng feh-k'o vông yüong Yîæ-'o-wô Ng Jing-ming-go ming-z: ing-we vông yüong Gyi ming-z go, Yîæ-'o-wô feh we sön gyi z m-ze.

⁷ 「爾弗可妄用耶和華爾神明個名字。因爲妄用其名字個，耶和華弗會算其是嘸罪。

⁸ Yüong kyi-teh en-sih-nyih, pao-siu gyi tso sing-jün nyih-ts. ⁹ Loh-nyih li-deo hao yüong kong, tso ng væn-pah-go sang-weh; ¹⁰ tsih-yiu di-ts'ih nyih z Yîæ-'o-wô ng Jing-ming-go en-sih-nyih. Keh-nyih feh-leng ng-zi, ng-go ng-ts nön, nu-boh, s-nyü, sang-k'eo, lin meng li-hyang-go nying-k'ah, ih-ngæn sang-weh tu m-nao tso. ¹¹ Ing-we loh-nyih li-deo Yîæ-'o-wô zao-dzing t'in, di, hæ, lin gyi li-hyang-go væn-pah tong-si; tao-leh di-ts'ih nyih en-sih de: keh-lah Yîæ-'o-wô coh-tsæn en-sih-nyih, tseng-ky'i gyi tso sing-jün nyih-ts.

⁸ 「用記得安息日，保守其做聖善日子。⁹ 六日裏頭好用工，做爾凡百個生活。¹⁰ 只有第七日是耶和華爾神明個安息日。箇日弗論爾自，爾個兒子囡、奴僕、使女、牲口、連門裏向個人客，一眼生活都嘸得好做。¹¹ 因爲六日裏頭耶和華造成天、地、海、連其裏向個凡百東西。到了第七日安息了。箇拉耶和華祝讚安息日，尊起其做聖善日子。

¹² Yüong kying-djong ng-go tia-nyiang, s-teh ng hao dziang deng læ Yîæ-'o-wô ng-go Jing-ming sô s-peh ng-go di-fông.

¹² 「用敬重爾個爹孃，使得爾好長庵來耶和華爾個神明所賜撥爾個地方。

¹³ Ng feh-k'o sah nying.

¹³ 「爾弗可殺人。

¹⁴ Ng feh-k'o kæn-ying.

¹⁴ 「爾弗可姦淫。

¹⁵ Ng feh-k'o t'eo-dao.

¹⁵ 「爾弗可偷盜。

¹⁶ Ng feh-k'o hwông-kao nying-kô.

¹⁶ 「爾弗可謊告人家。

¹⁷ Ng feh-k'o k'en-siang ling-sô-kô-go oh-yü, feh-k'o k'en-siang ling-sô-kô-go ts'i-ts; 'ôh-tsia gyi nu-boh, s-nyü, ngeo, li; z ling-sô-kô-go tong-si, tu m-nao k'en-siang gyi.

¹⁷ 「爾弗可看相鄰舍家個屋宇，弗可看相鄰舍家個妻子。或者其奴僕、使女、牛、驢；是鄰舍家個東西，都嘸得好看相其。」

¹⁸ Cong pah-sing k'en-kyin hyiang-le, sin-din, 'ao-dong-go sing-hyang, teng sæn-li fah-c'ih-go in; pah-sing ih k'en-kyin ziu t'e-loh, yün-yün lih-kæn. ¹⁹ Teng Mo-si wô, Ng teng ah-lah kông, ah-lah hao t'ing; dæn-z Jing-ming m-nao teng ah-lah kông, k'ong-p'ô ah-lah si. ²⁰ Mo-si teng pah-sing wô, Hao-vong p'ô, ing-we Jing-ming loh-læ s-s ng-lah, s-teh Gyi-go ǃe-kwông læ ng-lah ngæn-zin, peh ng-lah feh we væn-ze. ²¹ Keh-tsao pah-sing yün-yün lih-kæn, tsih-yiu Mo-si tseo-long Jing-ming sô læ-kæn-go heh-en di-fông.

¹⁸ 衆百姓看見響雷、閃電、號筒個聲響，等山裏發出個煙。百姓一看見就退落，遠遠立間。¹⁹ 等摩西話：「爾等阿拉講，阿拉好聽。但是神明嘸得好等阿拉講，恐怕阿拉死。」²⁰ 摩西等百姓話：「好甯怕。因爲神明落來試爾拉，使得其個威光來爾拉眼前，撥爾拉弗會犯罪。」²¹ 箇遭百姓遠遠立間。只有摩西走攏神明所來間個黑暗地方。

²² Yiæ-'o-wô teng Mo-si wô, Ng yüong teng Yi-seh-lih ts-seng kông, z-ka wô, Ng-lah yi-kying k'en-kyin Ngô dzong t'in-li teng ng-lah kông. ²³ Ng-lah feh-k'o teng Ngô tso bih-go jing-ming; nying-ts go jing-ming, kying-ts go jing-ming tu feh-k'o we-leh zi tso. ²⁴ Ng kæ we-leh Ngô zao na-nyi-go tsi-dæn; læ dæn-zông hyin ng væn-tsi, teng zia-eng-tsi, ziu-z ng-go ngeo teng ng-go yang: ih-ts'ih tsi Ngô ming-deo-go di-fông, Ngô pih-ding ling-djoh ng, s foh peh ng. ²⁵ Jü-ko ng iao teng Ngô zao zah-deo-go dæn, ng feh-k'o yüong toh-c'ih-go zah-deo tso: ing-we be ng ky'i-ming zoh-ko-go, ziu u-ǃe de. ²⁶ Ng yia feh-k'o dzong kah-bu-kæn tseo-zông Ngô dæn-li; k'ong-p'ô lu-c'ih ng kyi-sing læ.

²² 耶和華等摩西話：「爾用等以色列子孫講，是介話：『爾拉已經看見我從天裏等爾拉講。』²³ 爾拉弗可等我做別個神明。銀子個神明、金子個神明都弗可爲了自做。²⁴ 爾該爲了我造爛泥個祭壇。來壇上獻爾燔祭，等謝恩祭，就是爾個牛等爾個羊。一切祭我名頭個地方，我必定臨着爾，賜福撥爾。²⁵ 如果爾要等我造石頭個壇，爾弗可用篤出個石頭做。因爲被爾器皿鑿過個，就污穢了。²⁶ 爾也弗可從格步階走上我壇裏，恐怕露出爾肌身來。」

NG iao shih-lih keh-cong-ka lih-li læ cong-nying min-zin. ² Ziah-z ma Hyi-pah-læ nying tso nu-boh, gyi iao voh-z ng loh nyin; tao di-ts'ih nyin ziu hao bah-bah peh gyi tseo-c'ih-ky'i zi kwun zi. ³ Gyi ziah tæen-sing læ-go, yia tæen-sing c'ih-ky'i; ziah yiu ts'i-ts, ts'i-ts yia teng gyi dô-kô ky'i. ⁴ Ziah-z cü-nying-kô dæ ts'i-ts peh gyi, yi-kying sang ng-nô-de, gyi kô-siao tu kwe-peh cü-nying-kô, zi hao tæen-sing ky'i. ⁵ Ziah-z nu-boh ming-tông-tông wô, Ngô hwun-hyi cü-nying-kô teng ngô kô-siao, feh-iao tseo-c'ih-ky'i; ⁶ cü-nying-kô ziu ta gyi tao [1]Jing-ming min-zin, yi ta gyi tao meng-k'eo, 'ôh-tsia meng-go teng-fông-yin; cü-nying-kô yüong cün-ts c'ün gyi-go ng-tô; ziu ih-sang ih-si voh-z gyi.

「爾要設立箇種介律例來衆人面前。² 若是買希伯來人做奴僕，其要服侍爾六年；到第七年就好白白撥其走出去，自管自。³ 其若單身來個，也單身出去。若有妻子，妻子也等其大家去。⁴ 若是主人家抬妻子撥其，已經生兒囡了，其家小都歸撥主人家，自好單身去。⁵ 若是奴僕明當當話：『我歡喜主人家等我家小，弗要走出去。』⁶ 主人家就帶其到神明^[1]面前，又帶其到門口，或者門個敦枋沿。主人家用鑽子穿其個耳朵。就一生一世服侍其。

[1] 'Ôh-tsia fæn Z-s. 或者翻士師。

⁷ Ziah-z nying ma-diao gyi-go nön tso s-nyü, feh-k'o ziang! nu-boh ka peh gyi ky'i. ⁸ Ziah-z c'ü gyi-go cü-nying-kô feh-hwun-hyi gyi, pih-ding cing gyi c'ü-joh: tön feh-k'o tsæ ŵe-ky'üoh gyi, ma gyi peh nga-koh nying. ⁹ Ziah-z c'ü peh zi-go ng-ts, tsong iao ziang nön ka dæ gyi. ¹⁰ Ziah-z ling-nga dæ ts'i-ts, feh-k'o kæn-loh gyi-go ky'üoh-zih, i-c'ün, dzing-veng keh-sing. ¹¹ Ziah feh-z keh sæn-yiang ka dæ gyi, yia hao-vong nying-ts, bah-bah peh gyi tseo-c'ih.

⁷ 「若是人賣掉其個囡做使女，弗可像奴僕介撥其去。⁸ 若是娶其個主人家弗歡喜其，必定准其取贖。斷弗可再委曲其，賣其撥外國人。⁹ 若是娶撥自個兒子，總要像囡介待其。¹⁰ 若是另外抬妻子，弗可減落其個喫食、衣穿、情分箇星。¹¹ 若弗是箇三樣介待其，也好甯銀子，白白撥其走出。

¹² Tang-sah nying-go, pih-iao bæn gyi si-ze. ¹³ Ziah feh-z kwu-i, z Jing-ming t'oh-fu gyi siu-li-go, Ngô we teng ng shih-lih to-bi di-fông peh gyi. ¹⁴ Ziah-z kwu-i meo-sah ling-sô-kô, se-tsih læ Ngô tsi-dæn-li, yia hao k'ô-ky'i bæn gyi si-ze.

¹² 「打煞人個，必要辦其死罪。¹³ 若弗是故意，是神明託付其手裏個，我會等爾設立躲避地方撥其。¹⁴ 若是故意謀殺鄰舍家，雖即來我祭壇裏，也好扞去辦其死罪。

¹⁵ Tang ah-tia 'ôh-tsia ah-nyiang-go, pih-iao bæn gyi si-ze.

¹⁵ 「打阿爹或者阿孃個，必要辦其死罪。

¹⁶ Kwa-leh nying ma-gyi-diao, ziah-z zing-djoh læ gyi siu-li, pih-iao bæn gyi si-ze.

¹⁶ 「拐勒人賣其掉，若是尋着來其手裏，必要辦其死罪。

¹⁷ Tsiu-mô ah-tia 'ôh-tsia ah-nyiang-go, pih-iao bæn gyi si-ze.

¹⁷ 「咒罵阿爹或者阿孃個，必要辦其死罪。

¹⁸ Ziah-yiu nying tsang-zao, 'òh-tsia yüong zah-deo, 'òh-tsia yüong gyün-deo tang nying-kô, m-neh tang-sah tsih kw'eng-læ min-zông-li, ¹⁹ 'eo-deo bô-ky'i, k'ao-leh æ-dziang we tseo; ka tang gyi go nying hao-vong ding-ze: tæ-n-tsih t'ing-wæn gyi fi-z-shih-nyih-go kong-din, teng gyi i-hao.

¹⁸ 「若有人爭造，或者用石頭，或者用拳頭打人家，嘸得打煞只睇來眠牀裏，¹⁹ 後頭爬起，靠勒哀杖會走。介打其個人好冚定罪。單只聽還其費事失業個工鈿，等其醫好。

²⁰ Ziah-yiu nying do kweng-ts tang gyi-go nu-boh, 'òh-tsia s-nyü, s-teh si læ gyi-go siu-'ò; ka pih-iao bæn gyi ze. ²¹ Jü-ko ih-nyih liang-nyih feh-si, feh-k'o bæn gyi, ing-we nu-boh s-nyü z gyi-go nying-ts.

²⁰ 「若有人馱棍子打其個奴僕，或者使女，使得死來其個手下。介必要辦其罪。²¹ 如果一日兩日弗死，弗可辦其。因為奴僕使女是其個銀子。

²² Ziah-yiu nying siang-tang, c'oh-væn shông-sing nyü-nying s-teh gyi do-sing, m-kao bih-yiang sông-'æ, pih-iao bæn gyi tsiao gyi dziang-fu sô wô, yia iao vah nying-ts tsiao z-s sô tön. ²³ Ziah-z ziu 'æ, ih-ming ti ih-ming. ²⁴ Ngæn-tsing ti-wæn ngæn-tsing, ngô-ts' ti-wæn ngô-ts', siu ti-wæn siu, kyiah ti-wæn kyiah, ²⁵ ho-t'ông ti-wæn ho-t'ông, sông-'eng ti-wæn sông-'eng, k'ao-tang ti-wæn k'ao-tang.

²² 「若有人相打，觸犯雙身女人使得其墮身，嘸告別樣傷害，必要辦其，照其丈夫所話，也要罰銀子照士師所斷。²³ 若是就害，一命抵一命。²⁴ 眼睛抵還眼睛，牙齒抵還牙齒，手抵還手，腳抵還腳，²⁵ 火燙抵還火燙，傷痕抵還傷痕，拷打抵還拷打。

²⁶ Ziah-yiu nying tang nu-boh-go ngæn-tsing, 'òh-tsia s-nyü-go ngæn-tsing, s-teh gyi wæ-diao; ka we-leh gyi ngæn-tsing pih-iao fông gyi c'ih zi kwun zi. ²⁷ Ziah-z tang-loh nu-boh-go ngô-ts', 'òh-tsia s-nyü-go ngô-ts'; ka we-leh gyi ngô-ts' pih iao fông gyi c'ih zi kwun zi.

²⁶ 「若有人打奴僕個眼睛，或者使女個眼睛，使得其壞掉。介爲了其眼睛必要放其出自管自。²⁷ 若是打落奴僕個牙齒，或者使女個牙齒。介爲了其牙齒必要放其出自管自。

²⁸ Ziah-yiu ngeo gyüih-djoh nen 'òh-tsia nyü, be gyi gyüih-sah, pih-iao yüong zah-deo k'ang-sah keh-deo ngeo, feh-ky'üoh gyi-go nyüoh; dæn-z ngeo-go cü-nying-kô m-ze. ²⁹ Ziah-z keh deo ngeo su-djông we gyüih, yi-kying kao-su cü-nying-kô, feh kwæn gyi djü, s-teh gyüih-sah nen 'òh-tsia nyü; iao yüong zah-deo k'ang-sah ngeo, gyi cü-nying-kô yia pih-iao si. ³⁰ Ziah-yiu c'ü-joh-go kô-din ding peh gyi, gyi ziu hao tsiao sô-ding-go c'ü-joh gyi sing-ming. ³¹ Ziah-z gyüih nying-kô-go ng-ts, 'òh-tsia gyüih nying-kô-go nön, pih-iao tsiao keh-go li ka bæn-fah. ³² Ngeo ziah-z gyüih nying-kô-go nu-boh, 'òh-tsia s-nyü, pih-iao vah nying-ts sæn-jih ^[1]z-k'eh peh gyi cü-nying-kô: keh-deo ngeo iao yüong zah-deo k'ang-sah.

²⁸ 「若有牛觸着男或者女，被其觸煞，必要用石頭揸煞箇頭牛，弗喫其個肉。但是牛個主人家嘸罪。²⁹ 若是箇頭牛素常會觸，已經告訴主人家，弗關其住，使得觸煞男或者女。要用石頭揸煞牛，其主人家也必要死。³⁰ 若有取贖個價鈿定撥其，其就好照所定個取贖其性命。³¹ 若是觸人家個兒子，或者觸人家個囡，必要照箇個例介辦法。³² 牛若是觸人家個奴僕，或者使女，必要罰銀子三十啱喀^[1]撥其主人家。箇頭牛要用石頭揸煞。

[1] *Da-iah jih-ng liang*. 大約十五兩。(原註)

³³ Ziah-yiu nying hyiao-k'æ tsing-kæ; 'ôh-tsia gyüih tsing, feh teng gyi kæ-hao; s-teh ngeo 'ôh-tsia li-ts 'æn-loh tsing-li; ³⁴ ka-ni keh-k'eo tsing-go cü-nying-kô pih-iao do nying-ts be-wæn sang-k'eo-go cü-nying-kô; si-go sang-k'eo hao kwe-peh zi.

³³ 「若有人攞開井蓋，或者掘井，弗等其蓋好，使得牛或者驢子陷落井裏。³⁴ 介呢箇口井個主人家必要馱銀子賠還牲口個主人家。死個性口好歸撥自。」

³⁵ Ziah-z nying yiu ngeo gyüih-sah bih-nying-go ngeo, tông-kæ ma-diao gyi weh ngeo, dô-kô feng-k'æ nying-ts, yia dô-kô feng-k'æ si ngeo. ³⁶ Ziah-z hyiao-teh gyi ngeo su-djông we gyüih, cü-nying-kô feh kwæn gyi djü, pih-iao do ngeo be ngeo, pô si-go kwe-peh zi.

³⁵ 「若是人有牛觸煞別人個牛，當該賣掉其活牛，大家分開銀子，也大家分開死牛。³⁶ 若是曉得其牛素常會觸，主人家弗關其住，必要馱牛賠牛，把死個歸撥自。」

C. XXII.

ZIAH yiu nying t'eo ngeo, t'eo yang, 'ôh-tsia sah-diao, 'ôh-tsia ma-diao, pih-iao do ng-deo ngeo be ih-deo, s-tsah yang be ih-tsah.

「若有人偷牛、偷羊，或者殺掉，或者賣掉，必要馱五頭牛賠一頭，四隻羊賠一隻。」

² Ziah p'ong-kyin dao-zeh weh ziang-dong, ziu tang gyi sah, hao-vong teng gyi din-ming. ³ Ziah-z nyih-deo yi-kying c'ih-ky'i, ziu iao teng gyi din-ming, ing-we zah-tsông z iao djün-djün be-wæn-go; ziah-z m-kao k'o-yi be, z hao we-leh gyi-go t'eo-dao ma gyi tso nu-boh. ⁴ Ziah-z sô t'eo-go, 'ôh-tsia ngeo, yang, li-ts keh-sing, læ gyi siu-li teh-djoh, wa-z weh-go, pih-iao kô-be be-wæn.

² 「若碰見盜賊挖牆洞，就打其煞，好甯等其填命。³ 若是日頭已經出去，就要等其填命。因為賊賊是要全全賠還個。若是嘅告可以賠，是好爲了其個偷盜賣其做奴僕。⁴ 若是所偷個，或者牛、羊、驢子箇星，來其手裏得着，還是活個，必要加倍賠還。」

⁵ Ziah-yiu nying s-teh nying-kô-go din teng bu-dao-yün be ky'üoh-diao, 'ôh-tsia fông zi-go sang-k'eo tseo-tsing nying-kô-go din-li ky'i ky'üoh, pih-iao pô zi-go din-li teng bu-dao-yün-li-go ting-hao-go ko-ts be-wæn gyi.

⁵ 「若有人使得人家個田等葡萄園被喫掉，或者放自個性口走進人家個田裏去喫，必要把自個田裏等葡萄園裏個頂好個果子賠還其。」

⁶ Ziah-yiu ho fi-sæn tao ts'-bang-li, yin-k'æ tao te-kæn-go mah-li, 'ôh-tsia din-dao, 'ôh-tsia din-li-go mah, ky'i-ho-go nying pih-iao be-Wæn gyi.

⁶ 「若有火飛散到刺棚裏，延開到對間個麥裏，或者田稻，或者田裏個麥，起火個人必要賠還其。」

⁷ Ziah-yiu nying pô nying-ts ho-veh t'oh ling-sô-kô dæ-kwun, dzong gyi oh-li be t'eo-ky'i; zeh ih-k'ô-djoh, pih-iao kô-be be-wæn. ⁸ Ziah k'ô-feh-djoh, hao ta-leh cü-nying-kô tao ^[1]Jing-ming min-zin, sing-meng gyi yiu dong-siu do ling-sô-kô-go ho-veh feh? ⁹ Væn-pah en-gyin, feh-leng ngeo, yang, li-ts, i-zông, ih-ts'ih su-

shih-go tong-si, yiu nying wô z gyi-zi-go, liang-'ô k'o-yi kao-su ^[1]Jing-ming; tsiao ^[1]Jing-ming sô ding-ze-go nying, iao kê-be wæn gyi ling-sô-kô.

7 「若有人把銀子貨物託鄰舍家代管，從其屋裏被偷去。賊一拘着，必要加倍賠還。⁸ 若拘弗着，好帶勒主人家到神明^[1]面前，審問其有動手馱鄰舍家個貨物弗？」⁹ 凡百案件，弗論牛、羊、驢子、衣裳、一切疏失個東西，有人話是其自個，兩下可以告訴神明^[1]。照神明^[1]所定罪個人，要加倍還其鄰舍家。

[1] 'Ôh fæn Z-s. 或翻土師。

¹⁰ Ziah-yiu nying pô li-ts, ngeo, yang, ze-bin soh-go sang-k'eo t'oh nying-kô dæ-kwun, 'ôh-tsia si, 'ôh-tsia sông, 'ôh-tsia be t'eo-ky'i, m nying k'en-kyin; ¹¹ liang-'ô tu iao ts-tin Yîæ-'o-wô vah-tsiu wô, Ngô m-neh dong-siu do ling-sô-kô-go tong-si; gyi cü-nying-kô kæ ing-hyü, hao-vong be-wæn. ¹² Ziah t'eo-ky'i, pih-iao be-wæn gyi cü-nying-kô. ¹³ Ziah be dah-sah, kæ do-læ tso te-tsing, hao-vong be gyi sô dah-sah-go.

¹⁰ 「若有人把驢子、牛、羊、隨便啥個牲口託人家代管，或者死，或者傷，或者被偷去，無人看見。¹¹ 兩下都要指點耶和華罰咒，話：『我嘸得動手馱鄰舍家個東西。』其主人家該應許，好甯賠還。¹² 若偷去，必要賠還其主人家。¹³ 若被踏煞，該馱來做對證，好甯賠其所踏煞個。

¹⁴ Ziah-yiu nying dzong ling-sô-kô tsia-læ-go, 'ôh-tsia sông, 'ôh-tsia si, cü-nying-kô m-neh dô-kô læ-tong, pih-iao be gyi wæn. ¹⁵ Jü-ko cü-nying-kô dô-kô læ-tong, hao-vong be-wæn: 'ôh-tsia shü-læ-go, gyi z we-leh shü-din ka læ-go.

¹⁴ 「若有人從鄰舍家借來個，或者傷，或者死，主人家嘸得大家來東，必要賠其還。¹⁵ 如果主人家大家來東，好甯賠還。或者貰來個，其是爲了貰鈿介來個。

¹⁶ Ziah-yiu nying ying-yiu feh-zing hyü-p'e-go dong-nyü dong-vông, pih-iao p'ing-ding gyi tso ts'i-ts. ¹⁷ Jü-ko ah-tia kyüih-ding feh-k'eng hyü peh gyi; iao ts'ing nying-ts peh gyi tsiao p'ing-ding do-kwu-nyiang-go su-moh.

¹⁶ 「若有人引誘弗曾許配個童女同房，必要聘定其做妻子。¹⁷ 如果阿爹決定弗肯許撥其，要稱銀子撥其，照聘定大姑娘個數目。

¹⁸ Yüong zia-jih-go nyü-nying, ng feh-k'o peh gyi weh.

¹⁸ 「用邪術個女人，爾弗可撥其活。

¹⁹ Væn-pah teng cong-sang dong-zông-go, pih-iao bæn gyi si-ze.

¹⁹ 「凡百等衆生同牀個，必要辦其死罪。

²⁰ Feh cün-meng tsi Yîæ-'o-wô, z tsi bih-go jing-ming-go, pih-iao djü-mih gyi.

²⁰ 「弗專門祭耶和華，是祭別個神明個，必要除滅其。

²¹ C'ih-meng-nying ng feh-k'o pih-næn gyi, yia feh-k'o ts'ao-ziao gyi; ing-we ng-lah z læ Yîæ-gyih di-fông tso c'ih-meng-nying ko-de.

²¹ 「出門人爾弗可逼難其，也弗可吵擾其。因爲爾拉是來埃及地方做出門人過了。

²² Kwu-r kwô-vu, ng-lah feh-k'o ǝ-ky'üoh gyi. ²³ Ziah-z ǝ-ky'üoh gyi-lah, gyi-lah gyiu-k'eng Ngô, Ngô tsong we cing gyi-lah sô gyiu. ²⁴ Ngô pih-ding sang-ho ô-wông, yüong tao sah ng-lah, s-teh ng-lah-go ts'i-ts we tso kwô-vu, ng-lah-go ng-ts we tso kwu-r.

²² 「孤兒寡婦，爾拉弗可委曲其。²³ 若是委曲其拉，其拉求懇我，我總會准其拉所求。²⁴ 我必定生火慍惶，用刀殺爾拉，使得爾拉個妻子會做寡婦，爾拉個兒子會做孤兒。

²⁵ Ngô gyüong pah-sing teng ng dô-kô deng-go, ng ziah-z tsia nying-ts peh gyi, feh-k'o ziang t'en-li-go nying ka, iao gyi t'ing li-din. ²⁶ Ng ziah-z do ling-sô-kô-go i-zông tso tông-deo, nyih-deo loh-sæn-go z-'eo pih-iao wæn gyi. ²⁷ Keh z gyi sing-ti-go tsô-kæ, gyi bi-fu-go c'ün-tsiah: ziah-z ka, gyi dza hao kw'eng ni? Gyi ziah gyiu-k'eng Ngô, Ngô tsong we t'ing gyi, ing-we Ngô z dz-pe-go.

²⁵ 「我窮百姓等爾大家庖個，爾若是借銀子撥其，弗可像貪利個人介，要其聽利鈿。²⁶ 爾若是馱鄰舍家個衣裳做當頭，日頭落山個時候必要還其。²⁷ 箇是其身底個遮蓋，其皮膚個穿着。若是介，其咋好睏呢？其若求懇我，我總會聽其。因爲我是慈悲個。

²⁸ Feh-k'o pông-hwe Jing-ming, yia feh-k'o tsiu-mô ng pah-sing-go kwun-tsiang.

²⁸ 「弗可謗毀神明，也弗可咒罵爾百姓個官長。

²⁹ Ng zông-sing-go ko-ts teng tsiu hyin-zông-læ, ng feh-k'o dzi-wun; ng deo-ih-t'æ-go ng-ts pih-iao hyin-peh Ngô. ³⁰ Ng-go ngeo teng yiang yia pih-iao z-ka tso: ts'ih nyih li-hyang keng gyi ah-nyiang, tao di-pah nyih pih-iao hyin-peh Ngô.

²⁹ 「爾嘗新個果子等酒獻上來，爾弗可遲緩。爾頭一胎個兒子必要獻撥我。³⁰ 爾個牛等羊也必要是介做。七日裏向跟其阿孃，到第八日必要獻撥我。

³¹ Ng tông-kæ tso Ngô sing-kyih-go pah-sing: læ din-li yia-siu sô ngao-sông-go nyüoh ng feh-k'o ky'üoh; tiu peh keo ky'üoh z-de.

³¹ 「爾當該做我聖潔個百姓。來田裏野獸所咬傷個肉爾弗可喫。丟撥狗喫是了。」

C. XXIII.

NG feh-k'o pô yiao-yin djün-k'æ-ky'i: feh-k'o teng ôh-nying gao-siu tso kô te-tsing. ² Feh-k'o keng-leh da-cong tsoh-ôh; ng yia feh-k'o shing cong-nying dzing-min ün-wông nying-kô. ³ Yia feh-k'o pao-pi gyüong-nying-go kwun-s.

「爾弗可把謠言傳開去。弗可等惡人絞手做假對證。² 弗可跟勒大眾作惡。爾也弗可徇衆人情面冤枉人家。³ 也弗可包庇窮人個官司。

⁴ Ziah-z p'ong-djoh ng dziu-dih-go ngeo 'ôh-tsia li-ts dao-tseo, ng pih-iao teng gyi ky'in-cün-læ kwe-wæn gyi. ⁵ Ziah-z k'en-kyin u-su ng nying-go li-ts pe-feh-dong p'oh-tao di-nyang, se-tsih feh-dzing-nyün pông-dzu

gyi, pih-ky'iao-leh teng gyi pông-dzu. ⁶ Ng-go gyüong-nying yiu kwun-s, feh-k'o ǝe-ky'üoh gyi. ⁷ Yüong li-yün kô-go en-gyin; yia feh-k'o sah m-ze-go teng tsing-dzih-go nying; ing-we Ngô pih-ding feh pô ôh-nying sön kong-yi. ⁸ Ng feh-k'o ziu hwe-lu; ing-we hwe-lu we s-teh ts'ong-ming nying-go ngæn-tsing hah, yia we s-teh tsing-dzih nying-go shih-wô ǝæn-ky'üoh. ⁹ Yia feh-k'o ts'ao-ziao c'ih-meng nying; ng z hyiao-teh c'ih-meng nying-go sing-siang, ing-we ng læ Yia-gyih koh tso c'ih-meng-nying ko-de.

⁴ 「若是碰着爾仇敵個牛或者驢子逃走，爾必要等其牽轉來歸還其。⁵ 若是看見惡憐爾人個驢子揸弗動撲倒地垵，雖即弗情願幫助其，必巧勒等其幫助。⁶ 爾個窮人有官司，弗可委曲其。⁷ 用離遠假個案件。也弗可殺嘸罪個等正直個人。因爲我必定弗把惡人算公義。⁸ 爾弗可受賄賂。因爲賄賂會使得聰明人個眼睛瞎，也會使得正直人個說話彎曲。⁹ 也弗可吵擾出門人。爾是曉得出門人個心想。因爲爾來埃及國做出門人過了。

¹⁰ Loh nyin li-hyang hao cong ng-go din, siu gyi-go c'ih-ts'æn. ¹¹ Tao-leh di ts'ih nyin hao hyih-loh, peh gyi k'ong-ko; s-teh ng gyüong pah-sing hao ky'üoh: dzing-loh-go to-deo peh din-li-go yia-siu yia hao ky'üoh. Ng ken-læn teng bu-dao-yün yia z-ka tso-fah.

¹⁰ 「六年裏向好種爾個田，收其個出產。¹¹ 到了第七年好歇落，撥其空過。使得爾窮百姓好喫。剩落個多頭撥田裏個野獸也好喫。爾橄欖等葡萄園也是介做法。

¹² Loh-nyih li-deo kæ tso ng-go sang-weh, tao di-ts'ih nyih pih-iao en-sih, s-teh ng go ngeo teng li hao en-sih; wa-yiu ng s-nyü-go ng-ts teng c'ih-meng-nying hao tsiang-ying. ¹³ Væn-pah Ngô teng ng-lah sô kông-go, pih-iao tông-sing. Feh-k'o di-ky'i bih-go jing-ming ming-z, yia feh-k'o c'ih-k'eo peh nying-kô t'ing.

¹² 「六日裏頭該做爾個生活，到第七日必要安息，使得爾個牛等驢好安息。還有爾使女個兒子等出門人好張揚。¹³ 凡百我等爾拉所講個，必要當心。弗可提起別個神明名字，也弗可出口撥人家聽。

¹⁴ Me-nyin ng pih-iao sæn-tsao siu Ngô-go tsih-k'eng. ¹⁵ Yüong siu Vu-kao-tsih: læ Üô-pih yüih, ding-hao-go nyih-ts ts'ih nyih li-hyang iao ky'üoh m-kao-shü ping, tsiao Ngô sô feng-fu ng-go; (ing-we ka z-'eo z ng dzong Yia-gyih tseo-c'ih:) yia m-nying hao k'ong-siu læ kyin Ngô. ¹⁶ Wa-yiu Siu-keh-go tsih, z ng cong-din-go sang-weh zông-sing ko-ts z-'eo. Yi iao siu Zông-ts'ông-go tsih, z læ nyin ti-'ô, ng din-li-go sang-weh tu siu-tsing-go z-'eo. ¹⁷ Me-nyin sæn-tsao ng væn-pah-go nen tu iao lih-læ Cü Yia-'o-wô-go min-zin.

¹⁴ 「每年爾必要三遭守我個節肯。¹⁵ 用守無酵節。來亞筆月，定好個日子七日裏向要喫嘸酵水餅，照我所吩咐爾個。(因爲介時候是爾從埃及走出。) 也無人好空手來見我。¹⁶ 還有收割個節，是爾種田個生活嘗新果子時候。又要守上倉個節，是來年底下，爾田裏個生活都收進個時候。¹⁷ 每年三遭爾凡百個男都要立來主耶和華個面前。

¹⁸ Ngô tsi-veh-go hyüih ng feh-k'o 'o-leh yiu kao-shü-go ping hyin-zông: Ngô tsi-veh-go yiu, yia feh-k'o liu-tao di-nyi t'in-nyiang. ¹⁹ Ng din-di sô kyih-go zông-sing ko-ts, iao ta gyi tsing ng Jing-ming, Yia-'o-wô-go din-li, Ng feh-k'o pô siao-ying, ts læ gyi ah-nyiang-go na-li.

¹⁸ 「我祭物個血爾弗可和勒有酵水個餅獻上。我祭物個油，也弗可留到第二天亮。¹⁹ 爾田地所結個嘗新果子，要帶其進爾神明、耶和華個殿裏。爾弗可把小羊煮來其阿孃個奶裏。

²⁰ Ngô tang-fah S-ts'a læ ng-go min-zin, lu-zông pao-wu ng, ling ng tao Ngô sô be-bæn-go di-fông. ²¹ Ng-lah yüông kying-jing, t'ing Gyi shih-wô, m-nao c'oh-væn Gyi: ing-we Gyi feh-k'eng nyiao-sô ng-lah go ko-shih; Ngô-go ming-deo z læ Gyi sing-zông. ²² Ng ko-jün t'ing Gyi shih-wô, i Ngô væn-pah sô feng-fu-go ka tso, ka-ni Ngô we tso ng dziu-dih-go dziu-dih, ng te-deo-go te-deo. ²³ Ngô S-ts'a we tseo læ ng min-zin, ling ng tao Üô-mo-li, Heh, Pi-li-si, Kyüô-nen, Hyi-vi, Yïæ-pu-z, keh-sing dzoh-veng-go di-fông: Ngô ziu we mih-diao gyi-lah. ²⁴ Ng feh-k'o pa gyi-lah go jing-ming, feh-k'o voh-z gyi, yia feh-k'o i gyi-lah go pông-ying ka tso: ng* iao long-tsong djü-mih gyi-lah, ts'ah-hwe gyi-lah ngeo-ziang. ²⁵ Ng-lah iao voh-z ng-lah go Jing-ming Yïæ-'o-wô; Gyi we s-foh peh ng go liang-zih teng shü, ping-ts'ia Ngô djü-diao ng cong-nyiang-go bing-tsing. ²⁶ Ng-go di-ka li-hyang m-yiu do-sing-go, m-yiu feh-sang-go: ng nyih-ts-go su-moh, Ngô we s-teh gyi mun-tsoh? ²⁷ Ngô we kông-loh Ngô-go ǵe-nyin læ ng min-zin, ts'ao-lön ng sô tseo-tao di-fông-go pah-sing, s-teh ng long-tsong dziu-dih hyiang ng cün pe. ²⁸ Ngô we ts'a wông-fong læ ng min-zin, ken-tseo Hyi-vi nying, Kyüô-nen nying, Heh nying, li-k'æ ng. ²⁹ Ngô feh-we ih-nyin li-hyang long-tsong ken gyi-lah c'ih, sæn-lah din-di hwông-diao, yia-siu meo-zing we 'æ ng-lah: ³⁰ z mæn-mæn ken gyi-lah li-k'æ ng, teng-tao ng hying-wông tsih-ziu keh di-fông.

²⁰ 「我打發使差來爾個面前，路上保護爾，領爾到我所備辦個地方。²¹ 爾拉用謹慎，聽其說話，嚟得好觸犯其。因為其弗肯饒赦爾拉個過失。我個名頭是來其身上。²² 爾果然聽其說話，依我凡百所吩咐個介做。介呢我會做爾仇敵個仇敵，爾對頭個對頭。²³ 我使差會走來爾面前，領爾到亞摩利、赫、比利洗、迦南、希未、耶布土，箇星族份個地方。我就會滅掉其拉。²⁴ 爾弗可拜其拉個神明，弗可服侍其，也弗可依其拉個榜樣介做。爾要攏總除滅其拉，拆毀其拉偶像。²⁵ 爾拉要服侍爾拉個神明耶和華。其會賜福撥爾個糧食等水。並且我除掉爾中央個病症。²⁶ 爾個地界裏向嚟有墮身個，嚟有弗生個。爾日子個數目，我會使得其滿足。²⁷ 我會降落我個威嚴來爾面前，吵亂爾所走到地方個百姓。使得爾攏總仇敵向爾轉背。²⁸ 我會差黃蜂來爾面前，趕走希未人、迦南人、赫人，離開爾。²⁹ 我弗會一年裏向攏總趕其拉出，省勒田地荒掉，野獸茂盛會害爾拉。³⁰ 是慢慢趕其拉離開爾，等到爾興旺接受箇地方。

³¹ Ngô we ding ng-go ts-ka dzong 'Ong-hæ dzih tao Fi-li-z nying-go hæ, yi dzong kw'ông-iaë tao ^[1]do-'o: Ngô pih-ding pô keh di-fông-go pah-sing kao-fu ng siu-li, s-teh ken gyi-lah c'ih li-k'æ ng-go min-zin. ³² Ng feh-k'o teng gyi-lah, 'ôh-tsia gyi-go jing-ming, lih-iah. ³³ Feh-k'o peh gyi-lah deng-læ ng-go di-fông, k'ong-p'ô ying-yiu ng teh-ze Ngô. Ng ziah voh-z gyi-lah go jing-ming, pih-ding we 'æn ng loh ky'ün-t'ao-li.

³¹ 「我會定爾個址界，從紅海直到非利士人個海，又從曠野到大河^[1]。我必定把箇地方個百姓交付爾手裏，使得趕其拉出離開爾個面前。³² 爾弗可等其拉，或者其個神明，立約。³³ 弗可撥其拉庵來爾個地方。恐怕引誘爾得罪我。爾若服侍其拉個神明，必定會陷爾落圈套裏。」

[1] Ziu-z Pah-lah 'Ô. 就是伯拉河。(原註)

C. XXIV.

YIÆ-'O-WÔ yi teng Mo-si wô, Ng teng Üô-leng, Nô-tah, Üô-pi-wu, lin Yi-seh-lih tsiang-lao li-hyang, ts'ih-jih-go nying, tu tseo-zông tao Yïæ-'o-wô di-fông, yün-yün pa-pa. ² Tsih-yiu Mo-si hao teng Yïæ-'o-wô ts'ing-gying: gyi-lah feh-k'o gying-long, pah-sing yia feh-k'o dô-kô tseo-zông-læ. ³ Mo-si ziu læ, pô Yïæ-'o-wô keh-

sing shih-wô teng lih-li, tu djün peh pah-sing t'ing: cong pah-sing 'eh-k'eo-zi-dong we-teh, wô, Yiæ-'o-wô sô-wô-go ah-lah long-tsong i-leh gyi tso. ⁴ Mo-si sia-loh Yiæ-'o-wô keh-sing shih-wô; tsao-t'in-nyiang ky'i-læ, læ sæn-'ô zao dæn, tsiao Yi-seh-lih jih-nyi ts-p'a, lih jih-nyi keng djü-ts. ⁵ Yi ts'a Yi-seh-lih ts-seng-go 'eo-sang hyin væn-tsi teng zia-eng tsi-go ngeo peh Yiæ-'o-wô. ⁶ Mo-si pô gyi hyüih, ih-pun tsi-læ bun li, ih-pun tsah-læ dæn-li. ⁷ Yi do lih-iah-go shü doh peh pah-sing t'ing: gyi-lah z-ka wô, Væn-pah Yiæ-'o-wô sô-wô-go, ah-lah we i-leh gyi tso. ⁸ Mo-si ziu pô keh-go hyüih tsah-læ pah-sing sing-zông z-ka wô, Ng-lah k'en lih-iah-go hyüih, z Yiæ-'o-wô yüong keh-sing shih-wô teng ng-lah shih-lih-go. ⁹ Keh-tsao Mo-si, Üô-leng, Nô-tah, Üô-pi-wu, teng ts'ih-jih-go Yi-seh-lih tsiang-lao tseo-zông-ky'i. ¹⁰ Gyi-lah k'en-kyin Yi-seh-lih-go Jing-ming: Gyi kyiah-'ô ziang ts'ing-ts'ing-go nyüoh p'u-tih ka, ziang t'in-li-go t'i-tsih ka kwang-ts'ing. ¹¹ Jing-ming feh dong-siu peh Yi-seh-lih ts-seng tseng-kwe go nying: gyi-lah k'en-kyin Jing-ming, yi ky'üoh yi hah.

耶和華又等摩西話：「爾等亞倫、拿答、亞比戶，連以色列長老裏向七十個人，都走上到耶和華地方，遠遠拜拜。² 只有摩西好等耶和華親近。其拉弗可近攏。百姓也弗可大家走上來。」³ 摩西就來，把耶和華箇星說話等律例，都傳撥百姓聽。衆百姓合口齊動回答，話：「耶和華所話個阿拉攏總依勒其做。」⁴ 摩西寫落耶和華箇星說話。早天亮起來，來山下造壇，照以色列十二支派，立十二根柱子。⁵ 又差以色列子孫個後生獻燔祭等謝恩祭個牛撥耶和華。⁶ 摩西把其血，一半齒來盤裏，一半扎來壇裏。⁷ 又馱立約個書讀撥百姓聽。其拉是介話：

「凡百耶和華所話個，阿拉會依勒其做。」⁸ 摩西就把箇個血扎來百姓身上，是介話：「爾拉看，立約個血，是耶和華用箇星說話等爾拉設立個。」⁹ 箇遭摩西、亞倫、拿答、亞比戶，等七十個以色列長老走上去。¹⁰ 其拉看見以色列個神明。其腳下像青青個玉鋪的介，像天裏個體質介梗青。¹¹ 神明弗動手撥以色列子孫尊貴個人。其拉看見神明，又喫又喝。

¹² Yiæ-'o-wô teng Mo-si wô, Ng tseo-zông sæn, tao Ngô di-fông deng-loh, Ngô we s-peh ng zah-deo-go pe-ba, wa-yiu Ngô sô sia-go lih-fah teng 'ao-ling, s-teh ng hao kao gyi-lah. ¹³ Mo-si teng gyi bæn-z nying lah-shü-üô ziu ky'i-læ; Mo-si tseo-zông Jing-ming-go sæn-teng. ¹⁴ Teng tsiang-lao wô, Ng-lah hao læ dông-deo deng-tong, teng ah-lah cün-læ tao ng-lah di-fông: yiu Üô-leng Wu-r teng ng-lah dô-kô læ-tong; jü-ko nying yiu z-ken, hao kao-su gyi-lah. ¹⁵ Mo-si tseo-zông sæn-teng: sæn be yüing tsô-djü-de. ¹⁶ Yiæ-'o-wô-go yüong-wô deng-læ Si-næ sæn: yüing tsô-djü gyi loh-nyih: tao di-ts'ih nyih Yiæ-'o-wô dzong yüing-go cong-nyiang eo Mo-si. ¹⁷ Læ Yi-seh-lih ts-seng ngæn-zin Yiæ-'o-wô-go yüong-wô siang-mao ziang ho læ sæn-ting-den dziah ka. ¹⁸ Mo-si læ yüing cong-nyiang tseo-zông sæn-teng. Mo-si deng-læ sæn-teng s-jih nyih s-jih yia.

¹² 耶和華等摩西話：「爾走上山，到我地方庵落。我會賜撥爾石頭個碑牌，還有我所寫個律法等號令，使得爾好教其拉。」¹³ 摩西等其辦事人約書亞就起來。摩西走上神明個山頂。¹⁴ 等長老話：「爾拉好來蕩頭庵東，等阿拉轉來到爾拉地方。有亞倫、戶珥等爾拉大家來東。如果有人有事幹，好告訴其拉。」¹⁵ 摩西走上山頂。山被雲遮住了。¹⁶ 耶和華個榮華庵來西乃山。雲遮住其六日。到第七日耶和華從雲個中央謳摩西。¹⁷ 來以色列子孫眼前耶和華個榮華相貌像火來山頂頭着介。¹⁸ 摩西來雲中央走上山頂。摩西庵來山頂四十日四十夜。

YIÆ-'O-WÔ feng-fu Mo-si, wô, ² Ng yüong feng-fu Yi-seh-lih ts-seng hyin li-veh peh Ngô: væn-pah yiu ken-sing dzing-nyün-go ng hao tsih-ziu gyi hyin Ngô-go li-veh. ³ Ng sô kæ tsih-ziu-go li-veh ziu-z, kying, nying, dong; ⁴ læn, ts, 'ong, teng si-mô-pu, sæn-jiang mao; ⁵ nyin-'ong-go yüong-jiang-bi, hæ-keo-go bi, zao-kyiah-moh; ⁶ tin-liang-go yiu, lin hyiang-liao tso fu-go yiu, tso hyiang-ky'i-go; ⁷ wa-yiu pih-nyüoh, teng iao k'æn-læ ^[1]Yi-feh ^[2]Hyüong-ba-li-go nyüoh. ⁸ Gyi-lah hao teng Ngô ky'i-zao Sing-sô, s-teh Ngô deng-læ* gyi-lah cong-nyiang. ⁹ Tsiao Ngô ts-tin peh ng k'en-go, ziu-z tsiang-bong-go yiang-shih, teng long-tsong ky'i-ming-go yiang-shih, ng tu iao z-ka tso-fah.

耶和華吩咐摩西，話：²「爾用吩咐以色列子孫獻禮物撥我。凡百有甘心情願個，爾好接受其獻我個禮物。³爾所該接受個禮物就是：金、銀、銅；⁴藍、紫、紅，等細麻布，山羊毛；⁵染紅個雄羊皮，海狗個皮，皂莢木；⁶點亮個油，連香料做個油，做香氣個；⁷還有碧玉，等要嵌來以弗^[1]胸牌裏個^[2]玉。⁸其拉好等我起造聖所，使得我庵來其拉中央。⁹照我指點撥爾看個，就是帳篷個樣式，等攏總器皿個樣式，爾都要是介做法。

[1] Ziu-z Li-i. 就是裏衣。(原註)

[2] Ziu-z hyüong-kwun-deo ta go. 就是胸腕頭帶個。(原註)

¹⁰ lao yüong zao-kyiah-moh tso lah-siang: dziang liang ^[1]ah-ma pun, kw'eh ih ah-ma pun, kao ih ah-ma pun. ¹¹ lao yüong ts'ih-kying pao gyi, li-nga tu pao-kying: zông-deo dön-ky'ün tso kying-ts-go hwô-pin. ¹² Yia iao teng gyi cü s-go kying-ky'ün ting-læ s-koh; dông-pin liang-go ky'ün, keh-pin liang-go ky'ün. ¹³ Yi yüong zao-kyiah-moh tso kông, pao-leh kying-ts. ¹⁴ lao c'ün kông læ iah-siang pin-yin-go ky'ün-li, hao dæ keh iah-siang. ¹⁵ Kông iao dziang fông-læ iah-siang-go ky'ün-li, feh-k'o do-c'ih. ¹⁶ Ngô sô s-peh ng-go lih-fah, hao k'ông-læ iah-siang-li. ¹⁷ Yi iao yüong ts'ih-kying tso Eng-zo; dziang liang ah-ma pun, kw'eh ih ah-ma pun. ¹⁸ Yia iao tso liang-go kying-ts ^[2]Kyi-lu-ping, z ts'ô-c'ih-go sang-weh, fông-læ eng-zo-go liang-pin. ¹⁹ Dông-pin tso ih-go kyi-lu-ping, keh-pin yia tso ih-go kyi-lu-ping: dzong eng-zo-go liang-pin ng iao tso kyi-lu-ping. ²⁰ Kyi-lu-ping iao kao-kao sing-kæ gyi yih-sao; gyi yih-sao tsao-djü eng-zo: gyi min-k'ong liang-pin siang-te: kyi-lu-ping-go min-k'ong iao hyiang-djoh eng-zo. ²¹ Ng hao pô eng-zo fông-læ iah-siang zông; Ngô sô s-peh ng-go lih-fah, hao k'ông-læ iah-siang-li. ²² Læ keh-deo Ngô we teng ng we-djoh; dzong iah-siang zông-deo-go eng-zo, liang kyi-lu-ping cong-nyiang, Ngô we pô Ngô væn-pah sô feng-fu ng djün-peh Yi-seh-lih ts-seng-go kyæ-ming, wô hyiang ng dao.

¹⁰「要用皂莢木做約箱：長兩阿買^[1]半，闊一阿買半，高一阿買半。¹¹要用赤金包其，裏外都包金。上頭團圈做金子個花邊。¹²也要等其鑄四個金圈，釘來四角。蕩邊兩個圈，箇邊兩個圈。¹³又用皂莢木做槓，包勒金子。¹⁴要穿槓來約箱邊沿個圈裏，好抬箇約箱。¹⁵槓要長放來約箱個圈裏，弗可馱出。¹⁶我所賜撥爾個律法，好因來約箱裏。¹⁷又要用赤金做恩座。長兩阿買半，闊一阿買半。¹⁸也要做兩個金子基路冰^[2]，是車出個生活，放來恩座個兩邊。¹⁹蕩邊做一個基路冰，箇邊也做一個基路冰。從恩座個兩邊爾要做基路冰。²⁰基路冰要高伸開其翼梢。其翼梢罩住恩座。其面孔兩邊相對。基路冰個面孔要向着恩座。²¹爾好把恩座放來約箱上。我所賜撥爾個律法，好因來約箱裏。²²來箇頭我會等爾會着。從約箱上頭個恩座，兩基路冰中央，我會把我凡百所吩咐爾，傳撥以色列子孫個誠命，話向爾道。

[1] lh-ah-ma da-iah Lu-pæn ts'ah nyi ts'ah. 一阿買大約魯班尺一尺。(原註)

[2] *K'en* Ts. 3. 24. 看 Ts. 3. 24. (原註)

²³ Yia iao yüong zao-kyiah-moh tso En-coh: dziang liang [¹ah-ma, kw'eh ih ah-ma, kao ih ah-ma pun. ²⁴ lao yüong ts'ih-kying pao gyi; dön-ky'ün tso kying-ts-go hwô-pin. ²⁵ lao teng gyi dön-ky'ün tso yin; yin kw'eh ih siu-công; yin-go dön-ky'ün yia iao tso kying-ts-go hwô-pin. ²⁶ Yia iao teng gyi tso s-go kying-ky'ün, ting-læ s-koh-go s-tsah kyiah-li. ²⁷ Gyi ky'ün ting iao teng pin siang-gying, hao c'ün kông dæ en-coh. ²⁸ Yi iao yüong zao-kyiah-moh tso kông pao-leh kying-ts, hao dæ en-coh. ²⁹ Yi tso bun, lu, un, teng din-tsiu-go pe-ts; tu yüong ts'ih-kying tso-go. ³⁰ Yi læ en-coh zông ng iao pô pa-kæn-go ping, z-djông pa læ Ngô-go min-zin.

²³ 「也要用皂莢木做案桌：長兩阿買^[1]，闊一阿買，高一阿買半。²⁴ 要用赤金包其，團圈做金子個花邊。²⁵ 要等其團圈做沿；沿闊一手掌。沿個團圈也要做金子個花邊。²⁶ 也要等其做四個金圈，釘來四角個四隻腳裏。²⁷ 其圈釘要等邊相近，好穿槓抬案桌。²⁸ 又要用皂莢木做槓包勒金子，好抬案桌。²⁹ 又做盤、爐、碗、等奠酒個杯子。都用赤金做個。³⁰ 又來案桌上爾要把擺間個餅，時常擺來我個面前。

[1] *lh-ah-ma* da-iah Lu-pæn ts'ah nyi ts'ah. 一阿買大約魯班尺一尺。(原註)

³¹ Ng iao yüong ts'ih-kying tso Teng-dæ; z kyi-ky'i ts'ô-c'ih-go sang-weh: gyi ken-ts, ô-ts, nyü, tsih, hwô, yia tu z-ka. ³² Yiu loh-go ô-ts ts'ô-c'ih pin-yin: teng-dæ dông-pin yiu sæn-ts, teng-dæ keh-pin yiu sæn-ts. ³³ Dông-pin ô-ts tso sæn-go nyü ziang 'ang-nying ka, ih tsih, ih-tô hwô; keh-pin ô-ts yia tso sæn-go nyü, ziang 'ang-nying ka, ih tsih, ih tô hwô: gyi loh-go ô-ts ts'ô-c'ih teng-dæ, tu z-ka. ³⁴ Teng-dæ ken-ts tso s-go nyü ziang 'ang-nying ka, yia yiu tsih teng hwô. ³⁵ Liang-go ô-ts 'ô-deo yiu ih-go tsih: yi-z liang-go ô-ts 'ô-deo yiu ih-go tsih; yi-z liang-go ô-ts 'ô-deo yiu ih-go tsih; tsiao teng-dæ sô ts'ô-c'ih, loh-go ô-ts. ³⁷ Gyi tsih teng ô-ts tu z-ka: tu iao yüong ts'ô-c'ih ts'ih-kying tso-go. ³⁷ Yi teng gyi tso ts'ih-go teng-tsæn; en-læ dæ-zông, hao te-min tsiao-djoh. ³⁸ Teng-tsæn-go tsin-tao, teng tsin-tao-go bun, tu iao yüong ts'ih-kying tso-go. ³⁹ Tso teng-dæ teng keh-sing ky'i-ming, iao yüong ts'ih-kying ih [¹da-ling. ⁴⁰ Ng yüong liu-sing, tsiao sæn-teng sô ts-tin ng-go yang-shih ka tso.

³¹ 「爾要用赤金做燈臺；是機器車出個生活。其稈子、桎枝、蕊、節、花，也都是介。³² 有六個桎枝岔出邊沿。燈臺蕩邊有三枝，燈臺箇邊有三枝。³³ 蕩邊桎枝做三個蕊像杏仁介，一節、一朵花；箇邊桎枝也做三個蕊，像杏仁介，一節、一朵花。其六個桎枝岔出燈臺，都是介。³⁴ 燈臺稈子做四個蕊像杏仁介，也有節等花。³⁵ 兩個桎枝下頭有一個節。又是兩個桎枝下頭有一個節。又是兩個桎枝下頭有一個節。照燈臺所岔出，六個桎枝。³⁶ 其節等桎枝都是介。都要用車出赤金做個。³⁷ 又等其做七個燈盞。安來臺上，好對面照着。³⁸ 燈盞個剪刀，等剪刀個盤，都要用赤金做個。³⁹ 做燈臺等箇星器皿，要用赤金一大林^[1]。⁴⁰ 爾用留心，照山頂所指點爾個樣式介做。」

[1] *Ziu-z lh-ts'in-liang* ka kwông-kying. 就是一千兩介光景。(原註)

C. XXVI.

NG we-leh Tsiang-bong, iao yüong si-mô-pu tso jih-foh mun-tsiang, yüong læn, ts, 'ong, teng tsih-kyi s-vu tsih-c'ih kyi-lu-ping hwô-veng go ka tso. ² Me-foh mun-tsiang, dziang nyiæn-pah [¹ah-ma, kw'eh s ah-ma:

keh-sing mun-tsiang tu ih-yiang do. ³ Ng-foh mun-tsiang dô-kô lin-long: yü-to ng-foh yia dô-kô lin-long. ⁴ Ng iao mun-tsiang ih-pin, yüong læn-sin tso p'æn læ lin-long di-fông: yi iao læ di-nyi foh mun-tsiang ih-pin lin-long di-fông yia z-ka tso. ⁵ Ng læ dông ih-foh mun-tsiang tso ng-jih-go p'æn, yi læ di-nyi foh mun-tsiang lin-long-go ih-pin tso ng-jih-go p'æn; s-teh p'æn hao liang-'ô tsih-long. ⁶ Ng iao tso ng-jih-go kying keo-ts, yüong keo-ts lin-long mun-tsiang dzing ih-zo tsiang-bong. ⁷ Ng iao yüong sæn-yiang mao tso mun-tsiang kæ-djü tsiang-bong: t'ong-gong tso jih-ih foh mun-tsiang. ⁸ Me-foh mun-tsiang dziang sæn-jih ^[1]ah-ma, kw'eh s ah-ma: jih-ih foh mun-tsiang tu ih-yiang do. ⁹ Ng iao pô ng-foh mun-tsiang lin-tæn-long, keh loh-foh mun-tsiang yia lin-tæn-long: tsih-yiu di-loh foh mun-tsiang hao yüh-tæn-long foh-læ tsiang-bong min-zin. ¹⁰ Læ dông-pin mun-tsiang lin-long di-fông, iao tso ng-jih-go p'æn; læ keh-pin mun-tsiang lin-long di-fông, yia tso ng-jih-go p'æn. ¹¹ Yi tso ng-jih-go dong-keo, pô keo-ts c'ün-tsing p'æn-li, lin-long tso ih-go tsiang-bong. ¹² Tsiang-bong mun-tsiang-go to-deo, ziu-z to-yü-go pun-foh mun-tsiang, hao dang-loh læ tsiang-bong 'eo-pe. ¹³ Tsiang-bong mun-tsiang to-yü-go dziang-deo, dông-pin ih ^[1]ah-ma, keh-pin ih ah-ma, hao dang-loh læ tsiang-bong liang-pin, kæ-djü gyi. ¹⁴ Iao yüong nyin-'ong-go yüong-yiang-bi, teng tsiang-bong tso kæ; wa-yiu zông-deo hæ-keo-go bi kæ-tih.

「爾爲了帳篷，要用細麻布做十幅幔帳，用藍、紫、紅，等織機師父織出基路冰花紋個介做。² 每幅幔帳，長廿八阿買^[1]，闊四阿買。箇星幔帳都一樣大。³ 五幅幔帳大家連攏。餘多五幅也大家連攏。⁴ 爾要幔帳一邊，用藍線做襻來連攏地方。又要來第二幅幔帳一邊連攏地方也是介做。⁵ 爾來蕩一幅幔帳做五十個襻，又來第二幅幔帳連攏個一邊做五十個襻。使得襻好兩下接攏。⁶ 爾要做五十個金鈎子，用鈎子連攏幔帳，成一座帳篷。⁷ 爾要用山羊毛做幔帳蓋住帳篷。統共做十一幅幔帳。⁸ 每幅幔帳長三十阿買^[1]，闊四阿買。十一幅幔帳都一樣大。⁹ 爾要把五幅幔帳連帶攏，箇六幅幔帳也連帶攏。只有第六幅幔帳好拐帶攏覆來帳篷面前。¹⁰ 來蕩邊幔帳連攏地方，要做五十個襻。來箇邊幔帳連攏地方，也做五十個襻。¹¹ 又做五十個銅鈎，把鈎子穿進襻裏，連攏做一個帳篷。¹² 帳篷幔帳個多頭，就是多餘個半幅幔帳，好宕落來帳篷後背。¹³ 帳篷幔帳多餘個長頭，蕩邊一阿買^[1]，箇邊一阿買，好宕落來帳篷兩邊，蓋住其。¹⁴ 要用染紅個雄羊皮，等帳篷做蓋。還有上頭海狗個皮蓋的。

[1] lh-ah-ma da-iah Lu-pæn ts'ah nyi ts'ah. 一阿買大約魯班尺一尺。(原註)

¹⁵ Yi we-leh tsiang-bong iao yüong zao-kyiah-moh tso dzih teng-ky'i-go pæn. ¹⁶ lh-kw'e pæn, dziang jih ^[1]ah-ma, kw'eh ih ah-ma pun. ¹⁷ Kw'e-tang-kw'e yiu liang-go shing-deo ih-ba sang; tsiao-leh ka-go hao tso tsiang-bong keh-sing pæn. ¹⁸ Ng teng tsiang-bong tso pæn, iao nen-pin dziao-nen-go nyiæn-kw'e. ¹⁹ Nyiæn-kw'e pæn 'ô-deo ng iao tso s-jih-go nying zo-ts: ih-kw'e pæn 'ô-deo liang-go zo-ts tsih-djoh gyi liang-go shing-deo; yi ih-kw'e pæn 'ô-deo liang-go zo-ts tsih-djoh gyi liang-go shing-deo. ²⁰ Ng tsæ teng tsiang-bong tso pæn, iao poh-pin nyiæn-kw'e. ²¹ Yia teng gyi tso s-jih-go nying zo-ts; ih-kw'e pæn 'ô-deo liang-go zo-ts, yi ih-kw'e pæn 'ô-deo liang-go zo-ts. ²² Ng teng tsiang-bong 'eo-pe dziao-si-go, iao tso loh-kw'e pæn. ²³ Wa-yiu teng tsiang-bong 'eo-pe liang koh-loh-deo tso liang-kw'e pæn. ²⁴ Gyi 'ô-deo lin-long, gyi zông-deo ting-den yia lin-long læ ih-go ky'ün-li: liang-kw'e tu z-ka, z we-leh liang koh-loh-deo tso-go. ²⁵ T'ong-gong pah-kw'e pæn, jih-loh-go nying zo-ts: ih-kw'e pæn 'ô-deo, liang-go zo-ts; yi ih-kw'e pæn 'ô-deo, liang-go zo-ts. ²⁶ Yi yüong zao-kyiah-moh tso wang-shün; tsiang-bong dông-pin-go pæn yiu ng-go shün; ²⁷ tsiang-bong

keh-pin-go pæn yia yiu ng-go shün. ²⁸ Pæn cong-nyiang-go wang-shün iao dzong dông-pin dzih tao keh-pin. ²⁹ Pæn tu iao pao-kying; yi tso kying-ky'ün hao peh wang-shün c'ün-ko: gyi shün yia z pao-kying. ³⁰ Ng iao shih-lih keh-go tsiang-bong, tsiao Ngô sæn zông-teng ts-tin peh ng go yiang-shih.

¹⁵ 「又爲了帳篷要用皂莢木做直敦起個板。¹⁶ 一塊板，長十阿買^[1]，闊一阿買半。¹⁷ 塊打塊有兩個樺頭一排生。照勒介個好做帳篷箇星板。¹⁸ 爾等帳篷做板，要南邊朝南個廿塊。¹⁹ 廿塊板下頭爾要做四十個銀座子。一塊板下頭兩個座子，接着其兩個樺頭。又一塊板下頭兩個座子，接着其兩個樺頭。²⁰ 爾再等帳篷做板，要北邊廿塊。²¹ 也等其做四十個銀座子。一塊板下頭兩個座子，又一塊板下頭兩個座子。²² 爾等帳篷後背朝西個，要做六塊板。²³ 還有等帳篷後背兩角落頭做兩塊板。²⁴ 其下頭連攏，其上頭頂頭也連攏來一個圈裏。兩塊都是介，是爲了兩角落頭做個。²⁵ 統共八塊板，十六個銀座子。一塊板下頭兩個座子。又一塊板下頭兩個座子。²⁶ 又用皂莢木做橫門。帳篷蕩邊個板有五個門。²⁷ 帳篷箇邊個板也有五個門。²⁸ 板中央個橫門要從蕩邊直到箇邊。²⁹ 板都要包金。又做金圈好撥橫門穿過。其門也是包金。³⁰ 爾要設立箇個帳篷，照我山上頂指點撥爾個樣式。

[1] K'en 2 tsih. 看 2 節。(原註)

³¹ Ng iao yüong læn, ts, 'ong, teng si-mô-pu, tsih-kyi s-vu sô tsih-c'ih kyì-lu-ping hwô-veng-go tso mun-tsiang. ³² Hao kwô-læ zao-kyiah-moh sô tso s-keng pao-kying djü-ts zông: yiu kying-keo læ s-go nying zo-ts zông-deo. ³³ lao kwô mun-tsiang læ keo-ts-'ô; iah-siang ts'ing-ts'ing mun-tsiang li-hyang: keh mun-tsiang teng ng hao kah-k'æ Sing-sô teng Ts-sing-sô. ³⁴ Ts-sing-sô li-hyang ng iao pô eng-zo en-læ iah-siang zông-deo. ³⁵ En-coh iao pa-læ mun-tsiang nga; wa-yiu teng-dæ læ tsiang-bong-go nen-pin, teng en-coh siang-te: keh en-coh z iao pa læ poh-pin. ³⁶ lao yüong siu-hwô s-vu sô tso-c'ih-go læn, ts, 'ong, teng si-mô-pu, tso tsiang-bong-go meng-lin. ³⁷ We-leh meng-lin iao tso ng-keng zao-kyiah-moh djü-ts, long-tsong pao-kying; gyi keo-ts yia z kying-ts: yi iao teng gyi cü ng-go dong zo-ts.

³¹ 「爾要用藍、紫、紅，等細麻布，織機師父所織出基路冰花紋個做幔帳。³² 好掛來皂莢木所做四根包金柱子上。有金鈎來四個銀座子上頭。³³ 要掛幔帳來鈎子下。約箱請請幔帳裏向。箇幔帳等爾好隔開聖所等至聖所。³⁴ 至聖所裏向爾要把恩座安來約箱上頭。³⁵ 案桌要擺來幔帳外。還有燈臺來帳篷個南邊，等案桌相對。箇案桌是要擺來北邊。³⁶ 要用繡花師父所做出個藍、紫、紅，等細麻布，做帳篷個門簾。³⁷ 爲了門簾要做五根皂莢木柱子，攏總包金。其鈎子也是金子。又要等其鑄五個銅座子。」

C. XXVII.

IAO yüong zao-kyiah-moh tso Tsi-dæn; dziang ng ^[1]ah-ma, kw'eh ng ah-ma, s-pin cün-fông; kao sæn ah-ma. ² Læ gyi s-pin tso s-tsah koh; tso koh ziu-z tso-kw'e liao-tsoh yüong dong pao-c'ih. ³ Yi tso tsi-hwe-go bun teng ho-hyin, un, nyüoh-keo, ho-lu keh-sing ky'i-ming tu yüong dong tso-c'ih. ⁴ Yi iao teng gyi tso dong-s-go mông; mông-go s-koh, tso s-go dong ky'ün. ⁵ Ng iao fông gyi læ dæn hwô-pin ti-'ô, s-teh mông k'eo-k'eo læ dæn pun-gyüih-li. ⁶ Yi yüong zao-kyiah-moh iao teng dæn tso kông; yüong dong pao-c'ih. ⁷ Kông iao c'ün-læ ky'ün-li, s-teh kông læ dæn-go liang-pin hao dæ gyi ky'ì.

「要用皂莢木做祭壇。長五阿買，闊五阿買，四邊轉方，高三阿買。² 來其四邊做四隻角。做角就是做塊料作，用銅包出。³ 又做齒灰個盤等火杴、碗、肉鉤、火爐箇星器皿，都用銅做出。⁴ 又要等其做銅絲個網。網個四角，做四個銅圈。⁵ 爾要放其來壇花邊底下，使得網扣扣來壇半橛裏。⁶ 又用皂莢木要等壇做槓，用銅包出。⁷ 槓要穿來圈裏，使得槓來壇個兩邊好抬其去。

[1] *K'en C. 26. 2.* 看 *C. 26. 2.* (原註)

⁸ Dæn iao yüong pæn tso-c'ih, li-hyang k'ong-sing: tsiao sæn zông-teng sô ts-tin peh ng-go yang-shih ka tso. ⁹ Ng iao teng tsiang-bong tso Yü-ziang: læ nen-pin dziao-nen-go yü-ziang iao yüong si-mô-pu tso mun-tsiang; ih-pin dziang yiu ih-pah ^[1]ah-ma. ¹⁰ Gyi djü-ts nyiæn-keng, dong zo-ts nyiæn-go; djü-ts-go keo-ts teng wang-tông tu yüong nying-ts tso-go. ¹¹ Gyi poh-pin yia z-ka: yiu mun-tsiang, dziang ih-pah ah-ma; gyi djü-ts nyiæn-keng, dong zo-ts nyiæn-go; djü-ts-go keo-ts teng wang-tông tu yüong nying-ts tso-go. ¹² Wa-yiu læ si-pin yü-ziang kw'eh-go di-fông, mun-tsiang ng-jih ah-ma; gyi djü-ts jih-keng, zo-ts jih-go. ¹³ Wa-yiu yü-ziang tong-pin kw'eh ng-jih ah-ma. ¹⁴ Đông-pin-go mun-tsiang jih-ng ah-ma; gyi djü-ts sæn-keng, zo-ts sæn-go. ¹⁵ Keh-pin-go mun-tsiang jih-ng ah-ma; gyi djü-ts sæn-keng, zo-ts sæn-go. ¹⁶ Yi iao tso yü-ziang-go meng-lin, dziang nyiæn ah-ma; iao yüong siu-hwô s-vu sô tso-go læn, ts, 'ong, teng si-mô-pu tso-go: gyi djü-ts s-keng, zo-ts s-go. ¹⁷ Yü-ziang dön-ky'ün keh-sing djü-ts, tu yiu nying-ts wang-tông, nying keo-ts, dong zo-ts. ¹⁸ Yü-ziang dziang ih-pah ah-ma, kw'eh tu z ng-jih ah-ma, kao ng ah-ma; mun-tsiang iao yüong si-mô-pu; zo-ts tu z dong-go. ¹⁹ Tsiang-bong-li væn-pah sô yüong-go ky'i-ming, teng gyi ting-cü, lin yü-ziang-go ting-cü, tu yüong dong tso-go.

⁸ 「壇要用板做出，裏向空心。照山上頂所指點撥爾個樣式介做。⁹ 爾要等帳篷做圍牆。來南邊朝南個圍牆要用細麻布做幔帳。一邊長有一百阿買^[1]。¹⁰ 其柱子廿根，銅座子廿個。柱子個鉤子等橫檔都用銀子做個。¹¹ 其北邊也是介。有幔帳，長一百阿買。其柱子廿根，銅座子廿個。柱子個鉤子等橫檔都用銀子做個。¹² 還有來西邊圍牆闊個地方，幔帳五十阿買。其柱子十根，座子十個。¹³ 還有圍牆東邊闊五十阿買。¹⁴ 蕩邊個幔帳十五阿買。其柱子三根，座子三個。¹⁵ 箇邊個幔帳十五阿買。其柱子三根，座子三個。¹⁶ 又要做圍牆個門簾，長廿阿買。要用繡花師父所做個藍、紫、紅，等細麻布做個。其柱子四根，座子四個。¹⁷ 圍牆圍圈箇星柱子，都有銀子橫檔、銀鉤子、銅座子。¹⁸ 圍牆長一百阿買，闊都是五十阿買，高五阿買。幔帳要用細麻布。座子都是銅個。¹⁹ 帳篷裏凡百所用個器皿，等其釘子，連圍牆個釘子，都用銅做個。

[1] *K'en C. 26. 2.* 看 *C. 26. 2.* (原註)

²⁰ Ng iao feng-fu Yi-seh-lih ts-seng yüong ts'ing-kyih-go ken-læn sông yiu tso liang-kwông, do-læ peh ng, s-teh teng-tsæn z-k'eh hao tin. ²¹ Læ kong-we tsiang-bong iah-siang min-zin, mun-tsiang nga-deo, Üô-leng teng gyi ng-ts dzong yia-deo tao t'in-nyiang iao læ Yiæ-'o-wô min-zin tsing-teng gyi. Keh-z teng Yi-seh-lih ts-seng tao shü-shü dæ-dæ tso üong-yün-go lih-li.

²⁰ 「爾要吩咐以色列子孫，用清潔個橄欖春油做亮光，馱來撥爾，使得燈盞時刻好點。²¹ 來公會帳篷約箱面前、幔帳外頭，亞倫等其兒子，從夜頭到天亮，要來耶和華面前整頓其。箇是等以色列子孫到世世代代做永遠個律例。」

C. XXVIII.

NG læ Yi-seh-lih ts-seng cong-nyiang eo ng ah-ko Üô-leng lin gyi ng-ts tao ng di-fông, hao tso Ngô-go tsi-s; ziu-z Üô-leng teng Üô-leng-go ng-ts, Nô-tah, Üô-pi-wu, Yi-li-üô-sah, Yi-da-mô. ² Yi teng ng ah-ko Üô-leng tso sing-jün i-zông, sön yüong-wô, sön yin-li. ³ Ng iao feng-fu keh-sing ts'ong-ming-go nying, ziu-z Ngô sô c'ong-mun gyi-lah cü-we ling-sing-go, ky'i tso Üô-leng-go i-zông, hao tseng-ky'i gyi-lah, tso Ngô-go tsi-s. ⁴ Gyi-lah sô iao tso-go i-zông ziu-z, Hyüong-ba, Yi-feh, T'ao-i, Hwô-i, teng Mao, Ta keh-sing: z-ka teng ng ah-ko Üô-leng lin gyi ng-ts tso sing-jün i-zông; s-teh gyi hao tso Ngô-go tsi-s. ⁵ Gyi-lah iao yüong kying, læn, ts, 'ong, teng si-mô-pu. ⁶ Tsih hwô-deo s-vu sô tso Yi-feh, iao yüong tsih-c'ih-go kying, læn, ts, 'ong, teng si-mô-pu. ⁷ lao yiu liang-go p'i-kyin lin-læ liang-pin; z-ka-go lin-long. ⁸ Yi-feh zông-deo tsih-c'ih hwô-veng-go ta teng yi-feh-go sang-weh ih-ying; ziu-z kying, læn, ts, 'ong, teng si-mô-pu tso-go. ⁹ Wa-yiu do liang-kw'e pih-nyüoh, zông-deo k'eh Yi-seh-lih ng-ts-go ming-z: ¹⁰ gyi-lah loh-go ming-z læ ih-kw'e nyüoh-li; wa-yiu loh-go ming-z yi læ ih-kw'e nyüoh-li, tsiao gyi-lah sang-go ts'-jü. ¹¹ K'eh nyüoh s-vu ziang k'eh-ing ka, hao k'eh Yi-seh-lih ng-ts-go ming-z læ keh liang-kw'e nyüoh-li: ng ziu hao k'æn gyi læ kying zo-ts-li. ¹² lao en keh liang-kw'e nyüoh læ yi-feh-go kyin-kah-deo, tso Yi-seh-lih ts-seng kyi-nying-go nyüoh: z-ka Üô-leng kyin-kah-deo pe gyi-lah go ming-z læ Yiæ-'o-wô min-zin tso kyi-nying.

「爾來以色列子孫中央謳爾阿哥亞倫連其兒子到爾地方，好做我個祭司。就是亞倫等亞倫個兒子，拿答、亞比戶、以利亞撒、以大瑪。² 又等爾阿哥亞倫做聖善衣裳，算榮華，算豔麗。³ 爾要吩咐箇星聰明個人，就是我所充滿其拉智慧靈性個，去做亞倫個衣裳，好尊起其拉，做我個祭司。⁴ 其拉所要做個衣裳就是：胸牌、以弗、套衣、花衣，等帽、帶箇星。是介等爾阿哥亞倫連其兒子做聖善衣裳，使得其好做我個祭司。⁵ 其拉要用金、藍、紫、紅，等細麻布。⁶ 織花頭師父所做以弗，要用織出個金、藍、紫、紅，等細麻布。⁷ 要有兩個披肩連來兩邊。是介個連攏。⁸ 以弗上頭織出花紋個帶等以弗個生活一樣。就是金、藍、紫、紅，等細麻布做個。⁹ 還有馱兩塊碧玉，上頭刻以色列兒子個名字。¹⁰ 其拉六個名字來一塊玉裏。還有六個名字又來一塊玉裏，照其拉生個次序。¹¹ 刻玉師父像刻印介，好刻以色列兒子個名字來箇兩塊玉裏。爾就好嵌其來金座子裏。¹² 要安箇兩塊玉來以弗個肩胛頭，做以色列子孫記認個玉。是介亞倫肩胛頭揸其拉個名字來耶和華面前做記認。

¹³ Yi iao tso kying zo-ts. ¹⁴ Pin liang-keng ts'ih-kying s go lin-diao dzin-long ziang zing ka go; yüong lin-diao keo-djü kying zo-ts. ¹⁵ Yia iao tsih-c'ih sing-p'un-go Hyüong-ba ziu-z ts'ih-kong s-vu sô tso, ziang yi-feh-go sang-weh; yüong kying, læn, ts, 'ong, teng si-mô-pu tso-go. ¹⁶ lao cün-fông-go liang-zeng: dziang ih-t'oh, kw'eh yia ih-t'oh. ¹⁷ lao k'æn nyüoh læ cong-nyiang, nyüoh yiu s-da: deo-ih da, mô-nao, dæn-wông nyüoh, t'eo-kwông nyüoh; keh z di-ih da. ¹⁸ Di-nyi da, ts'ong-nyüoh, ts'ing-nyüoh, kying-kông-zah. ¹⁹ Di-sæn da, ts'ih-nyüoh, bah mô-nao, ts-nyüoh. ²⁰ Di-s da, loh-nyüoh, ts'ông-nyüoh, pih-nyüoh: tu k'æn-læ kying zo-ts-li. ²¹ Nyüoh yiu jih-nyi kw'e, tsiao Yi-seh-lih ng-ts-go ming-z, ziang ing ka k'eh; ih-kw'e nyüoh ih-go ming-z, i gyi jih-nyi-go ts-p'a. ²² Læ hyüong-ba-go liang-pin iao tso liang-keng ts'ih-kying s go lin-diao dzin-long ziang zing ka go. ²³ Yi teng hyüong-ba tso liang-go kying ky'ün, liang-go ky'ün en læ hyüong-ba-go liang-pin. ²⁴ lao do keh liang-keng ziang zing ka go kying lin-diao kwô-læ hyüong ba-go liang-pin ky'ün-li. ²⁵ Keh liang-keng lin-diao-go deo, iao teng liang-go zo-ts lin-tæn-long, en-læ yi-feh-go kyin-kah-deo min-zin. ²⁶ Yi iao tso liang-go kying ky'ün, fông læ hyüong-ba liang-pin-go yin-li, læ yi-feh-go li-pun-pin. ²⁷ Tsæ tso liang-go kying ky'ün, fông-læ yi-feh liang-pin-go 'ô-deo, te-djoh min-zin lin-long di-fông, læ yi-feh-go tsih-c'ih hwô-ta

ts zông. ²⁸ Hyüong-ba-go ky'ün iao yüong læn-ta bo-djü, teng yi-feh-go ky'ün lin-long, læ tsih-c'ih hwô-ta ts zông, s-teh hyüong-ba feh-we li-k'æ yi-feh. ²⁹ Üô-leng tseo-tsing Sing-sô z-'eo, iao pô sing-p'un-go hyüong-ba, yiu Yi-seh-lih ng-ts ming-z sia-tih-go, ta-læ hyüong-kwun-deo tso üong-yün kyi-nying læ Yiæ-'o-wô min-zin. ³⁰ Ng iao pô ^[1]U-ling teng T'u-ming fông-læ sing-p'un-go hyüong-ba-li; Üô-leng tseo-tsing læ Yiæ-'o-wô min-zin z-'eo, iao ta gyi læ hyüong-kwun-deo; ziu-z Üô-leng-go hyüong-kwun-deo z-k'eh ta-leh Yi-seh-lih ng-ts-go sing-p'un læ Yiæ-'o-wô min-zin. ³¹ Yi yüong jing-læn tso yi-feh li-hyang-go T'ao-i. ³² Gyi zông-deo tông cong-nyiang k'æ ih-go dong: dong dön-ky'ün iao yüong tsih-c'ih-go hwô-deo tso yin; ziang kw'e-kah ka, s-teh dong feh-we ts'ô-k'æ. ³³ Gyi 'ô-yin yüong læn, ts, 'ong, tso-c'ih zih-liu læ gyi dön-ky'ün yin-li, yi tso kying-ts hyiang-ling læ dön-ky'ün kah-long-tih. ³⁴ Ih-go kying-ling, ih-go zih-liu; yi ih-go kying-ling, yi ih-go zih-liu, læ t'ao-i dön-ky'ün-go 'ô yin. ³⁵ Üô-leng pih-iao c'ün-ts ky'i bæen-z; ka-ni, gyi tseo-tsing Sing-sô tao Yiæ-'o-wô min-zin, k'o-yi t'ing-meng gyi sing-hyang; tseo-c'ih-go z-'eo yia z-ka: s-teh feh-we sông-ming.

¹³ 「又要做金座子。¹⁴ 編兩根赤金絲個鏈條，纏攏像繩介個。用鏈條勾住金座子。¹⁵ 也要織出審判個胸牌，就是尺工師父所做，像以弗個生活。用金、藍、紫、紅，等細麻布做個。¹⁶ 要轉方個兩層。長一庹，闊也一庹。¹⁷ 要嵌玉來中央。玉有四塊。頭一塊，瑪瑙、淡黃玉、透光玉。箇是第一塊。¹⁸ 第二塊，蔥玉、青玉、金剛石。¹⁹ 第三塊，赤玉、白瑪瑙、紫玉。²⁰ 第四塊，綠玉、蒼玉、碧玉。都嵌來金座子裏。²¹ 玉有十二塊，照以色列兒子個名字，像印介刻。一塊玉一個名字，依其十二個支派。²² 來胸牌個兩邊要做兩根赤金絲個鏈條纏攏像繩介個。²³ 又等胸牌做兩個金圈，兩個圈安來胸牌個兩邊。²⁴ 要馱箇兩根像繩介個金鏈條掛來胸牌個兩邊圈裏。²⁵ 箇兩根鏈條個頭，要等兩個座子連帶攏，安來以弗個肩胛頭面前。²⁶ 又要做兩個金圈，放來胸牌兩邊個沿裏，來以弗個裏半邊。²⁷ 再做兩個金圈，放來以弗兩邊個下頭，對着面前連攏地方，來以弗個織出花帶子上。²⁸ 胸牌個圈要用藍帶縛住，等以弗個圈連攏，來織出花帶子上，使得胸牌弗會離開以弗。²⁹ 亞倫走進聖所時候，要把審判個胸牌，有以色列兒子名字寫的個，帶來胸腕頭，做永遠記認來耶和華面前。³⁰ 爾要把烏陵等土明^[1]放來審判個胸牌裏。亞倫走進來耶和華面前時候，要帶其來胸腕頭。就是亞倫個胸腕頭時刻帶勒以色列兒子個審判來耶和華面前。³¹ 又用純藍做以弗裏向個套衣。³² 其上頭當中央開一個洞。洞圍圈要用織出個花頭做沿。像盔甲介，使得洞弗會扯開。³³ 其下沿用藍、紫、紅，做出石榴來其圍圈沿裏，又做金子響鈴來圍圈夾攏的。³⁴ 一個金鈴，一個石榴。又一個金鈴，又一個石榴，來套衣圍圈個下沿。³⁵ 亞倫必要穿仔去辦事。介呢，其走進聖所到耶和華面前，可以聽聞其聲響。走出個時候也是介。使得弗會喪命。

[1] U-ling teng T'u-ming ziu-z Kwông-liang teng Djün-be ka-shih. 烏陵等土明就是光亮等全備解說。(原註)

³⁶ Yi iao yüong ih-p'in ts'ih-kying læ gyi zông-deo ziang k'eh-ing ka k'eh z, wô, TSENG-KY'I PEH YIÆ-'O-WÔ TSO SING-JÜN, ³⁷ lao ting gyi læ læn ta li, kyi-tih læ dziao-mao-li ziu-z dziao-mao min-zin. ³⁸ Z iao læ Üô-leng ngah-koh-deo s-teh Üô-leng hao dæ-ziu sing-jün tong-si-go ko-shih, ziu-z Yi-seh-lih ts-seng sô tseng-ky'i væn-pah-go sing li-veh: yia hao z-k'eh læ gyi ngah-koh-zông, s-teh læ Yiæ-'o-wô min-zin hao tsih-ziu gyi-lah. ³⁹ lao tso si-mô-pu tsih-c'ih-go hwô-i, teng si-mô-pu-go dziao-mao; yi tso ta, ziu-z siu-hwô s-vu sô tso go ta. ⁴⁰ Ng iao teng Üô-leng-go ng-ts tso hwô-i, yia teng gyi tso ta, teng gyi tso mao-ts, sön z yüong-wô, sön z yin-li. ⁴¹ Keh-sing ng hao peh ng ah-ko Üô-leng teng gyi ng-ts c'ün; yia iao fu gyi-lah yiu, shih-lih gyi-lah, tseng-ky'i gyi-lah, hao tæen-tông voh-z Ngô tsi-s-go tsih-veng. ⁴² Yi teng gyi-lah tso si-mô-pu-go! kw'u tsô-djü 'ô-sing: z iao dzong iao-bo-li tao do-t'e we-ts. ⁴³ Üô-leng teng gyi ng-ts tseo-tsing kong-we tsiang-

bong. 'òh-tsia gying-long* tsi-dæn læ Sing-sô bæen-z, pih-iao c'ün gyi, sæen-leh væen-ze, we si. Keh z Üô-leng teng gyi 'eo-dæ üong-yün-go lih-li.

³⁶ 「又要用一片赤金來其上頭，像刻印介刻字，話：尊起撥耶和華做聖善。³⁷ 要釘其來藍帶裏，繫的來朝帽裏，就是朝帽面前。³⁸ 是要來亞倫額角頭，使得亞倫好代受聖善東西個過失。就是以色列子孫所尊起凡百個聖禮物。也好時刻來其額角上，使得來耶和華面前好接受其拉。³⁹ 要做細麻布織出個花衣，等細麻布個朝帽。又做帶，就是繡花師父所做個帶。⁴⁰ 爾要等亞倫個兒子做花衣，也等其做帶，等其做帽子，算是榮華，算是豔麗。⁴¹ 箇星爾好撥爾阿哥亞倫等其兒子穿。也要傳其拉油，設立其拉，尊起其拉，好單當服侍我祭司個職份。⁴² 又等其拉做細麻布個褲遮住下身。是要從腰縛裏到大腿爲止。⁴³ 亞倫等其兒子走進公會帳篷，或者近擺祭壇來聖所辦事，必要穿其，省勒犯罪，會死。箇是亞倫等其後代永遠個律例。」

C. XXIX^[1].

[1] 原書此處錯印爲 XXXI

NG tseng-ky'i gyi-lah tso Ngô-go tsi-s, z pih-iao ka tso; ziu-z, do ih-deo yüong-ngeo, liang-tsah m-mao-bing-go yüong-jiang, ² wa-yiu m-kao-shü mun-deo, teng 'o-yiu-go m-kao-shü ping, djô-yiu-go m-kao-shü pin ping; tu iao yüong mah-feng tso-go. ³ Keh-sing tsi-leh ih-tsah læn-li, lin læn ta-leh læ, teng yüong-ngeo, liang-tsah yüong-jiang. ⁴ Ng iao ling Üô-leng, teng gyi ng-ts tao kong-we tsiang-bong-go meng-k'eo, yüong shü gyiang gyi-lah. ⁵ Yi do-leh i-zông, ziu-z hwô-i, teng yi-feh li-hyang-go t'ao-i, yi-feh, teng hyüong-ba keh-sing, peh Üô-leng c'ün-ts; yia kyi-leh yi-feh-go tsih-c'ih hwô-ta. ⁶ Wa-yiu pô dziao-mao ta læ gyi deo-li, dziao-mao zông-deo yi kô sing-jün kwun-min. ⁷ Yia do fu-go yiu tao læ gyi deo-zông fu gyi. ⁸ Ping-ts'ia eo gyi ng-ts long-læ, pô i-zông peh gyi-lah c'ün; Yia do-leh ta peh Üô-leng teng gyi ng-ts kyi; do mao-ts peh gyi-lah ta: s-teh tsi-s-go tsih-veng joh-ü gyi-lah üong-yün-go lih-li: z-ka ng hao tseng-ky'i Üô-leng teng ng-ts. ¹⁰ Yi ky'in yüong-ngeo tao kong-we tsiang-bong min-zin: Üô-leng teng gyi ng-ts hao en-siu læ yüong-ngeo-go deo-zông. ¹¹ 'Eo-deo læ kong-we tsiang-bong meng-k'eo, Yiaë-'o-wô min-zin, sah keh-tsah yüong-ngeo. ¹² Ng yüong ts-meh-deo nyin yüong-ngeo-go hyüih djô-læ dæn-zông koh-li; yü-to hyüih tu tao læ dæn-'ò. ¹³ Iao pô ng-dzông dön-ky'ün-go yiu, teng zông-deo-go keh liang-go iao-ts, lin zông-deo yiu, tu me læ dæn-zông. ¹⁴ Tsih-yiu yüong-ngeo-go bi, nyüoh, teng feng, ng tu yüong ho me gyi læ ying-za nga-deo: keh z Ze-tsi. ¹⁵ Yi do ih-tsah yüong-jiang: Üô-leng teng gyi ng-ts iao en-siu læ yiang deo-zông. ¹⁶ Ziu sah-diao keh-tsah yiang, pô gyi hyüih tsah-læ dæn-go dön-ky'ün. ¹⁷ Yi kw'e-tang-kw'e feng-k'æ yüong-jiang, gyiang gyi ng-dzông teng kyiah-kwang, pô feng-k'æ-go kw'e-su teng deo pa-tæn-long. ¹⁸ Pô keh djün-tsah yüong-jiang me læ dæn-zông: keh z Yiaë-'o-wô-go Væn-tsi: keh z p'eng-hyang-go tsi-veh, yüong ho hyin-peh Yiaë-'o-wô-go. ¹⁹ Tsæ do keh ih-tsah yüong-jiang: Üô-leng teng gyi ng-ts iao en-siu læ yiang go deo-zông. ²⁰ Ziu sah-diao keh-tsah yiang, pô gyi hyüih djô Üô-leng jing-tsah ng-tô-djü, teng gyi ng-ts-go jing-tsah ng-tô-djü, teng jing-tsah siu do ts-meh-deo, jing-tsah kyiah do tsih-meh-deo, wa-yiu tsah hyüih læ dæn-go dön-ky'ün. ²¹ Yi iao sah-diao keh-tsah yiang, pô dæn-zông-go hyüih, teng sô fu-go yiu tsah Üô-leng sing-zông teng gyi-go i-voh, wa-yiu gyi ng-ts-go sing-zông teng gyi-lah i-voh; s-teh Üô-leng teng gyi-go i-voh, gyi-go ng-ts teng gyi-lah i-voh, long-tsong tseng-ky'i. ²² Yi do yüong-jiang-go yiu, teng mi-pô, ng-dzông dön-ky'ün-go yiu, teng ken-go keh liang-go iao-ts, lin zông-deo-go yiu, wa-yiu jing-tsah ^[1]do-t'e: keh z 'ang tseng-ky'i-li go yüong-jiang. ²³

Yi læ Yïæ-'o-wô min-zin. m-kao-shü ping-go læn-li, do ih-go mun-deo, ih-go yiu-ping, ih-go pin-ping; ²⁴ tu fông læ Üô-leng siu-li, teng gyi ng-ts-go siu-li, yiao gyi læ Yïæ-'o-wô min-zin tso yiao-tsi. ²⁵ Keh-tsao dzong gyi siu-li tsih-ziu, me gyi læ dæn-zông, læ væn-tsi ts zông, tso p'eng-hyang læ Yïæ-'o-wô min-zin: keh z yüong ho hyin-peh Yïæ-'o-wô-go tsi-veh. ²⁶ Yi iao pô tseng-ky'i Üô-leng keh-tsah yüong-ying-go hyüong-kwun-deo, yiao gyi læ Yïæ-'o-wô-go min-zin tso yiao-tsi: keh? z ng sô kæ teh-go veng-ts. ²⁷ Yi iao tseng-ky'i yiao-tsi-go hyüong-kwun-deo, teng kong-tsi-go do-t'e ziu-z we-leh tseng-ky'i Üô-leng teng gyi ng-ts keh tsah yüong-ying sô yiao-yiao, sô kong-kong-go. ²⁸ Keh z Yi-seh-lih ts-seng iao kwe-peh Üô-leng teng gyi ng-ts, tso? üong-yün-go lih-li; ing-we z Kong-tsi: keh Kong-tsi z c'ih-ü gyi-lah go zia-eng tsi, ziu-z Yi-seh-lih sô kong-vong Yïæ-'o-wô-go, ²⁹ Üô-leng-go sing-jün i-zông pih-ding yi-loh peh gyi ng-ts, 'ang tseng-ky'i li z-'eo fu-yiu, hao c'ün-ts. ³⁰ Dæ gyi tso tsi-s-go ng-ts tseo-tsing tsiang-bong læ Sing-sô bænz, pih-iao c'ün-leh gyi ts'ih-nyih kong-fu. ³¹ Ng iao do sô tseng-ky'i yüong-ying, ts gyi nyüoh læ sing-jün di-fông. ³² Üô-leng teng gyi ng-ts iao læ kong-we tsiang-bong meng-k'eo ky'üoh yüong-ying nyüoh teng læn-li-go ping. ³³ Joh-ze-go tong-si, ziu-z tseng-ky'i ts'ing-kyih Üô-leng teng gyi ng-ts sô yüong go, gyi-lah hao ky'üoh; dæn-z bih-nying feh-k'o ky'üoh, ing-we z sing-jün-go. ³⁴ Sô tseng-ky'i go nyüoh teng ping, ziah-z dzing-loh tao di-nyi nyih, z feh-k'o ky'üoh, iao yüong ho me-gyi-diao, ing-we z sing-jün-go. ³⁵ Ng iao hyang Üô-leng ng-ts, tsiao Ngô væn-pah sô feng-fu ng-go ka tso: ts'ih-nyih kong-fu iao teng gyi-lah 'ang tseng-ky'i-go li. ³⁶ Me-nyih iao hyin ih-tsah yüong-ngeo tso ze-tsi, hao c'ü-joh ze: yi we-leh dæn hyin joh-ze tsi, iao ts'ing-kyih gyi, yia fu gyi yiu, tseng-ky'i gyi. ³⁷ Ts'ih-nyih li-hyang ng we-leh dæn hyin joh-ze tsi tseng-ky'i gyi, ziu hao sön ting sing-jün-go dæn: væn-pah bang-djoh dæn-go pih-ding z sing-jün-go. ³⁸ Ng sô hyin-læ dæn-zông-go, ziu-z, tông-nyin-go siao-ying, me-nyih liang-tsah. ³⁹ T'in-nyiang hyin ih-tsah siao-ying, yia-deo hyin ih-tsah siao-ying. ⁴⁰ Teng siao-ying dong hyin-go yiu min-feng ^[2]yi-fah jih kwu ts-ih, 'o-leh sông-c'ih-go yiu ih ^[3]hying s-feng ts-ih; wa-yiu tsiu ih hying s-feng ts-ih, tso din-tsiu-go yüong-dziang. ⁴¹ Keh ih-tsah siao-ying iao yia-deo hyin-zông, ziang t'in-nyiang-go su-tsi teng din-tsiu ka, tso p'eng-hyang-go tsi-veh, yüong ho hyin-peh Yïæ-'o-wô. ⁴² Keh-go væn-tsi ng shü-shü dæ-dæ iao dziang-t'ong hyin-peh Yïæ-'o-wô læ kong-we tsiang-bong-go meng-k'eo: Ngô læ keh-deo we we-djoh ng, teng ng kông. ⁴³ Læ keh-deo Ngô yia we teng Yi-seh-lih ts-seng siang-we, hyin-c'ih Ngô-go yüong-wô, tseng-ky'i keh di-fông. ⁴⁴ Ngô we tseng-ky'i kong-we-go tsiang-bong teng tsi-dæn; yia we tseng-ky'i Üô-leng lin gyi ng-ts, tso Ngô-go tsi-s. ⁴⁵ Ngô yia we deng-læ Yi-seh-lih ts-seng cong-nyiang, tso gyi-lah-go Jing-ming. ⁴⁶ Gyi-lah we hyiao-teh Ngô z Yïæ-'o-wô gyi-lah Jing-ming, ling gyi-lah c'ih Yïæ-gyih di-fông-go, s-teh Ngô hao deng-læ gyi-lah cong-nyiang: Ngô Yïæ-'o-wô z gyi-lah-go Jing-ming.

「爾尊起其拉做我個祭司，是必要介做：就是馱一頭雄牛、兩隻嘸毛病個雄羊，² 還有嘸酵水饅頭、等和油個嘸酵水餅、搽油個嘸酵水扁餅。都要用麥粉做個。³ 箇星齒勒一隻籃裏，連籃帶勒來，等雄牛、兩隻雄羊。⁴ 爾要領亞倫，等其兒子到公會帳篷個門口，用水澆其拉。⁵ 又馱勒衣裳，就是花衣，等以弗裏向個套衣、以弗、等胸牌箇星，撥亞倫穿仔。也繫勒以弗個織出花帶。⁶ 還有把朝帽帶來其頭裏。朝帽上頭又加聖善冠冕。⁷ 也馱傳個油倒來其頭上傳其。⁸ 並且謳其兒子攏來，把衣裳撥其拉穿。也馱勒帶撥亞倫等其兒子繫。馱帽子撥其拉帶。使得祭司個職份屬於其拉永遠個律例。是介爾好尊起亞倫等兒子。¹⁰ 又牽雄牛到公會帳篷面前。亞倫等其兒子好按手來雄牛個頭上。¹¹ 後頭來公會帳篷門口、耶和華面前，殺箇隻雄牛。¹² 爾用指末頭捻雄牛個血搽來壇上角裏。餘多血都倒來壇下。¹³ 要把五臟團圈個油，等上頭個箇兩個腰子，連上頭油，都焜來壇上。¹⁴ 只有

雄牛個皮肉、等糞，爾都用火焠其來營寨外頭。箇是罪祭。¹⁵ 又馱一隻雄羊。亞倫等其兒子要按手來羊頭上。¹⁶ 就殺掉箇隻羊，把其血扎來壇個團圈。¹⁷ 又塊打塊分開雄羊，澆其五臟等腳梗，把分開個塊數等頭擺帶攏。¹⁸ 把箇全隻雄羊焠來壇上。箇是耶和華個燔祭。箇是噴香個祭物，用火獻撥耶和華個。¹⁹ 再馱箇一隻雄羊。亞倫等其兒子要按手來羊個頭上。²⁰ 就殺掉箇隻羊，把其血搽亞倫順隻耳朵垂，等其兒子個順隻耳朵垂，等順隻手大指末頭，順隻腳大指末頭，還有扎血來壇個團圈。²¹ 又要殺掉箇隻羊，把壇上個血，等所傳個油扎亞倫身上等其個衣服，還有其兒子個身上等其拉衣服。使得亞倫等其個衣服，其個兒子等其拉衣服，攏總尊起。²² 又馱雄羊個油、等尾巴、五臟團圈個油、等肝個箇兩個腰子、連上頭個油，還有順隻大腿^[1]。箇是行尊起禮個雄羊。²³ 又來耶和華面前嘸酵水餅個籃裏，馱一個饅頭、一個油餅、一個扁餅。²⁴ 都放來亞倫手裏，等其兒子個手裏，搖其來耶和華面前做搖祭。²⁵ 箇遭從其手裏接受，焠其來壇上、來燔祭之上，做噴香來耶和華面前。箇是用火獻撥耶和華個祭物。²⁶ 又要把尊起亞倫箇隻雄羊個胸腕頭，搖其來耶和華個面前做搖祭。箇是爾所該得個份子。²⁷ 又要尊起搖祭個胸腕頭，等供祭個大腿，就是爲了尊起亞倫等其兒子箇隻雄羊所搖搖、所供供個。²⁸ 箇是以色列子孫要歸撥亞倫等其兒子，做永遠個律例。因爲是供祭。箇供祭是出於其拉個謝恩祭，就是以色列所供奉耶和華個。²⁹ 亞倫個聖善衣裳必定遺落撥其兒子，行尊起禮時候傳油，好穿仔。³⁰ 代其做祭司個兒子走進帳篷來聖所辦事，必要穿勒其七日工夫。³¹ 爾要馱所尊起雄羊，煮其肉來聖善地方。³² 亞倫等其兒子要來公會帳篷門口喫雄羊肉等籃裏個餅。³³ 贖罪個東西，就是尊起清潔亞倫等其兒子所用個，其拉好喫。但是別人弗可喫。因爲是聖善個。³⁴ 所尊起個肉等餅，若是剩落到第二日，是弗可喫，要用火焠其掉。因爲是聖善個。³⁵ 爾要向亞倫兒子，照我凡百所吩咐爾個介做。七日工夫要等其拉行尊起個禮。³⁶ 每日要獻一隻雄牛做罪祭，好取贖罪。又爲了壇獻贖罪祭，要清潔其，也傳其油，尊起其。³⁷ 七日裏向爾爲了壇獻贖罪祭尊起其，就好算頂聖善個壇。凡百碰着壇個必定是聖善個。³⁸ 爾所獻來壇上個，就是：當年個小羊，每日兩隻。³⁹ 天亮獻一隻小羊，夜頭獻一隻小羊。⁴⁰ 等小羊同獻個油麪粉以法^[2]十股之一，和勒春出個油一欣^[3]四分之一，還有酒一欣四分之一，做奠酒個用場。⁴¹ 箇一隻小羊要夜頭獻上，像天亮個素祭等奠酒介，做噴香個祭物，用火獻撥耶和華。⁴² 箇個燔祭爾世代代要長通獻撥耶和華來公會帳篷個門口。我來箇頭會會着爾，等爾講。⁴³ 來箇頭我也會等以色列子孫相會，顯出我個榮華，尊起箇地方。⁴⁴ 我會尊起公會個帳篷等祭壇。也會尊起亞倫連其兒子，做我個祭司。⁴⁵ 我也會庵來以色列子孫中央，做其拉個神明。⁴⁶ 其拉會曉得我是耶和華其拉神明，領其拉出埃及地方個，使得我好庵來其拉中央。我耶和華是其拉個神明。」

[1] 此處原書錯印爲 do-t'æ

[2] K'en C. 16. 36. 看 C. 16. 36. (原註)

[3] lh hying da-iah jih kying. 一欣大約十斤。(原註)

C. XXX.

NG iao tso siao-hyang-go dæn: z yüong zao-kyiah-moh tso-go: ² Dziang ih ^[1]ah-ma; kw'eh ih ah-ma; s-pin cün-fông; kao nyi ah-ma: gyi koh yia z tso-kw'e liao-tsoh-go. ³ Yüong ts'ih-kying pao-læ gyi zông-deo, teng gyi dön-ky'ün, lin gyi s-koh; wa-yiu iao s-deh-lön-ky'ün tso kying-ts hwô-pin. ⁴ Yi iao læ yin-go 'ô-deo liang-pin koh-li tso liang-go kying-ky'ün, hao c'ün kông dæ gyi. ⁵ Ng iao yüong zao-kyiah-moh tso kông, pao-leh kying. ⁶ Dæn iao pa læ iah-siang bông-pin mun-tsiang min zin, ziu-z iah-siang zông-deo-go eng-zo min-zin;

læ keh-deo Ngô we we-djoh ng. ⁷ Üô-leng me t'in-nyiang pih-iao siao-hyang læ gyi zông-deo, ziu-z tsiu-tsoh teng-tsæn z-'eo, iao siao-hyang læ dæn-zông. ⁸ Üô-leng yia-deo tin teng-tsæn z-'eo yia iao læ dæn-zông siao-hyang: ng shü-shü dæ-dæ iao z-djông siao-hyang læ Yiæ-'o-wô min-zin. ⁹ Feh-k'o læ gyi zông-deo siao bih-ying-go hyang, yia feh-k'o hyin væn-tsi, 'ôh-tsia su-tsi, 'ôh-tsia din-tsiu læ gyi zông-deo. ¹⁰ Üô-leng me nyin ih-tsao iao yüong joh-ze-tsi-go hyüih læ gyi koh-li joh-ze: gyi shü-shü dæ-dæ me-nyin ih-tsao iao læ gyi zông-deo joh-ze: keh z ting sing-jün tseng-ky'i peh Yiæ-'o-wô-go.

「爾要做燒香個壇。是用皂莢木做個。² 長一阿買^[1]，闊一阿買，四邊轉方，高二阿買。其角也是做塊料作個。³ 用赤金包來其上頭，等其團圈，連其四角。還有要四凸亂圈做金子花邊。⁴ 又要來沿個下頭兩邊角裏做兩個金圈，好穿槓抬其。⁵ 爾要用皂莢木做槓，包勒金。⁶ 壇要擺來約箱旁邊幔帳面前，就是約箱上頭個恩座面前。來箇頭我會會着爾。⁷ 亞倫每天亮必要燒香來其上頭，就是周作燈盞時候，要燒香來壇上。⁸ 亞倫夜頭點燈盞時候也要來壇上燒香。爾世世代代要時常燒香來耶和華面前。⁹ 弗可來其上頭燒別樣個香，也弗可獻燔祭、或者素祭、或者奠酒來其上頭。¹⁰ 亞倫每年一遭要用贖罪祭個血來其角裏贖罪。其世世代代每年一遭要來其上頭贖罪。箇是頂聖善尊起撥耶和華個。」

[1] K'en C. 26. 2. 看 C. 26. 2. (原註)

¹¹ Yiæ-'o-wô feng-fu Mo-si, wô, ¹² Ng teng Yi-seh-lih ts-seng zao a-wu-ts'ah z-'eo, koh-nying læ zông ts'ah-ts, iao we-leh zi-go sing-ming, hyin c'ü-joh-go li-veh peh Yiæ-'o-wô: ka-ni, læ ng zao ts'ah-ts z-'eo, gyi-lah feh we yiu tsæ-næn. ¹³ Væn-pah zông ts'ah-ts ko-go nying iao hyin pun ^[1]z-k'eh, tu tsiao Sing-sô-go z-k'eh: (ih z-k'eh ziu-z nyiæn-go kyi-lah:) keh pun z-k'eh z iao hyin-peh Yiæ-'o-wô-go. ¹⁴ Væn-pah zông ts'ah-ts ko-go nying, dzong nyiæn-shü yi zông iao hyin li-veh peh Yiæ-'o-wô. ¹⁵ Yiu-lao-go feh kô-ts'eo, gyüong-go feh kæn-loh; tsih-iao pô pun z-k'eh hyin-peh Yiæ-'o-wô, c'ü-joh ng-lah-go sing-ming. ¹⁶ Yi-seh-lih ts-seng c'ü-joh-go nying-ts, ng iao do-læ bæn kong-we tsiang-bong-go yüong-dziang, hao tso Yi-seh-lih ts-seng-go kyi-nying læ Yiæ-'o-wô min-zin c'ü-joh ng-lah-go sing-ming.

¹¹ 耶和華吩咐摩西，話：¹² 「爾等以色列子孫造挨戶冊時候，各人來上冊子，要爲了自個性命，獻取贖個禮物撥耶和華。介呢，來爾造冊子時候，其拉弗會有災難。¹³ 凡百上冊子過個人要獻半啍喀^[1]，都照聖所個啍喀（一啍喀就是廿個季拉）。箇半啍喀是要獻撥耶和華個。¹⁴ 凡百上冊子過個人，從廿歲以上要獻禮物撥耶和華。¹⁵ 有佬個弗加湊，窮個弗減落。只要把半啍喀獻撥耶和華，取贖爾拉個性命。¹⁶ 以色列子孫取贖個銀子，爾要馱來辦公會帳篷個用場。好做以色列子孫個記認來耶和華面前，取贖爾拉個性命。」

[1] lh z-k'eh da-iah pun liang djong. 一啍喀大約半兩重。(原註)

¹⁷ Yiæ-'o-wô feng-fu Mo-si, wô, ¹⁸ Ng iao yüong dong tso yüoh-beng, k'o-yi gyiang-gyang: gyi kyiah yia z dong tso-go: iao en-læ kong-we tsiang-bong teng dæn-go cong-nyiang, pô shü tsi-tih. ¹⁹ Üô-leng teng gyi ng-ts hao læ keh-deo gyiang siu, gyiang kyiah. ²⁰ Gyi-lah 'ôh-tsia tseo-tsing kong-we tsiang-bong, 'ôh-tsia gying-long tsi-dæn hyin væn-tsi peh Yiæ-'o-wô, pih-iao yüong shü gyiang-gyang, sæn-leh we si. ²¹ Z-ka gyi-lah iao gyiang siu, gyiang kyiah, k'ong-p'ô we si: keh hao tso Üô-leng teng gyi ts-seng shü-shü dæ-dæ üong-yün-go lih-li.

¹⁷ 耶和華吩咐摩西，話：¹⁸ 「爾要用銅做浴盆，可以澆澆。其腳也是銅做個。要安來公會帳篷等壇個中央，把水澆的。¹⁹ 亞倫等其兒子好來箇頭澆手，澆腳。²⁰ 其拉或者走進公會帳篷，或者近攏祭壇獻燔祭撥耶和華，必要用水澆澆，省勒會死。²¹ 是介其拉要澆手澆腳，恐怕會死。箇好做亞倫等其子孫世代代永遠個律例。」

²² Yiæ-'o-wô yi feng-fu Mo-si, wô, Ng iao do zông-teng hyiang-liao, ziu-z zing meh-yiah, ng-pah ^[1]z-k'eh; hyiang nyüoh-kwe, ih-pun, ziu-z nyi-pah ng-jih z-k'eh; hyiang ts'ông-bun, nyi-pah ng-jih z-k'eh; ²⁴ Kwe-bi, ng-pah z-k'eh; (tu tsiao Sing-sô-go z-k'eh 😊 wa-yiu ken-læn yiu ih ^[2]hying. ²⁵ lao pô keh-sing, tso sing-jün fu-go yiu, tsiao 'o hyiang-liao-go fông-fah tso yiu: keh z sing-jün fu-go yiu. ²⁶ Hao yüong gyi djô-læ kong-we tsiang-bong teng fah-siang-li; ²⁷ wa-yiu en-coh lin ih-ts'ih-go ky'i-ming, teng-dæ lin ih-ts'ih-go ky'i-ming, teng hyiang-dæn; ²⁸ væn-tsi-go dæn lin ih-ts'ih-go ky'i-ming, yüoh-beng lin gyi-go kyiah. ²⁹ Ng iao tseng-ky'i gyi tso ting sing-jün: væn-pah bang-djoh gyi-go pih-ding sön z sing-jün-go. ³⁰ Yia iao fu Üô-leng teng gyi-go ng-ts tseng-ky'i gyi-lah tso Ngô-go tsi-s. ³¹ Ng iao feng-fu Yi-seh-lih ts-seng, wô, Keh z Ngô sing-jün fu go yiu, peh ng-lah shü-shü dæ-dæ hao yüong. ³² Feh-k'o tao læ bih-nying-go sing-zông, tsiao keh-go fông-fah ling-nga tso keh-cong-ka go yiu; ing-we! z sing-jün-go, ng-lah yia kæ sön gyi z sing-jün. ³³ Ziah yiu nying tsiao keh-go ka tso, 'ôh-tsia fu-læ bih-nying-go sing-zông, pih-iao læ pah-sing cong-nyiang gyü-djih gyi.

²² 耶和華又吩咐摩西，話：²³ 「爾要馱上頂香料，就是：淨沒藥、五百呢喀^[1]；香肉桂、一半，就是二百五十呢喀；香菖蒲、二百五十呢喀；²⁴ 桂皮、五百呢喀（都照聖所個呢喀）。還有橄欖油一欣^[2]。²⁵ 要把箇星，做聖善傳個油。照和香料個方法做油。箇是聖善傳個油。²⁶ 好用其搽來公會帳篷等法箱裏。²⁷ 還有案桌連一切個器皿、燈臺連一切個器皿、等香壇；²⁸ 燔祭個壇連一切個器皿、浴盆連其個腳。²⁹ 爾要尊起其做頂聖善。凡百碰着其個必定算是聖善個。³⁰ 也要傳亞倫等其個兒子，尊起其拉做我個祭司。³¹ 爾要吩咐以色列子孫，話：『箇是我聖善傳個油，撥爾拉世代代好用。³² 弗可倒來別人個身上，照箇個方法另外做箇種介個油。因為是聖善個，爾拉也該算其是聖善。³³ 若有人照箇個介做，或者傳來別人個身上，必要來百姓中央拒絕其。』

[1] K'en 13 tsih. 看 13 節。（原註）

[2] K'en C. 29. 40. 看 C. 29. 40. （原註）

³⁴ Yiæ-'o-wô yi feng-fu Mo-si, wô, Ng do hyiang-liao, ziu-z nô-dah, z-yi-leh, heh-pi-nô; keh-sing hyiang-liao teng zing-go jü-hyang 'o-tæn-long: veng-liang iao ih-ying. ³⁵ Yüong gyi tso hyiang, tsiao 'o-hyang-go fông-fah, kô-leh yiu 'o-tæn-long tso kyih-zing sing-jün-go. ³⁶ Ng iao do-tin sông-leh si-si, fông-læ kong-we tsiang-bong, iah-siang-go min-zin: læ keh-deo Ngô we we-djoh ng: ng kæ sön gyi z ting sing-jün-go. ³⁷ Kông-tao ng sô tso-go hyiang, feh-k'o we-leh zi tsiao keh-go hyiang fông-fah ka tso. Pih-iao sön gyi z sing-jün, tseng-ky'i peh Yiæ-'o-wô-go. ³⁸ Ziah yiu nying tsiao keh-go ka tso, zi hyüong-hyüong, pih-iao læ pah-sing cong-nyiang gyü-djih gyi.

³⁴ 耶和華又吩咐摩西，話：³⁴ 「爾馱香料，就是：拿達、士以勒、赫比拿。箇星香料等淨個乳香和帶攏。分量要一樣。³⁵ 用其做香，照和香個方法，加勒油和帶攏做潔淨聖善個。³⁶ 爾要馱點春勒細細，放來公會帳篷、約箱個面前。來箇頭我會會着爾。爾該算其是頂聖善個。³⁷ 講到爾所做個香，弗可爲了自照箇個香方法介做。必要算其是聖善，尊起撥耶和華個。³⁸ 若有人照箇個介做，自嗅嗅，必要來百姓中央拒絕其。」

！ WIP 後續未轉寫完